

# Matiyu

## Matiyu Yesu a Fe Xibaru Faɲin

### Naxan Sebe

Matiyu Kitabun yireni ito seɓeɓi neɓi ɲee tonge saxan e nun suulun ɲaxɓɓon Yesu te xanbini kore xonna ma. Mudu maxinla nan yi Matiyo ra Romi kaane xa Yesu a xilima waxatin naxan yi. Matiyo findi Yesu a xarandiina nde nan na. Yesu a taruxun ligaxi neɓi Matiyo yee xori, a yi a seɓe waxati gbete yi.

Matiyo nun Maraka nun Luka Yesu a taruxun yebama fayida kii kedenna nin. Koni Matiyo a gbeen seɓeɓi Yahudiyane nan xa. Na nan a liga, a yirena ndee seɓe Yahudiyane naxanye famuma dangu siya gbetene ra. A mɓn nabiya fala fonne fe falama dangu bonne ra alogo a xa a yita Yahudiyane ra fa fala Yesu bata nabine birin ma falane rakamali.

Kitabun yireni ito Yesu bari kiin nan singe yebama, Mariyamaa diina. Yesu xaran wuyaxi ti neɓi a dunuɓa yi gidini a yamaan xa. A mɓn kabanako wuyaxi liga neɓi. Matiyo na nan yebama Ningila Yesu kui. Donxen na, a Yesu a sayaan nan yebama e nun a rakeli fena sayani.

*Yesu benbane fe*

*Taruxune Singen 2.3-15 nun Luka 3.23-38*

<sup>1</sup> Yesu Alaa Muxu Sugandixin benbane xinle nan itoe ra. Dawuda bɓnsɓnna nde nan yi Yesu ra. Ibrahima bɓnsɓnna nde nan yi Dawuda ra.

<sup>2</sup> Iburahima nan Isiyaga sɔtɔ. Isiyaga yi Yaxuba sɔtɔ. Yaxuba yi Yuda nun a xunyene nun a tadane sɔtɔ. <sup>3</sup> Yuda yi Peresi nun Sera sɔtɔ. E nga nan yi Tamari ra. Peresi yi Xesirɔn sɔtɔ. Xesirɔn yi Rami sɔtɔ. <sup>4</sup> Rami yi Aminadabo sɔtɔ. Aminadabo yi Naxason sɔtɔ. Naxason yi Salimon sɔtɔ. <sup>5</sup> Salimon nun Raxabi yi Boosu sɔtɔ. Boosu nun Ruti yi Obedi sɔtɔ. Obedi yi Yese sɔtɔ. <sup>6</sup> Yese yi Manga Dawuda sɔtɔ.

Dawuda yi Sulemani sɔtɔ. A nga yi findixi Yurayaa naxanla nan na. <sup>7</sup> Sulemani yi Robowan sɔtɔ. Robowan yi Abiya sɔtɔ. Abiya yi Asa sɔtɔ. <sup>8</sup> Asa yi Yosafati sɔtɔ. Yosafati yi Yehorami sɔtɔ. Yehorami yi Yusiya sɔtɔ. <sup>9</sup> Yusiya yi Yotami sɔtɔ. Yotami yi Axasi sɔtɔ. Axasi yi Xesekiya sɔtɔ. <sup>10</sup> Xesekiya yi Manase sɔtɔ. Manase yi Amɔn sɔtɔ. Amɔn yi Yosiya sɔtɔ. <sup>11</sup> Yosiya yi Yɛkonaya nun a xunyene nun a tadane sɔtɔ, e Isirayila muxune suxu waxatin naxan yi, e siga e ra Babilɔn taani konyiyani.

<sup>12</sup> E siga xanbini Babilɔn taani, Yɛkonaya yi Selatili sɔtɔ. Selatili yi Sorobabeli sɔtɔ. <sup>13</sup> Sorobabeli yi Abiyudi sɔtɔ. Abiyudi yi Eliyakimi sɔtɔ. Eliyakimi yi Asori sɔtɔ. <sup>14</sup> Asori yi Sadaki sɔtɔ. Sadaki yi Ahimi sɔtɔ. Ahimi yi Eliyudi sɔtɔ. <sup>15</sup> Eliyudi yi Eleyasari sɔtɔ. Eleyasari yi Matani sɔtɔ. Matani yi Yaxuba sɔtɔ. <sup>16</sup> Yaxuba yi Yusufu sɔtɔ, Mariyamaa xɛmɛna, naxan Yesu bari, naxan xili “Alaa Muxu Sugandixina.” <sup>17</sup> Awa, fɔlɔ Iburahima ma, han sa dɔxɔ Dawuda ra, na findi mayixetɛ fu nun naanin nan na. Fɔlɔ Dawuda ma, han e siga Isirayila yamaan na Babilɔn taani waxatin naxan yi, na fan mayixetɛ fu nun

naanin. Fɔlɔ e sigan ma Babilɔn taani, sa dɔxɔ Alaa Muxu Sugandixin bari waxatin na, na fan findixi mayixetɛ fu nun naanin nan na.

*Marigi Yesu sɔtɔ fena*

*Luka 2.1-7*

<sup>18</sup> Awa, Yesu Alaa Muxu Sugandixin sɔtɔxi kii naxan yi, na nan ito ra. A nga, Mariyama yi masuxi Yusufu xɔn ma nun, koni benun a xa dɔxɔ a xɔn ma waxatin naxan yi, a yi a to a bata fudikan fata Alaa Nii Sariɲanxin na. <sup>19</sup> Tinxin muxun nan yi a xɛmɛn Yusufu ra. A mi yi waxi a xa Mariyama rayagi yamaan yetagi. Nanara, a yi a miri a xa a futun kala luxunni. <sup>20</sup> A yi a mirima na feen ma waxatin naxan yi, Marigina malekan yi mini a xa xiyeni, a naxa, “Yusufu, Dawuda bɔnsɔnna, i nama gaxu i ya ɲaxanla Mariyama tongɛ, amasɔtɔ a diin naxan barima, na fataxi Alaa Nii Sariɲanxin nan na. <sup>21</sup> A dii xɛmɛn barima nɛn, i yi a xili sa Yesu\* amasɔtɔ a tan nan a yamaan nakisima e yulubine ma.”

<sup>22</sup> Ito birin ligaxi nɛn alogo Marigin naxan falaxi a nabiin xɔn ma, a na xa kamali. <sup>23</sup> A naxa, “Sungutun nasɔlɔnxin fudikanma nɛn, a dii xɛmɛn bari. E yi a xili sa Emanuweli, na bunna nɛɛn fa fala, ‘Ala en tagi.’ ”†

<sup>24</sup> Nanara, Yusufu xulun waxatin naxan yi, Marigina malekan naxan yamari a ma, a na liga, a yi Mariyama tongo a ɲaxanla ra. <sup>25</sup> Koni e mi kafu han a yi dii xɛmɛn bari. Yusufu yi a xili sa “Yesu.”

---

\* **1:21:** Yesu xinla bunna nɛɛn, fa fala “Marakisi Tiina” Heburu xuini. † **1:23:** Esayi 7.14 nun 8.8 nun 8.10 fan mato.

## 2

### *Xəntən tiin naxanye sa keli sogeteden binni*

<sup>1</sup> Yesu to sətə Betələmi taani Yudaya yamanani Manga Herode waxatini, fekolonne yi fa sa keli sogeteden binni, fa Yerusalən taani. <sup>2</sup> E muxune maxədin, e naxa, “Diidin naxan barixi Yahudiyane mangan na, na minən yi? Nxu bata a taxamaseri saren to nxu yi sogeteden binni waxatin naxan yi. Nanara, nxu bata fa nxu xa fa a batu.” <sup>3</sup> Manga Herode na mə waxatin naxan yi, a kuisan, e nun Yerusalən kaane birin. <sup>4</sup> A yi yamaan saraxarali kuntigine nun sariya karaməxəne xili, a yi e maxədin, a naxa, “Alaa Muxu Sugandixin yi lan a xa bari minən yi?”\* <sup>5</sup> E yi a yabi, e naxa, “A barima Betələmi taan nin Yudaya yamanani. Nabini ito nan səbexi, a naxa, <sup>6</sup> ‘I tan, Betələmi taan Yuda yamanani, taa xuri mi i tan na Yudaya taa gbeene yε. Amasətə mangana nde kelima nən i tan yi naxan Isirayila muxune masuxuma, n ma yamana.’ ”†

<sup>7</sup> Awa, Manga Herode yi fekolonne xili wundoni, a yi e maxədin na saren mini waxatin yetεən ma. <sup>8</sup> A yi ɲungun sa e ma siga Betələmi taani, a naxa, “E sa diidina fe yεε fen han! E na a to waxatin naxan yi, ε yi n nakolon alogo n fan xa sa a batu.”

<sup>9</sup> E to mangana falan namε, e yi siga. E saren naxan to sogeteden binni a fəlɒni, e mən yi na to, a yi lu e yεε ra han a sa ti diidin yiren xun ma. <sup>10</sup> E

---

\* **2:4:** A na maxədinna tixi nən bayo muxune yi Alaa Muxu Sugandixin faan maməma bayo nabi fonne waliyiya falane bata yi a fe yita xabu ɲεε kεmε wuyaxi. † **2:6:** Mika 5.1

to na saren to, e yi sɛwa han! <sup>11</sup> E to so banxini, e yi diidin nun a nga Mariyama to. E yi e xinbi sin a xa, e yi a batu. Na xanbi ra, e yi e sanba seene ramini, e yi xɛmaan nun wusulanna nun mirihi latikɔnɔnna fi a ma. <sup>12</sup> Ala yi fekolonne rakolon xiyeni, a e nama fa xɛtɛ Manga Herode fɛma. E yi xɛtɛ kira gbɛtɛ xɔn ma e konni.

### *Yesu sɔtɔ muxune yi e gi*

<sup>13</sup> Fekolonne kelixin na yi, Marigina malekan yi mini Yusufu xa xiyeni, a yi a fala a xa, a naxa, “Keli, i diidin nun a nga tongo, ε yi ε gi, ε siga Misiran yamanani. E sa lu na han n na falan ti ε xa waxatin naxan yi. Amasɔtɔ Herode diidin fenma a faxa xinla nan ma.” <sup>14</sup> Nayi, Yusufu yi keli, a diidin nun a nga tongo kɔɛɛn na, e siga Misiran yamanani. <sup>15</sup> A lu na han Herode yi faxa. Marigin naxan fala nabiin xɔn ma, na yi kamali, a naxa, “N na n ma dii xɛmɛn xili nɛn a xa keli Misiran bɔxɔni.” †

### *Diine faxa fena*

<sup>16</sup> Herode to a kolon a fekolonne bata a mayenden, a bɔɔɛn yi te kati! A yi yamarin fi, a dii xɛmɛn naxanye Bɛtɛlɛmi taan nun a rabilinna birin yi, naxanye barin munma ɔɛɛ firin sɔtɔ, a ne birin xa faxa. A na waxatin nagidi fekolonne gbee falan nan xɔn. <sup>17</sup> Nayi, Nabi Yeremi a falan yi kamali, a naxa,

<sup>18</sup> “Gbelegbele xuiin nun wuga xui gbeen tema  
Rama taani,  
Rakeli nan a diine wugama.  
A mi tinɔɛ a xa masabari

---

† **2:15:** Hose 11.1

amasotō e birin bata faxa.”§

*E xεε fena keli Misiran yi*

<sup>19</sup> Herode faxa waxatin naxan yi, Marigina malekan yi mini Yusufu xa xiyeni Misiran yamanani, <sup>20</sup> a yi a fala, a naxa, “Keli, i diidin nun a nga tongo, i xεε Isirayila yamanani amasotō naxanye diidin fenma a faxa feen na, ne bata faxa.” <sup>21</sup> Nanara, Yusufu yi keli, a diidin nun a nga tongo, a xεε Isirayila yamanani. <sup>22</sup> Koni a mε waxatin naxan yi, a Herode a dii xεmεn Arikelayusi dōxi a fafe nōxōni mangan na Yudaya yamanan xun na, Yusufu yi gaxu na yidōxō feen na. Ala mōn yi a rakolon xiyeni, a yi siga Galile yamanani. <sup>23</sup> A yi sa dōxō taana nde yi naxan xili Nasareti. Nabine falane yi rakamali, fa fala, “A xili bama nεn ‘Nasareti kaana.’ ”

### 3

*Yoni Marafu Tiina kawandina*

*Maraka 1.1-8, Luka 3.1-18, Yoni 1.19-28*

<sup>1</sup> Yoni Marafu Tiin yi fa na waxatini a kawandin ba fōlō tonbonni Yudaya yamanani. <sup>2</sup> A naxa, “E xun xanbi so ε hakεne yi, amasotō Ariyanna Mangayaan bata maso!” <sup>3</sup> Nabi Esayi yi a tan nan ma fe falama, a naxa, “Muxuna nde xuiin minima tonbonni, naxan a falama, ‘E kirani tōn Marigin yεε ra, ε kirane matinxin a xa!’ ”\*

<sup>4</sup> Nōgōmε xabe dugin nan yi ragodoxi Yoni ma. A yi tagi xidixi kidin na. A yi baloma tuguminne

§ 2:18: Yeremi 31.15 \* 3:3: Esayi 40.3

nun kumin nan na. <sup>5</sup> Yamaan yi lu fe a fema keli Yerusalen nun Yudaya yamanan nun Yuruden baan nabilinna birin yi. <sup>6</sup> E yi e ti e yulubine ra, a yi e rafu Yuruden baani e tubi xinla ma Ala ma.

<sup>7</sup> Yoni to Farisi muxune† nun Saduse muxun‡ wuyaxi to fe a fema, a xa e rafu igeni, Yoni yi a fala e xa, a naxa, “E tan sari bɔnsɔnne! Nde e rakolonxi, e xa e gi Alaa xɔlɔn bun ma? <sup>8</sup> E kewanle xa a yita fa fala e bata e xun xanbi so e hakene yi. <sup>9</sup> E nama e miri fa fala e benban nan Iburahima ra. N xa a fala e xa, Ala nɔe gemeni itoe finde nen Iburahima bɔnsɔnne ra! <sup>10</sup> Bunbin bata yitɔn wudi salenne sege feen na. Wudin naxan mi bogi fari tima, na sege ma nen, a woli teeni. <sup>11</sup> N tan e rafuma igeni e tubi xinla nan ma Ala ma. Koni naxan senben gbo n tan xa, na fama n tan xanbi ra, n mi nɔe naxan ma sankidi fulunje yati. Na e rafuma Alaa Nii Sarijanxin nun teen nin. <sup>12</sup> A segedenna a yii, a maali fe, a yi a sa sagan kui, koni a se dagin sama nen tee tutareni!”

*Yesu rafu fena igeni*

*Maraka 1.9-11, Luka 3.21-22, Yoni 1.32-34*

<sup>13</sup> Na waxatini Yesu yi keli Galile yamanani, a siga Yoni fema Yuruden baani, alogo Yoni xa a rafu

---

† **3:7:** Farisi muxune: Yahudiyane nan yi muxuni itoe ra naxanye lan ma fe yi a ra, e xa dinan suxu kii kedenni. E tan nan e sɔbe so Musaa sariyan suxun ma dangu Yahudiyen bonne ra. E mɔn yi e benbane namunne suxuma kii xɔdexeni. E tan yi laxi malekane ra. E mɔn yi laxi a ra a muxune kelima nen sayani. ‡ **3:7:** Saduse muxune: Yahudiyane nan yi muxuni itoe ra naxanye lan ma fe yi a ra, e xa dinan suxu kii kedenni. Lan mi yi e nun Farisi muxune tagi. E tan mi yi laxi malekane ra. E mɔn mi yi laxi a ra a muxune kelima nen sayani.

igeni. <sup>14</sup> Koni Yoni yi tondi, a naxa, “N makona a ma, i tan nan xa n tan nafu, koni i bata fa n tan fema.” <sup>15</sup> Yesu yi a yabi, a naxa, “Tin ito xa liga singen, amasoto a lan nen en xa fe tinxinxine birin nakamali.” Nanara, Yoni yi tin. <sup>16</sup> Yesu to rafu, a keli igeni nen tun, kore xonna deen yi rabi a xa, a yi Alaa Nii Sarijanxin to gode ganba sawurani, a dɔxɔ a ma. <sup>17</sup> Fala xuiin yi keli kore, a yi a fala, a naxa, “N nafan Dii Xemen nan ito ra naxan bata n kenen ki fani.”

## 4

### *Setana yi kata Yesu ratantandeni*

#### *Maraka 1.12-13, Luka 4.1-13*

<sup>1</sup> Na xanbi ra, Alaa Nii Sarijanxin yi Yesu xali tonbonni alogo Yinna Manga Setana xa kata a ratantan feen na. <sup>2</sup> Yesu yi soge tonge naanin kɛe tonge naanin ti sunni, a mi donse don, sunna yi a suxu.\* <sup>3</sup> Maratantan tiin yi fa Yesu fema, a naxa, “Xa Alaa Dii Xemen nan i tan na, a fala gemeni itoe xa, e xa maxete burun na.” <sup>4</sup> Yesu yi a yabi, a naxa, “A sebexi Kitabun kui, a naxa, ‘Muxun mi balon donseen xan gbansan na fo Ala falan naxanye birin tima.’† ”

<sup>5</sup> Yinna Manga Setana yi Yesu tongo, a siga a ra Taa Sarijanxini,‡ a sa a ti Ala Batu Banxin xun tagi. <sup>6</sup> A yi a fala Yesu xa, a naxa, “Xa Alaa

---

\* **4:2:** Na waxatini, muxun na yi sunna suxu, a mi yi donseen donma hali kɛen na. Waxatina nde yi, e mon yi a jɛnige e nama igen fan min hali kɛen na. † **4:4:** Sariyane 8.3 ‡ **4:5:** Yerusalem nan xili Taa Sarijanxina bayo a rasarijanxi Ala xa. Na feen sebexi Yaburin 87.1-3 kui.



Dii Xेमेn nan i tan na, tugaᅇ, amasotō a seᅇxi Kitabun kui, a naxa,  
 ‘Ala yamarin fima nēn a malekane ma i ya fe yi.  
 E yi i tongo, alogo i nama i sanna din gεmε yo ra.’§

<sup>7</sup> Yesu yi a yabi, a naxa, “A mōn seᅇxi Kitabun kui, a naxa, ‘I nama i Marigina Ala mato bunbani.’\* ”

<sup>8</sup> Na xanbi ra, Yinna Manga Setana mōn yi a tongo, a siga a ra geya gbeen fari, a dunuᅇna mangayane nun a binyene birin yita a ra. <sup>9</sup> Setana yi a fala a xa, a naxa, “Xa i xinbi sin n bun ma, i yi n batu, n ni itoe birin fima i ma nēn.” <sup>10</sup> Yesu yi a yabi, a naxa, “Setana, keli be! Amasotō a seᅇxi Kitabun kui, a naxa, ‘I xa i Marigina Ala binya, i yi a keden peen batu.’† ”

<sup>11</sup> Nayi, Yinna Manga Setana yi keli Yesu fεma. Malekane yi fa a mali.

*Yesu yi a wanla fōlō Galile yi*

*Maraka 1.14-15, Luka 4.14-15*

<sup>12</sup> Yesu a mε waxatin naxan yi, a e bata Yoni sa kasoon na, a siga Galile yamanani. <sup>13</sup> A mi fa dōxō Nasarēti taani sōnōn, a sa dōxō Kaperunan taani Galile daraan dε Sabulon nun Nafatali bōxōni. <sup>14</sup> A na ligaxi nēn, alogo Nabi Esayi naxan falaxi, na xa kamali, a naxa,

<sup>15</sup> “Sabulon kaan nun Nafatali kaan naxanye baan binni, Yurudēn baan dε, siya gbεtεne gbeen Galile naxan na,

<sup>16</sup> yamaan naxan dōxi dimini,  
 ne bata kēnēn gbeen to.

§ 4:6: Yaburi 91.11-12 \* 4:7: Sariyane 6.16 † 4:10: Sariyane 6.13

Naxanye dɔxi sayaan dimini,  
keɛɛnna bata mini ne ma!”‡

<sup>17</sup> Na waxatini, Yesu yi kawandin ba fɔɔ, a naxa,  
“Ɛ xun xanbi so ɛ hakɛne yi! Amasɔtɔ Ariyanna  
Mangayaan bata maso.”

*Yesu yi muxu naanin xili*

*Maraka 1.16-20, Luka 5.1-11*

<sup>18</sup> Yesu sigan tima Galile Daraan dɛxɔn ma wax-  
atin naxan yi, a yi ngaxakedenma firin to. Yɛxɛ  
suxun nan yi e ra. Simɔn naxan xili Piyeri§ e nun  
a ngaxakedenna, Andire, e yi yɛxɛ suxuni yalaan  
na darani. <sup>19</sup> Yesu yi a fala e xa, a naxa, “Ɛ bira  
n fɔxɔ ra. N xa ɛ findi muxu fenne ra Ala xa alo  
ɛ yɛxɛn suxuma kii naxan yi.” <sup>20</sup> E yi e yalane sa  
mafuren! E bira a fɔxɔ ra. <sup>21</sup> A sigaxin yɛɛn na  
ndedi, a yi ngaxakedenma firin gbɛtɛye to, Yaki  
nun Yoni, Sebede a dii xɛmɛne. E nun e fafe yi e  
yalane yitɔnma kunkin kui. Yesu yi e xili. <sup>22</sup> E yi e  
fafɛ lu kunkin kui sa! E bira Yesu fɔxɔ ra.

*Yesu yi yamaan mali*

*Luka 6.17-19*

<sup>23</sup> Yesu yi siga Galile yamanan birin yi, a yamaan  
xaran e salide banxine yi. A yi Ariyanna Man-  
gayana fe Xibaru Faɗin kawandin ba e xa, a yi  
yamaan furetɔne rakɛndɛya furen sifan birin ma.  
<sup>24</sup> Muxune yi na feen xibarun mɛ Siriya yamanan  
birin yi. Yamaan yi fa furetɔn sifan birin nun tɔrɔ  
muxune ra e nun ɗinan ɗaxin yi naxanye fɔxɔ ra e  
nun gan furetɔne nun lɛbutɛne. Yesu yi ne birin  
nakɛndɛya. <sup>25</sup> Yama gbeen yi bira a fɔxɔ ra keli

‡ **4:16:** Esayi 8.23 han 9.1    § **4:18:** Muxune mɔn Piyeri ma a Pita.

Galile yamanan nun Taa Xun Fune yi. Ndee fan yi sa keli Yerusalen nun Yudaya nun Yuruden baan kidi ma.

## 5

### *Yesu yi kawandin ba geyaan fari*

<sup>1</sup> Yesu to yama gbeen to, a te a sa dɔxɔ geyaan fari. A xarandiine yi fa a fɛma. <sup>2</sup> A yi e xaran fɛlɔ.

### *Sɛwan gbeena fe*

#### *Luka 6.20-23*

<sup>3</sup> A naxa, “Sɛwan na kanne xa, naxanye mako Ala ma bayo ne Ariyanna Mangayaan sɔtɔma nɛn.

<sup>4</sup> Sɛwan na kanne xa, naxanye wugama, bayo Ala ne madɛndɛnma nɛn.

<sup>5</sup> Sɛwan na kanne xa, naxanye limaniyaxi, bayo bɔxɔn findima nɛn ne kɛɛn na.

<sup>6</sup> Sɛwan na kanne xa, tinxinna xɔnla naxanye suxuma alo kamɛn nun min xɔnla, bayo ne wasama nɛn.

<sup>7</sup> Sɛwan na kanne xa, naxanye kininkininma, bayo Ala kininkininma nɛn ne fan ma.

<sup>8</sup> Sɛwan na kanne xa, naxanye bɔɲɛn sariɲanxi, bayo ne Ala toma nɛn.

<sup>9</sup> Sɛwan na kanne xa, naxanye bɔɲɛ xunbenla rasoma, Ala ne xilima nɛn a a diine.

<sup>10</sup> Sɛwan na kanne xa, naxanye bɛsɛnxɔnxi e tinxinyana fe ra,

bayo ne Ariyanna Mangayaan sɔtɔma nɛn.”

<sup>11</sup> “Yamaan na ε konbi, e yi ε bεsɛnɔnya, e yi fala ɲaxin sifan birin ti ε xili ma n tan ma fe ra, sɛwana ε tan xa nayi. <sup>12</sup> Ε sɛwa, ε ɲaxan, amasɔtɔ barayi gbeen namaraxi ε xa ariyanna yi. Amasɔtɔ e nabine fan bεsɛnɔnya na kii nin xabu a fɔlɔni.”

### *Fɔxɔn nun kenɛna fe*

*Maraka 9.50, 4.21, Luka 14.34-35, 8.16*

<sup>13</sup> Yesu naxa, “Ε luxi nɛn alo fɔxɔna dunuɲa muxune birin xa. Koni xa fɔxɔn mɛxɛmɛxɛna ba ayi, a fa ramɛxɛmɛxɛnma nanse ra nayi? A tɔnɔ mi fa na fɔ a woli ayi, yamaan yi a yibodon. <sup>14</sup> Ε luxi nɛn alo kenɛna dunuɲa muxune birin xa. Taan naxan tixi geyaan fari, na mi luxuɲɛ. <sup>15</sup> Muxu yo mi lɛnpun nadεgε, a a raso deben bun ma. Koni fɔ lɛnpun xa dɔxɔ seen nan fari. Nanara, a kenɛna fiyε banxi kui kaane birin ma. <sup>16</sup> A na kii nin, ε kenɛna xa yanban yamaan yɛtagi alogo e xa ε wali faɲine to, e yi ε Fafe Ala binya ariyanna yi.”

### *Musaa Sariyana*

<sup>17</sup> Yesu naxa, “Ε nama ε miri fa fala n bata fa Sariya Kitabun nun nabine kitabune kaladeni. N mi faxi e kaladeni fɔ e rakamalideni. <sup>18</sup> N xa ɲɔndin fala ε xa, fanni kore xɔnna nun bɔxɔ xɔnna daxi, sese mi bε Sariya Kitabun na hali sɛbenla yiredi keden pe han feen birin yi kamali. <sup>19</sup> Nanara, naxan na yamarini ito nde keden kala hali a xurun ki yo ki, a bonne xaran na ma, na kanna yatɛma muxudin nan na Ariyanna Mangayani. Koni naxan sariyani itoe suxuma, a bonne xaran ne ma, na kanna findima nɛn muxu gbeen na Ariyanna Mangayani. <sup>20</sup> N xa ɲɔndin fala ε xa,

xa ε tinxinyaan mi dangu sariya karaməxəne nun Farisi muxune tinxinyaan na, ε mi soε Ariyanna Mangayani mumε!”

*Yesu a falana xələna fe yi*

<sup>21</sup> Yesu naxa, “E bata a mε a Ala bata yi a fala en benbane xa, a naxa, ‘I nama faxan ti. Naxan na muxun faxes, na kitima nεn.’\* <sup>22</sup> Koni n tan a falama ε xa iki, naxan na xələ a ngaxakedenna ma, na kitima nεn. Naxan na a ngaxakedenna konbi, kitisa yamaan na makitima nεn. Naxan na a fala fa fala, ‘I tan xaxilitarena,’ na kanna lan yahannama tεεn nin. <sup>23</sup> Nanara, i nεma i ya kiseen nalima Ala ma waxatin naxan yi saraxa ganden yεtagi, a na rabira i ma fa fala i ngaxakedenna xələxi i ma, <sup>24</sup> i ya kiseen lu saraxa ganden yεtagi singen. I siga xulεn, i sa ε nun i ngaxakedenna tagini tən. Na xanbi ra, i yi i ya kiseen fi Ala ma.”

<sup>25</sup> “Xa i yengεfaan sigama i ra i kitideni, ε nεma kira yi, i xa kata i na feen ɲan ε tagi sinma alogo a nama i so kitisaan yii. Na fan yi i so doma kanne yii. Ne fan yi i sa kasoon na. <sup>26</sup> N xa ɲəndin fala i xa, nayi, i mi keε na mumε, fə i yanginna birin fi!”

*Yesu a maxadina yalunyaana fe yi*

<sup>27</sup> Yesu naxa, “E bata yi a mε nun a Ala bata yi a fala, a naxa, ‘I nama yalunyaan liga.’† <sup>28</sup> Koni n tan a falama ε xa, naxan na ɲaxanla mato han a kunfa a ma, na kanna bata yelin yalunyaan ligε a bəɲeni. <sup>29</sup> Xa i yiifari ma yεεn nan i birε yulubini, a ba na, i yi a woli ayi. Amasətə i fatin yirena nde halagixin

---

\* **5:21:** Xəɾəyaan 20.13 e nun Sariyane 5.17 † **5:27:** Xəɾəyaan 20.14 e nun Sariyane 5.18

fisa dangu i gbindin birin soon na yahannama yi.  
<sup>30</sup> Xa i yiifari ma yiin nan i bire yulubini, a sege a ra, i yi a woli ayi. I yii kedenna segeixin fisa dangu i gbindin birin soon na yahannama yi.”

*Futu kala feen maxadina*

*Matiyu 19.9, Maraka 10.11-12, Luka 16.18*

<sup>31</sup> Yesu naxa, “E yi a falama nun, e naxa, ‘Naxan yo nema a naxanla bejinne, a xa futu kala kedin so a yii.’<sup>†</sup> <sup>32</sup> Koni n tan a falama iki, xa muxuna a naxanla bejin, naxanla mi yalunya ligaxi, a bata a naxanla ti yalunyaan ma nayi, § bayo xa xeme gbete a futu, na bata yalunyaan liga a xon ma.”

*Kolna fe maxadina*

<sup>33</sup> Yesu naxa, “E mon bata yi a me nun, a a fala nen en benbane xa, a i na i kol Marigini, fo i xa a rakamali.\* <sup>34</sup> Koni n na a falama e xa iki, e nama e kol ariyanna yi amasoto Ala mangaya gbeden menni.<sup>†</sup> <sup>35</sup> E nama e kol dununa ra amasoto Ala san tiden na a ra. E nama e kol Yerusalen taani amasoto Manga gbeena taan nan na ra. <sup>36</sup> E nama e kol e xunna ra amasoto hali e xun sexe kedenna, e mi ne a fore hanma e yi a fixa. <sup>37</sup> Koni i ya falan xa findi ‘On,’ hanma ‘En-en’ tun! Xa i nde sa na fari, na kelixi Fe Naxin Kanna nin.”

---

<sup>†</sup> **5:31:** Sariyane 24.1    § **5:32:** A bata a naxanla ti yalunyaan ma. Bayo a naxanla nan mon a ra Ala yee ra yi bayo a futun kala xun mi yi na Ala yee ra yi.    \* **5:33:** Saraxaraline 19.12 e nun Yatene 30.3 e nun Sariyane 23.22-24    † **5:34:** A mi kolna fe falama be lan wulen gbansanna ma. Koni hali jondin na a ra, Yesu naxa, i nama i kol. Xa muxun dari feen nan jondi falan na, muxune lama a falan na nen hali a mi a kol.

*I nama i gbeen ɲɔxɔ**Luka 6.29,30*

<sup>38</sup> Yesu naxa, “Ɛ bata yi a mɛ nun fa fala, ‘Yɛɛn ɲɔxɔn xa fi yɛɛn na, ɲinna ɲɔxɔn xa fi ɲinna ra.’<sup>†</sup>

<sup>39</sup> Koni n tan a falama iki, i nama i kankan muxu ɲaxin yɛɛ ra. Naxan na i dɛɛn fɔxɔ kedenna garin a ma, bode fɔxɔ fan ti a xa. <sup>40</sup> Xa muxuna nde waxi i kiti feni i ya doma bun birana fe ra, tin a xa i ya doma gbeen fan tongo. <sup>41</sup> Xa muxu yo i karahan i xa goronna maxali kilo kedenni, i tan xa a findi kilo firinna ra. <sup>42</sup> Naxan na i xandi seni, i xa na ki. Xa muxuna nde wa i doli feni sena nde yi, i nama tondi.”

*I yaxune xanu**Luka 6.27-28, 32-36*

<sup>43</sup> Yesu naxa, “Ɛ bata yi a mɛ nun fa fala, ‘I adamadi boden xanu, i yi i yaxune raɲaxu.’<sup>§</sup>

<sup>44</sup> Koni n tan a falama ɛ xa iki, ɛ xa ɛ yaxune xanu. Naxanye ɛ bɛsɛnɔnyama, ɛ xa Ala maxandi ne xa. <sup>45</sup> Nanara, ɛ ligama nɛn alo ɛ Fafe Ala naxan ariyanna yi. Amasɔtɔ a sogen natema muxu fajine nun muxu ɲaxine nan xa. Amasɔtɔ tinxin muxun nun tinxintarena, Ala tulen nafama ne birin xa. <sup>46</sup> Muxun naxanye bata ɛ xanu, xa ɛ ne nan tun xanu, ɛ barayin sɔtɔma nayi di? Hali mudu maxinle fan na ligama! <sup>47</sup> Xa ɛ ɛ ngaxakedenne nan tun xɔntɔn, ɛ nanfe ligaxi nayi naxan dangu bonne gbeen na? Amasɔtɔ hali dɛnkɛlyatarene na ɲɔxɔnna ligama. <sup>48</sup> Nanara, ɛ lu fɛtareyani alo fɛ mi ɛ Fafe Ala ra kii naxan yi naxan ariyanna yi.”

---

<sup>†</sup> **5:38:** Xɔrɔyaan 21.23-25 e nun Saraxaraline 24.19-20 e nun Sariyane 19.21    **§ 5:43:** Saraxaraline 19.18

## 6

### *Xaranna Ala kiseene fe ra*

<sup>1</sup> Yesu naxa, “Ɛ a liga ε yeren ma, ε nama ε wali fapine ke yamaan yeṭagi alogo e xa ε to. Xa ε na liga, ε mi barayi sɔtɔma ε Fafe Ala ra ariyanna yi. <sup>2</sup> Nanara, xa i yiigelitɔne kima, i nama xɔtaan fe i yeε ra a ralideni alo nafigine a ligama kii naxan yi salide banxine nun taa tagine yi alogo yamaan xa e matɔxɔ. N xa ɲɔndin fala ε xa, e bata yelin e saranna sɔte yamaan yii. <sup>3</sup> Koni xa i yiigelitɔne kima, hali i kɔmɛnna nama a kolon i yiifanna naxan ligama <sup>4</sup> alogo i ya hinan wanla xa raba suturani. Nayi, i Fafe Ala naxan i toma suturani, na i barayima nɛn.”

### *Xaranna Ala maxandin ma Luka 11.2-4*

<sup>5</sup> Yesu naxa, “Ɛ nɛma Ala maxandε, ε nama a liga alo nafigine. Amasɔtɔ a rafan e ma, e xa ti salide banxine nun taa tagine yi, e yi sali alogo yamaan xa e to. N xa ɲɔndin fala ε xa, e bata yelin e saranna sɔte yamaan yii. <sup>6</sup> Koni i tan nɛma Ala maxandε, so i ya banxini, i dɛɛn nagali, i yi i Fafe Ala maxandi i mi naxan toma. Nayi, i Fafe Ala naxan wundo yi feene toma, na i barayima nɛn.”

<sup>7</sup> Yesu naxa, “Ɛ nama lu xeṭe fala fuyanne ma tun Ala maxandini alo dɛnkɛleyatarene. Amasɔtɔ e mirima a ma fa fala e na falan nawuya ayi Ala e xuiin namɛma na nin. <sup>8</sup> Ɛ nama liga alo ne, bayo ε Fafe Ala ε makone kolon benun ε xa a maxandi. <sup>9</sup> Awa, ε Ala maxandima ikiini, ε naxa, ‘Nxu Fafe naxan kore xɔnna ma, i xinla xa sariɲan.



<sup>10</sup> I ya Mangayaan xa fa,  
i sagoon xa liga dunuɲa yi  
alo a ligama kore xonna ma kii naxan yi.

<sup>11</sup> I nxɔ to balon fi nxu ma.

<sup>12</sup> I nxu mafelu nxu yulubine ra,  
alo nxu fan nxu hake tongone mafeluma kii naxan  
yi.

<sup>13</sup> I nama tin nxu xa bira tantanni  
fɔ i nxu rakisi fe ɲaxin ma.’ ”

<sup>14</sup> “Amasɔtɔ xa ε ε hake tongone mafelu, ε Fafe  
naxan ariyanna yi, na fan ε mafeluma nɛn. <sup>15</sup> Koni  
xa ε mi ne mafelu e hake ne ra, ε Fafe Ala fan mi ε  
mafeluyε ε yulubine ra.”

### *Sun suxu feen xaranna*

<sup>16</sup> Yesu naxa, “E nɛma sunni, ε nama ε yetagini  
tɔɲɔn alo nafigine e yetagine yixidima kii naxan yi  
alogo yamaan xa a kolon a e sunni. N xa ɲɔndin  
fala ε xa, ne bata yelin e saranna sɔte yamaan yii.

<sup>17</sup> I tan nɛma sunna suxuma, i yetagin maxa, i yi i  
xunni tɔn <sup>18</sup> alogo yamaan nama a kolon fa fala i  
sunni fɔ i Fafe Ala i mi naxan toma, na a kolonma  
nɛn. I Fafe Ala naxan wundo feene toma, na i  
barayima nɛn.”

### *Ariyanna nafunla fe*

#### *Luka 12.33,34*

<sup>19</sup> Yesu naxa, “E nama ε nafunle ramara  
dunuɲani ito yi ε banxine kui, xɔrinxɔrinna nun  
melimɛnle a kalama dɛnaxan yi. Muɲadene fan  
soma nɛn, e yi a muɲa. <sup>20</sup> Koni ε xa nafunla  
ramara ariyanna yi, xɔrinxɔrinna nun melimɛnle  
mi a kale dɛnaxan yi, muɲadene fan mi soe na, e

a muƙa <sup>21</sup> bayo i ya nafunla deƙaxan yi, i xaxinla fan menna nin.”

*Fati benden gbee kenenna a fe*

*Luka 11.34-36*

<sup>22</sup> Yesu naxa, “Muxun yeen luxi nen alo lenpuna a fati benden xa.\* Xa i yeen kende, i fatin birin luma nen kenenni. <sup>23</sup> Koni xa i yeen kala, i fatin birin luma nen dimini. Nayi, kenenna naxan i yi, xa na bata findi dimin na, na dimin gboma ayi nen.”

*Ala nun nafunla fe*

*Luka 16.13, 12.22-31*

<sup>24</sup> Yesu naxa, “Muxu yo mi noe wale kari firinna xa sanja ma kedenni. Amasoto a kedenna rajaxuma nen, a kedenna xanu, hanma a kedenna binyama nen, a yi bonna rayelefu. E mi noe wanla ke Ala nun nafunla xa sanja ma kedenni.”

<sup>25</sup> “Nanara, n na a falama e xa, e nama kontofili e dunuƙa yi gidina fe ra, e naxan donma hanma e naxan minma hanma e e maxidima naxan yi. Niin mi dangu donseen na ba? Fati benden mi dangu dugin na ba? <sup>26</sup> E xoline mato, e mi se sima, e mi se xabama, donse ramarade mi e yii, koni e Fafe naxan ariyanna yi, na nan e baloma. E mi fisa xoline xa ba? <sup>27</sup> E tan nde noe waxatidi se e yete siine fari e xaminna ma ba? <sup>28</sup> E xaminma dugina fe ra nanfera? E wudi fuge fajine gbo kiin mato. E mi walima, e mi dugi rafalama e yete xa, <sup>29</sup> anu n xa a fala e xa, hali Manga Sulemani e nun a noron birin yi, a mi a yete maraberi ba alo e tan nde. <sup>30</sup> Ala

---

\* **6:22:** alo lenpuna: Sandani ito kui, i noe i yeen tiye nen se fajin na hanma a kobina. Xa i yeen tixi se fajin na, na findima nen kenenna ra i xa.

nan seƙene maraberi bama naxanye solima to, tila e gan, e ɗan fefe! A mi ε maraberi be dangun ne ra ba? E denƙeƙyaan xurun.”

<sup>31</sup> “Nanara, ε nama xamin fa fala, ‘En balon sɔtɔma di?’ hanma ‘En na igen sɔtɔma di?’ hanma ‘En dugin sɔtɔma di?’ <sup>32</sup> Amasɔtɔ denƙeƙyatarene seni itoe birin fenma. Koni ε Fafe naxan ariyanna yi, na ε makoon kolon. <sup>33</sup> Koni ε Alaa Mangayaan fen singen e nun a tinxinyana, na xanbi ra a seni itoe birin soma ε yii nen. <sup>34</sup> Nanara, ε nama xamin tila tɔrɔna fe ra. Tila xaminna tila nan ma. Amasɔtɔ lɔxɔn birin nun a tɔrɔn na a ra.”

## 7

### *Ɛ nama bonne yalagi*

#### *Luka 6.37-38, 41-42*

<sup>1</sup> Yesu naxa, “Ɛ nama ε yete findi ε adamadi boden keƙwanle makiti muxun na, alogo Ala nama ε fan makiti. <sup>2</sup> Bayo ε na bonne keƙwanle makiti kii naxan yi, Ala ε fan makitima na kii nin. Ɛ ligaseen naxan yateɓa bonne xa, Ala fan na nan yateɓa ε xa. <sup>3</sup> Nanfera ɗamadin naxan i adamadi boden yeen xɔn, i na toma, koni gbindonna naxan i tan yeen xɔn, i mi na toma? <sup>4</sup> I ya a falama i adamadi boden xa nanfera fa fala, ‘Tin, n xa ɗamadin ba i yeen xɔn ma,’ koni gbindonna i tan yeen xɔn ma. <sup>5</sup> I tan nafiɗina! Gbindonna ba i yete yeen xɔn ma singen, na xanbi ra, i nɔe na ɗamadin toe nen, i yi a ba i adamadi boden yeen xɔn ma.”

<sup>6</sup> “Ɛ nama se sariɗanxin sa barene bun.\* Ɛ nama ɛ boxo bun nafunla woli xosene bun ma.† Xa i na liga xosene e yibodonma nen, barene yi xaje ɛ ma, e yi ɛ xin.”

*Ala maxandina fe*

*Luka 11.9-13*

<sup>7</sup> “Ɛ seen maxodin, ɛ a sotoma nen. Ɛ seen fen, ɛ a toma nen. Ɛ deen konkon, a rabima ɛ xa nen. <sup>8</sup> Amasoto naxan yo na seen maxodin, na a sotoma nen. Naxan na seen fen, na a toma nen. Naxan na deen konkon, a rabima a xa nen. <sup>9</sup> Muxuna nde ɛ ye ba, naxan ma diin burun maxodinma a ra, a gemen so a yii? <sup>10</sup> Hanma a na yexen maxodin a ra, a sariɗin so a yii? <sup>11</sup> Hali ɛ to findixi muxu jaxine ra, ɛ a kolon fa fala a lan nen, ɛ xa se fariɗin so ɛ diine yii. E faxi fa, ɛ Fafe naxan ariyanna yi, na se fariɗine soma a maxandi muxune yii kii naxan yi!”

<sup>12</sup> “Sariya Kitabun nun nabine kitabune birin bunna nan ito ra: I waxi muxune xa feen naxanye raba i xa, na joxonna liga bonne xa.”

*De xurina fe*

*Luka 13.24*

<sup>13</sup> “Ɛ so de xurin na, amasoto kiraan naxan sigama yahannama yi, na ragbo, a so deen nagbo. Muxu wuyaxi soma nen menni. <sup>14</sup> Kiraan naxan sigama habadan nii rakisini, na yisiga raxolo, a deen mi ragbo, muxu wuyaxi mi a toma.”

---

\* **7:6:** barene: Yanyina nde, sandani ito bunna neen, fa fala i lan i xa muxune kawandi naxanye noe e tuli matiye i ra. † **7:6:** boxo bun nafunla: Gemen siyana nde nan ma fe falaxi be naxan toma foxo ige yi xaxunna ndee kui. Na gemen xili nen “perili.”

### *Wudin nun a bogina fe*

#### *Luka 6.43-44*

<sup>15</sup> “Ɛ a liga ε yeren ma wule nabine fe yi. E ne ma fama e xuruxi alo γεξεενα, koni e kui feen luxi nen alo kanko xape ne. <sup>16</sup> Ɛ ne kolonma e kewanle nan xon. I manpa bogin bolonpe tansinna ke ra ba? I xode bogin bolonpe wudi majalixin ke ra ba? <sup>17</sup> Wudi fadin bogi fadin nan tima. Wudi jaxin bogi jaxin nan tima. † <sup>18</sup> Wudi fadin mi bogi jaxin tima. Wudi jaxin mi bogi fadin tima. <sup>19</sup> Wudin naxan mi bogi fadin tima, na sege ma nen, a gan. <sup>20</sup> Nba, ε wule nabine kolonma e kewanle xon ma na kii nin.”

### *Ala xuiin suxutare muxune fe*

#### *Luka 13.25-27*

<sup>21</sup> “Muxun naxanye a falama, e naxa, ‘Marigina, Marigina!’ ne birin mi soma Ariyanna Mangayani fo naxanye n Fafe Ala sagoon ligama. <sup>22</sup> Nanara, na loxon § na a li, muxu wuyaxi a falama nen, e naxa, ‘Marigina, Marigina! Nxu bata yi nabiya falane ti i xinli nun, nxu jinanne kedi i xinli, nxu kabanako fe wuyaxi liga i xinli!’ <sup>23</sup> Nba, n na a falama e xa nen, n naxa, ‘N mi ε kolon mumε! Ɛ tan fe jaxi rabane, ε keli n fema!’ ”

### *Banxi ti firinne fe*

#### *Luka 6.47-49*

<sup>24</sup> “Awa, muxun naxan birin n ma falane ramεma, e yi e suxu, ne luxi nen alo xεmε xaxili-maan naxan a banxin ti fanyen fari. <sup>25</sup> Tulen fa

---

† **7:17:** bogina: Sanda sifani ito kui, bogi fadin findixi kewali fadin nan na. § **7:22:** Na loxon noε finde kitisa loxon nan na waxati rananni.

waxatin naxan yi, xudene yi rafe, foye gbeen yi fa. Koni na banxin mi bira bayo a yi tixi fanyen nan fari. <sup>26</sup> Muxun naxanye birin n ma falane ramema koni e mi e suxuma, ne luxi nen alo xaxilitaren naxan a banxin ti meɲensinna fari. <sup>27</sup> Tulen faxina, xudene yi rafe, foye gbeen yi fa, banxin yi bira kii ɲaxini!”

### *Yesu senbena fe*

<sup>28</sup> Yesu yelinxina falane birin tiye, yamaan yi kabε a xaran ti kiin ma. <sup>29</sup> A tan mi luxi alo e sariya karamoxone kii naxan yi, Yesu yi xaranna tima Ala senben nin.

## 8

### *Yesu yi dogonfontɔɔn nakendeya Maraka 1.40-45, Luka 5.12-16*

<sup>1</sup> Yesu yi godo keli geyaan ma, yama gbeen yi biraxi a fɔxɔ ra. <sup>2</sup> Awa, dogonfontɔɔn yi fa a fema, a yi a xinbi sin a bun ma, a naxa, “N kanna, xa i tin, i nɔε n nakendeya nen.” <sup>3</sup> Yesu yi a yiin sa a ma, a yi a yabi, a naxa, “N bata tin, i xa kendeya.” Dogonfontɔɔn yi kendeya mafuren. <sup>4</sup> Na xanbi ra, Yesu yi a fala a xa, a naxa, “I nama a fala muxu yo xa, koni siga saraxaraliin fema, a xa sa i mato. Na

xanbi ra, Musaa sariyan saraxan naxan yamarixi, i na ba. Na findε nen sereyaan na e xa.”\*

*Sofa kuntigina walikεen nakendeya fena*

*Luka 7.1-10*

<sup>5</sup> Yesu so Kapεrunan taani waxatin naxan yi, Romi sofaan kemε kuntigin yi fa a fema, a yi a mafan, a naxa, <sup>6</sup> “N fafe, n ma walikεen furaxina n konni, hali a mi nεε a mamaxε. A tɔrɔxi kati!” <sup>7</sup> Yesu yi a yabi, a naxa, “N xa sa a rakendeya.” <sup>8</sup> Kuntigin yi a yabi, a naxa, “N fafe, na binyen mi lan n ma, i siga n konni. Falan ti tun, n ma walikεen kendeyama nen. <sup>9</sup> N fan kuntigina nde nan ma nɔ bun, sofane n fan bun. N na a falε na ndee xa nen, n naxa, ‘Siga,’ a siga. N yi a fala nde gbete xa, n naxa, ‘Fa,’ a fa. N yi a fala n ma konyin xa, n naxa, ‘Ito liga,’ a na liga.”†

<sup>10</sup> Yesu na mε waxatin naxan yi, a kabε. Muxun naxanye yi biraxi a fɔxɔ ra, a yi a fala ne xa, a naxa, “N xa nɔndin fala ε xa, n munma denkeleyaan sifani ito to Isirayila muxu yo yi. <sup>11</sup> N xa a fala ε xa, muxu wuyaxi fama nen sa keli sogeteden

---

\* **8:4:** dogonfontɔna: Alaa sariyan kui, dogonfontɔn mi yi daxa a xa so taani. A yi luma taan fari ma nen. Saraxaraline nan yi muxun fatin matoma a yi a fala, xa na kanna sarijan, hanma xa a mi sarijan. Muxu gbete mi yi a yiin dinjε dogonfontɔn na, bayo na yi na kanna sarijanna kalama nen. A mato Saraxaraline 13.45-46. Xa dogonfonna na ba muxun ma, fɔ a xa saraxan ba alogo a mɔn xa sarijan kii naxan yi, a fa so taani, a dɔxɔ a konni. A mato Saraxaraline sora 14. † **8:9:** Xemeni ito yi laxi a ra fa fala senben Yesu yii daala xun na alo senbena a tan sofa kuntigin yii a sofane xun na kii naxan yi. Xemen misaala nan tongoxi a yetε dunuja yi gidin kiin ma alogo a xa a yita fa fala Yesu yi nεε a walikεen nakendeye nen a senben na hali a gbindin mi siga.

nun sogegodode binni, e yi fa dɔxɔ Iburahima nun Isiyaga nun Yaxuba fɛma Ariyanna Mangayani. †  
 12 Koni naxanye yi lan nun e xa so Ariyanna Mangayani, § ne raminima nɛn tanden ma dimini, wugan nun jin naxinna dɛnaxan yi.” 13 Yesu yi a fala kuntigin xa, a naxa, “Siga, a ligama i xa nɛn alo i dɛnkɛɛyaxi a ma kii naxan yi.” Kuntigina walikɛɛn yi kɛndɛya na waxatin yɛtɛni.

*Yesu yi muxu wuyaxi rakɛndɛya*

*Maraka 1.29-34, Luka 4.38-41*

14 Yesu yi siga Piyɛri\* konni, a yi a bitan gilɛn furaxin li saxi a konni a fatin wolonxi a ma. 15 Yesu yi jaxanla yiin suxu, fati mawolonna yi a bɛjin, a keli, a ti, a wali fɔlɔ a xa.

16 Ninbanna soxina, yamaan yi fa muxu wuyaxi ra Yesu fɛma yinna jaxine yi naxanye fɔxɔ ra. Yesu yi yinnane kedi a falan xɔn, a furetɔne birin nakɛndɛya. 17 A na liga nɛn, alogo Nabi Esayi naxan fala, a na xa kamali, a naxa, “A en ma tɔrɔne nan tongoxi, en ma furene nan yi a fari.” †

*Birana Yesu fɔxɔ ra*

*Luka 9.57-62*

18 Yesu to yama gbeen to a rabilinni, a yi a fala a xarandiine xa, a e xa gidi daraan bode fɔxɔn na. 19 Sariya karamɔxɔna nde yi fa a fɛma, a naxa, “Karamɔxɔ, i siga dɛdɛ, n sigɛ i fɔxɔ ra.” 20 Yesu yi a yabi, a naxa, “Xulumaseene xima yinle nan

† **8:11:** A bunna nɛɛn fa fala siya gbɛtɛne fan kisin sɔtɔma nɛn hali ba Yahudiyane ra. § **8:12:** Yanyina nde, na lanxi Isirayila kaane

nan ma. \* **8:14:** Muxune mɔn Piyɛri ma a Pita. † **8:17:** Esayi 53.4



na, xoline yi e tæen sa, koni hali n na n xunna sama dænaxan yi, na mi n tan Muxuna Dii Xemen yii.” <sup>21</sup> A fəxərabirana nde yi a fala a xa, a naxa, “N Marigina, tin n xa sa n fafe maluxun singen.” <sup>22</sup> Yesu yi a yabi, a naxa, “Bira n fəxə ra, a lu faxa muxune xa faxa muxune maluxun.” †

*Yesu yi foye gbeen nati*

*Maraka 4.35-41, Luka 8.22-25*

<sup>23</sup> Yesu yi dəxə kunkin kui, a xarandiine yi siga a fəxə ra. <sup>24</sup> E daraan xun ma, foye gbeen yi keli, a igeni maxa. Igen mərənne§ yi sa kunkin xun ma. Koni Yesu yi xima. <sup>25</sup> Xarandiine yi siga a fəma, e yi a raxulun. E yi a fala, e naxa, “Marigina, nxu rakisi, nxu faxamaan ni i ra.” <sup>26</sup> Yesu yi e yabi, a naxa, “E gaxuma nanfera? E dənkeləyaan mi gbo mumə!” Na xanbi ra, a keli, a foyen nun ige mərənne yamari, e yi e raxara. <sup>27</sup> Muxune birin yi kabə, e naxa, “Muxu sifan mundun ito ra? Hali foyen nun igen mərənne a falan suxuma!”

*Yesu yi muxu firin nakəndəya yinnane naxan fəxə ra*

*Maraka 5.1-20, Luka 8.26-39*

<sup>28</sup> Yesu yi siga Gadara yamanani daraan bode fəxən na. Muxu firin yi a li na yi naxanye yi kelixi bilingan yireni, yinna naxine yi e fəxə ra. E yi xajə kati! Muxu yo mi yi susə sigan tiyə na kiraan xən. <sup>29</sup> Yinnane yi e rasənxə e falan ti e xən, e naxa, “Alaa Dii Xeməna, i nanse fenma nxu fəma? I faxi nxu naxankataden nin ba benun waxatin xa

---

† **8:22:** A muxune nan ma naxanye mi biraxi a fəxə ra naxanye mi nii rakisin sətəxi. Ne luxi alo faxa muxune niin mabinni. § **8:24:** Igen mərənne: alo foyen na so igeni.

a li?” <sup>30</sup> Xɔsɛ kuru gbeen yi e dɛgema na dɛxɔn ma nun. <sup>31</sup> Yinnane yi Yesu mafan, e naxa, “Xa i nxu kedima, nxu rasiga xɔsɛ kuruni ito yi.” <sup>32</sup> Yesu yi a fala e xa, a naxa, “Ɛ siga.” Nayi, e sa so na xɔsɛ kuruni. Xɔsɛ kurun yi godɔ e giyɛ geyaan ma, e sa faxa darani. <sup>33</sup> Muxun naxanye yi xɔsɛne kantanma, ne yi e gi, e siga taani. E sa na feene birin fala e nun feen naxan ligaxi na muxune xa yinna ɲaxine yi naxanye fɔxɔ ra. <sup>34</sup> Na ma, taa yi kaane birin yi sa Yesu ralan. E a to waxatin naxan yi, e yi a mafan, a xa keli e yamanani.

## 9

*Yesu yi lɛbutɛnna rakɛndɛya*

*Maraka 2.1-12, Luka 5.17-26*

<sup>1</sup> Yesu yi dɔxɔ kunkin kui, a darani gidi, a siga a kon taani. <sup>2</sup> Muxuna ndee yi fa xɛmɛ lɛbutɛnna nde ra a fɛma, a saxi a sa seni e yii. Yesu yi e dɛnkɛlɛyaan to, a yi a fala lɛbutɛnna xa, a naxa, “N ma diina, i bɔɲɛn xa sa, i yulubine bata xafari.” <sup>3</sup> Sariya karamɔxɔna ndee yi e miri, e naxa, “Xɛmɛni ito Ala rayelefuma!”\* <sup>4</sup> Yesu yi e miriyaan kolon. A yi a fala, a naxa, “Ɛ mirima fe ɲaxi sifani itoe ma nanfera? <sup>5</sup> Mundun fala raxɔlɔ, ‘I yulubine bata xafari’ hanma, ‘Keli, i sigan ti?’ <sup>6</sup> N na a yitama ɛ ra nɛn nayi fa fala sɛnbɛna n tan Muxuna Dii Xɛmɛn yii dunuɲa yi, n muxune mafelu e yulubine ra.” A yi a fala lɛbutɛnna xa, a naxa, “Keli, i ya sa seen tongo, i siga i konni!”

---

\* **9:3:** Ala rayelefuna: Karamɔxɔne na falaxi nɛn bayo Yesu bata falan ti alo Ala nan yi a tan na, a naxa, “i yulubine bata xafari” anu, Ala nan yulubine xafarima.

<sup>7</sup> Χεμεν yi keli, a siga a konni. <sup>8</sup> Yamaan to na to, e gaxu, e yi Ala tantun amasɔtɔ a bata na senbe sifan fi muxune ma.

*Yesu yi Matiyu xili*

*Maraka 2.13-17, Luka 5.27-32*

<sup>9</sup> Yesu yi keli, a siga. A yi mudu maxinla nde to, a yi xili Matiyu, a yi dɔxi mudu maxilideni. Yesu yi a fala a xa, a naxa, “Bira n fɔxɔ ra.” Matiyu yi keli, a bira a fɔxɔ ra.

<sup>10</sup> Yesu yi a dɛgema Matiyu a banxini waxatin naxan yi, mudu maxili wuyaxi nun hake kan wuyaxi yi fa, e dɔxɔ Yesu nun a xarandiine fema e dɛgedeni. <sup>11</sup> Farisi muxuna ndee na to waxatin naxan yi, e yi a fala a xarandiine xa, e naxa, “Ɛ karamɔxɔn nun mudu maxinle nun hake kanne e dɛgema e bode xɔn ma nanfera?” <sup>12</sup> Yesu yi e xuiin me, a yi e yabi, a naxa, “Muxun naxan kendɛ, na mako mi seribaan ma fɔ furetɔne. <sup>13</sup> Ɛ siga, ɛ sa Kitabuna falani ito bunna fɛsɛfɛsɛ, a naxa, ‘Hinanna rafan n ma dangu saraxan na.’† Amasɔtɔ n mi faxi tinxin muxune xan xilideyi fɔ hake kanne.”

*Maxɔdinna sun suxu feen ma*

*Maraka 2.18-22, Luka 5.33-39*

<sup>14</sup> Yoni a xarandiine yi fa Yesu fema, e yi a maxɔdin, e naxa, “Nxu tan nun Farisi muxune sunna suxuma, koni nanfera i ya xarandiine mi sunna suxuma?” <sup>15</sup> Yesu yi e yabi, a naxa,

---

† **9:13:** Hose 6.6

“Naxalandi kannna nɛma ɲaxalandi tiine fɛma waxatin naxan yi, e lan e xa sunu ba?† Koni waxatina nde fama ɲaxalandi kannna bama nɛn e yɛ, e sunna suxuma nɛn na yi. <sup>16</sup> Muxu yo mi nɔɛ dugi nɛnɛn tongɛ a yi dugi fonna bɛtɛrɛn a ra§ amasɔtɔ a dugi nɛnɛn bɔma nɛn a fonna ra, a yinla yi ragbo ayi. <sup>17</sup> Muxun mi manpa nɛnɛn sɛ se sase fonna kui. Xa a na liga, manpa nɛnɛn se sase fonna kalama nɛn, manpaan yi bɔxɔn, se sase fonna yi kala. Koni manpa nɛnɛn sama se sase nɛnɛn nan kui, e firinna birin namarama nɛn nayi ki fajni.”

*Yesu yi muxu firin nakɛndɛya*

*Maraka 5.21-43, Luka 8.40-56*

<sup>18</sup> Yesu yi na falama e xa waxatin naxan yi, Yahudiya kuntigina nde yi fa a xinbi sin Yesu bun, a naxa, “N ma dii tɛmɛn bata faxa iki sa! Koni fa i yiin sa a ma, a niin birama a yi nɛn na yi.”

<sup>19</sup> Na ma, Yesu yi keli, a bira a fɔxɔ ra, e nun a xarandiine.

<sup>20</sup> Naxanla nde yi na yi, ɲaxalan furen yi a ma xabu ɲɛɛ fu nun firin. Na yi fa Yesu xanbi ra, a yi a yiin din a doamaan lenben na. <sup>21</sup> Bayo a yi a mirixi a ma, a naxa, “Xa n na n yiin din a doamaan na tun, n kɛndɛyama nɛn na yi.” <sup>22</sup> Yesu yi a firifiri, a yi a to, a yi a fala a xa, a naxa, “N ma dii tɛmɛna, i bɔɲɛn xa sa, i ya dɛnkɛleyaan bata i rakɛndɛya.” Naxanla yi kɛndɛya na waxatin yɛtɛni!

---

† **9:15:** Naxalandi kannna: Yesu nan luxi alo ɲaxalandi kannna sandani ito kui. A bunna nɛn, fa fala muxune mi sunna suxuma sɛwa waxatine yi. § **9:16:** dugi nɛnɛna: Yesu a sariya nɛnɛn mi sɛ Musaa sariya fonna ma. Sariya fonna mɔn mi sɛ sariya nɛnɛn ma.

<sup>23</sup> Awa, Yesu yi so kuntigina banxini, a xulen fene to e nun yamaan naxan yi wugama, <sup>24</sup> a naxa, “E mini! Dii tɛmɛni ito mi faxaxi, a xiin nɛn tun!” E birin yi gele a ma. <sup>25</sup> E to yamaan namini, Yesu yi so, a dii tɛmɛn suxu a yiin ma, dii tɛmɛn yi keli. <sup>26</sup> Muxune yi na feen xibarun mɛ na yamanan yiren birin yi.

### *Yesu yi danxutɔ firin nakɛndɛya*

<sup>27</sup> Yesu keli mɛnni waxatin naxan yi, danxutɔ firin yi bira a fɔxɔ ra. E gbelegbele a fɔxɔ ra, e naxa, “Dawudaa Dii Xɛmɛna,\* kininkinin nxu ma!” <sup>28</sup> Yesu so banxini waxatin naxan yi, danxutɔ firin yi so a fɛma banxin kui. A yi e maxɔdin, a naxa, “E laxi a ra yati fa fala a n nɔɛ ito ligɛ nɛn ba?” E yi a yabi, e naxa, “Ɔn, nxu fafe.” <sup>29</sup> Yesu yi a yiin din e yɛɛne ra. A yi a fala, a naxa, “A xa liga ɛ xa alo ɛ dɛnkeɛyaxi a ma kii naxan yi.” <sup>30</sup> E yɛɛne yi raba ayi. Yesu yi falan ti e xa a sɔbɛɛn na, a naxa, “Muxu yo nama feni ito kolon!” <sup>31</sup> Koni e yi siga, e sa Yesu a fe xibarun nali na yamanan yiren birin yi.

### *Yesu yi bobon nakɛndɛya*

<sup>32</sup> Awa, na xɛmɛne yi sigama waxatin naxan yi, muxuna ndee yi fa xɛmɛna nde ra Yesu fɛma naxan mi yi nɔɛ falan tiyɛ amasɔtɔ yinna jaxin nan yi a fɔxɔ ra. <sup>33</sup> Yesu yinnan kedi waxatin naxan yi, bobon yi falan ti fɔlɔ! Yamaan yi kabɛ, e naxa, “Ito jɔxɔnna munma to Isirayila muxune yɛ singen!” <sup>34</sup> Koni Farisi muxune yi a fala, e naxa, “Yinna mangan nan sɛnben fixi a ma a yinnane kedi.”

---

\* **9:27:** Dawudaa Dii Xɛmɛna: E na falaxi nɛn bayo Yesu findixi Dawuda bɔnsɔnna muxuna nde nan na.

### *Yesu yi kininkinin yamaan ma*

<sup>35</sup> Awa, Yesu yi siga taane nun banxidene yi, a sa yamaan xaran e salide banxine yi. A yi Ariyanna Mangayana fe Xibaru Faɓin kawandin ba e xa, a yi muxune rakendeya furen sifan birin ma. <sup>36</sup> A yamaan toxi waxatin naxan yi, a yi kininkinin e ma, amasoto e xaminxi, e mali muxu mi yi na yi alo yexeen naxanye kantan muxu mi na. <sup>37</sup> Nanara, Yesu yi sandan sa a xarandiine xa, a naxa, “Malo xaba daxin gbo koni a xaba muxune mi wuya. <sup>38</sup> E xee kanna mafan, a xa walikena ndee rasiga malo xabadeni.”†

## 10

### *Xera fu nun firinne fe*

#### *Maraka 3.13-19, Luka 6.12-16*

<sup>1</sup> Yesu yi a xarandii fu nun firinne xili. A senben fi e ma a e xa yinna jaxine kedi, e man yi furetɔn sifan birin nakendeya. <sup>2</sup> Na xera fu nun firinne xinle nan itoe ra.

A folɔna, Simɔn, naxan man yi xili “Piyeri,” e nun a ngaxakedenna Andire nun Sebede a dii xemen Yaki nun a xunyen Yoni <sup>3</sup> nun Filipi nun Barotolome nun Tomasi nun mudu maxinla Matiyu, e nun Alifaa dii xemen Yaki nun Tade <sup>4</sup> nun Simɔn, e naxan ma a “Yahudiya siya xanuna,”\* e nun Yudasi Isakariyoti naxan Yesu yanfa, a a so yiini.

---

† **9:38:** xee kanna: Sandani ito kui, xee kanna findixi Ala nan na. Denkeleya muxune lan e xa muxune soto Ala xa alo malo xabane maala malanma kii naxan yi. \* **10:4:** Yahudiya siya xanuna: Muxun nan yi ne ra naxanye yi Romi kaane yengema alogo Isirayila kaane xa mini e senben bun ma.

*Xera fu nun firinne xe fena  
Maraka 6.7-13, Luka 9.1-6*

<sup>5</sup> Yesu yi yamarine fi muxu fu nun firinni itoe ma, a naxa, “E nama siga siya gbetene yamanani hanma Samariya taane yi. <sup>6</sup> Koni ε siga Isirayila muxune fema naxanye loxi ayi alo yexεene. <sup>7</sup> E siga, ε sa e kawandi, ε naxa, ‘Ariyanna Mangayaan bata maso.’ <sup>8</sup> E yi furetone rakendeya, ε faxa muxune rakeli sayani, ε dogonfontone rakendeya, ε jinanne kedi. E seen naxanye sotoxi ε mi ne saraxi, nayi ε bonne ki hali ε mi se rasuxu. <sup>9</sup> E nama xema xali, hanma gbeti fixena hanma wure gbeeli gbananne, ε naxanye singanma ε tagixidin na, <sup>10</sup> hanma bondunla ε sigatini, hanma doma firin, hanma sankidina, hanma dunganna. Amasoto walikεen lan a yi a balon soto.”

<sup>11</sup> “Awa, ε na taan li hanma banxidena, ε muxu kendena nde fen, ε yi yigiya a konni han ε kelin waxatin naxan yi. <sup>12</sup> E na so banxini, ε naxa, ‘Ala xa bope xunbenla lu banxini ito kui.’ <sup>13</sup> Xa na falan lanxi na banxi kui kaane ma, na duban xa lu e xon. Koni xa na mi a ra, na duban mon xa xete ε ma. <sup>14</sup> Xa muxune mi ε yisuxu, e mi e tuli mati ε falane ra banxina nde yi hanma taana nde yi, ε sanne rakunkun, ε kenla.† <sup>15</sup> N xa jondin fala ε xa, kiti sa loxon, Ala kininkinima nen Sodoma taan nun Gomora taan‡ ma dangu na taan na!”

---

† **10:14:** E sanne rakunkun feen findixi taxamasenna nan na naxan a yitama fa fala na taan goron yo mi luxi e xun ma hali e gbangbanna mi luxi e sanna ra. ‡ **10:15:** Sodoma nun Gomora findi taa jaxine nan na Ala naxanye halagi Ibrahima waxatini. A mato Dunuƚa Folon sora 19 kui.

*BεSENXɔnyaan naxan fama  
Maraka 13.9-13, Luka 21.12-17*

<sup>16</sup> Yesu naxa, “Ɛ tuli mati, n bata ε xε alo yεxεene kankone tagi. Nayi, ε kɔta ayi alo sɔɔine, ε findi sɔntarene ra alo ganbane. <sup>17</sup> Ɛ a liga ε yeren ma amasɔtɔ muxune ε suxuma nɛn, e siga ε ra e taan fonne fɛma ε makitideni, e yi ε bɔnbɔ e salide banxine yi. <sup>18</sup> E sigama ε ra nɛn mangane nun kuntigine fɛma n tan ma fe ra, ε yi findi n serene ra e xa e nun siya gbɛtɛne xa. <sup>19</sup> E na ε suxu waxatin naxan yi, ε naxan falama ε nama xamin na fe ra. A waxatin na a li, ε naxan falama Ala na fima ε ma nɛn. <sup>20</sup> Amasɔtɔ a mi findima ε tan ma fala ra. Ɛ falan tima ε Fafe Alaa Nii Sariɔanxin nan xɔn.”

<sup>21</sup> “Muxune e ngaxakedenne yanfama nɛn, e yi faxa, fafane fan na ligama nɛn e diine ra. Diine fan murutɛma nɛn e sɔtɔ muxune xili ma, e yi findi e faxa sabun na. <sup>22</sup> Muxune birin ε raɔaxuma nɛn n tan ma fe ra. Koni naxan na a yixɔdɔxɔ han a raɔanna, na kisima nɛn. <sup>23</sup> E na ε bεSENXɔnya taana nde yi, ε ε gi mɛnni, ε siga yire gbɛtɛ yi. N xa ɔɔndin fala ε xa, ε mi ε wanla raɔanɔɔ Isirayila taane birin yi benun n tan Muxuna Dii Xɛmɛn xa fa.”

<sup>24</sup> “Xarandiin mi dangu a karamɔxɔn na, konyin mi dangu a kanna ra. <sup>25</sup> Xarandiin na liga alo a karamɔxɔna, na bata lan. Konyin fan xa liga alo a kanna. Xa e bata denbaya kanna xili ba yinna mangan Belɛsɛbu, e nde falama nɛn denbayaan fan ma dangu na ra!”

*Ala yεragaxuna fe  
Luka 12.2-7*



<sup>26</sup> Yesu naxa, “Na ma, ε nama gaxu yamaan yεε ra. Fe luxunxine minima nen kenenni, wundo feen birin kolonma nen. <sup>27</sup> N naxan falama ε xa dimini, ε na fala kenenna ma. N na naxan kəyəkəyεn ε xa, ε na rawanga banxine xuntagi. <sup>28</sup> Muxun naxanye fati benden faxama, koni e mi nɔε ε niin halagε, ε nama gaxu ne yεε ra. Koni ε gaxu Ala yεε ra naxan fati benden nun niin halagima yahannama yi. <sup>29</sup> Xɔlidi firin mi sare gbanan firinna ra ba? Koni hali na xɔlidi keden pe mi birε bɔxɔni xa i Fafe Ala mi tin. <sup>30</sup> Hali ε xun sεxε keden kedenne, Ala e birin xasabin kolon. <sup>31</sup> Nanara, ε nama gaxu, ε tan fisa xɔlidi wuyaxi xa!”

*I ti Yesu a fe ra yamaan yetagi*

*Luka 12.8-9*

<sup>32</sup> Yesu naxa, “Naxan yo na a ti n ma fe ra yamaan yetagi, n fan na jɔxɔnna ligama a xa nen n Fafe Ala yetagi ariyanna yi. <sup>33</sup> Koni naxan yo na a mε n na yamaan yetagi, n tan fan n mεma a ra nen n Fafe Ala yetagi ariyanna yi.”

*Bɔjε xunbenla mi a ra dunuɲa yi*

*Luka 12.51-53, 14.26-27*

<sup>34</sup> Yesu naxa, “E nama ε miri fa fala n faxi bɔjε xunbenla nan na dunuɲa yi. N mi faxi bɔjε xunbenla xan na koni fɔ silanfanna. § <sup>35</sup> N bata fa alogo dii xεmεne xa keli e fafane xili ma, dii tεmεne yi keli e ngane xili ma, jaxanle fan yi keli e mamene xili ma. <sup>36</sup> Muxune yaxune kelima e denbayane yetεen nin. <sup>37</sup> Naxan yo a nga hanma a fafe xanu dangu n tan na, na kanna mi finde n gbeen na.

---

§ **10:34:** Silanfanna: Sofane yengεso dege mana.

Naxan yo a dii xεmεna hanma a dii tεmεn xanu dangu n tan na, na kanna mi finde n gbeen na. <sup>38</sup> Naxan mi a faxa wudin\* tongoma, a bira n fɔxɔ ra, na kanna mi finde n gbeen na. <sup>39</sup> Naxan na a niin makantan, na bɔnɔma ayi nεn. Koni naxan na bɔnɔ a niini n ma fe ra, na kisima nεn.”

*Barayina fe  
Maraka 9.41*

<sup>40</sup> Yesu naxa, “Naxan na ε tan yisuxu, na bata n fan yisuxu. Naxan na n tan yisuxu, na bata na kanni suxu naxan n xεxi. <sup>41</sup> Naxan na Alaa xεrana nde yisuxu bayo Alaa xεraan to a ra, na kanna barayin sɔtɔma nεn naxan nagidixi Alaa xεrane ma. Naxan na tinxin muxuni suxu bayo a tinxin, na kanna barayin sɔtɔma nεn naxan nagidixi tinxin muxune ma. <sup>42</sup> N xa jɔndin fala ε xa, naxan na ige xunbenla gbansanna fi muxudina nde ma bayo n fɔxɔrabirana nde to a ra, na mi fulama a barayin na.”

## 11

*Yoni Marafu Tiina xεrane  
Luka 7.18-35*

<sup>1</sup> Yesu yelin yamarine fiyε a xarandii fu nun firinne ma waxatin naxan yi, a yi siga xaran tideni e nun kawandi badeni Galile yamanan taane yi.

<sup>2</sup> Yoni yi Alaa Muxu Sugandixina wanle fe mε kasoon na, a yi a xarandiina ndee rasiga a fεma.

<sup>3</sup> E xa sa Yesu maxɔdin, e naxa, “Yoni yi naxan ma

---

\* **10:38:** Romi kaane yi muxune gbangbanma wudin nan ma, e yi e faxa. Ito bunna nεεn, fa fala fɔ Yesu a xarandiine xa e wεkile sayaan na Yesu fɔxɔ ra.

fa fe falama, na nan i tan na ba, hanma nxu lan nxu xa muxu gbete nan legeden?” <sup>4</sup> Yesu yi e yabi, a naxa, “E naxan mema, e yi a to, e sa na fala Yoni xa. <sup>5</sup> Danxutone seen toma, lebutenne sigan tima, dogonfontone kendeyaan sotoma, tuli xorine falan mema, faxa muxune kelima sayani, n ma falan Xibaru Fajin nalima yiigelitone ma. <sup>6</sup> Sewan na kanna xa naxan mi birama tantanni n ma fe yi!”

<sup>7</sup> Yoni a xarandiine yi sigama waxatin naxan yi, Yesu yi Yoni a fe fala folo yamaan xa, a naxa, “E siga nanse matodeyi tonbonni? Foyen sexe ramaxan ba? <sup>8</sup> Xa na mi yi a ra, e siga nanse matodeyi? Xemen naxan maraberi baxi dugi fajin na ba? Koni muxun naxanye maraberi baxi na kiini, ne manga banxine nin! <sup>9</sup> Nayi, e siga nanse matodeyi, nabiin ba? N xa a fala e xa, e bata nde to naxan gbo nabiin xa. <sup>10</sup> Amasoto Kitabun bata Yoni a fe fala, a naxa, ‘N nan n ma xeraan nasigama i yee ra, naxan kirani tonma i xa.’\* <sup>11</sup> N xa jondin fala e xa, muxun naxanye birin folo bari, Yoni gbo ne birin xa. Koni naxan xurun e birin xa Ariyanna Mangayani, na gbo Yoni xa. <sup>12</sup> Folo Yoni a waxatin ma han iki, e bata Ariyanna Mangayaan jaxankata. Gbalotone kataxi e xa a suxu. <sup>13</sup> Nabine kitabune nun Sariya Kitabun bata nabiya falane ti fa han fa dexo Yoni a waxatin na. <sup>14</sup> Xa e tinje a feen me, e a kolonma nen, Yoni nan Nabi Eli ra naxan yi daxa a xa fa.† <sup>15</sup> Awa, xa tunla naxan xon, na xa a tuli mati!”

---

\* **11:10:** Malaki 3.1. † **11:14:** Nabi Eli a fe seboxi Malaki 3.23 kui. Sariya karamoxone yi laxi a ra a Nabi Malaki bata a fala a Nabi Eli mon fama nen benun Alaa Muxu Sugandixin xa fa. Yoni Marafu Tiin nan na nabiya falan nakamali.

16 “Awa, n to muxune misalε nanse ra iki? E luxi nεn alo diidin naxanye sabaan soma lɔxɔ tideni e yi e xui ramini bonne ma, 17 e naxa, ‘Nxu bata xulenna fe ε xa koni ε mi ε bodon. Nxu bata binbi wuga sigin sa koni ε mi wuga!’ 18 Yoni fa nεn a mi donse don, a mi a min, bayo a yi sunni waxatin birin, e birin yi a fala, e naxa, ‘Ninanna nan a fɔxɔ ra!’ 19 N tan Muxuna Dii Xεmεn yi fa, n donseen don, n yi n min, e birin yi a fala, e naxa, ‘Xεmεni ito mato! Fudimaan nun dɔlɔ minna nan a ra. Mudu maxinle nun hakε kanne xɔyin nan a ra!’ Koni naxanye Alaa fe kolonna suxi, ne ɲɔndin yitama e kewanle xɔn ma nεn.”

*Taa denkelɛyatarene fe*

*Luka 10.13-15*

20 Na xanbi ra, Yesu yi na taane yalagi fɔlɔ, a bata yi kabanako fe wuyaxi liga denaxanye yi, bayo e muxune mi yi tinma e kewanle masare. 21 A yi a fala, a naxa, “Gbalon Korasin kaane yεε ra! Gbalon Betasada kaane yεε ra, bayo kabanako feen naxanye liga ε tagi, xa ne yi liga Tire taan nun Sidɔn taani nun, na kaane yi e xun xanbi soma e hakεne yi nεn, e kasa benbenle ragodo e ma nimisani, e dɔxɔ xubeni.† 22 Nba, n xa a fala ε xa, fa fala Ala kininkininma nεn Tire taan nun Sidɔn taan ma Kiti Sa Lɔxɔni dangu ε tan na. 23 E tan Kapεrunan kaane, ε tema nεn kore xɔnna ma ba? En-εn, ε godoma laxira nin! Bayo kabanako feen naxanye bata liga ε tagi, xa na yi liga Sodoma taani nun, sa a mɔn yi na nun han to! 24 N xa a fala

---

† 11:21: E dɔxɔ fena xubeni, e namunna nan yi na ra naxan yi a yitama fa fala e bata e xun xanbi so e hakene yi.

ε xa, Ala kininkininma Sodoma kaane ma nεn Kiti Sa Lɔxɔni dangu ε tan na!”

*Fa Yesu ma  
Luka 10.21-22*

<sup>25</sup> Yesu yi a fala na waxatini, a naxa, “N Fafe Ala, kore xɔnna nun dunuɲa Marigina, n barikan birama i xa bayo i feen naxanye luxunxi xaxili-mane nun fekolonne ma, i bata ne yita diidine ra. <sup>26</sup> N Fafe, a i kεnεnxi na kii nin. <sup>27</sup> N Fafe bata feen birin taxu n na. Muxu yo mi Alaa Dii Xεmεn kolon fɔ a Fafe Ala. Muxu yo mi Fafe Ala kolon fɔ a Dii Xεmεna e nun a Dii Xεmεn waxi a yita feni naxanye ra.”

<sup>28</sup> “ε tan naxanye birin xadanxi, goron binyene ε tan naxanye xun ma, § ε fa n ma, n xa matabun fi ε ma. <sup>29</sup> ε n ma goron tongo gbelemεn\* tongo, ε yi n ma xaranna suxu bayo n limaniyaxi, n nan n yeεε magodoxi, ε niine matabun sɔtɔma nεn. <sup>30</sup> Amasɔtɔ, n ma goron tongo gbelemεn mi binya, n ma goronna yelefu.”

## 12

*Matabu Lɔxɔna fe  
Maraka 2.23-28, Luka 6.1-5*

<sup>1</sup> Na waxatini, Yesu yi danguma xεεna nde ma Matabu Lɔxɔni, kamεn yi a xarandiine suxu e sansi tɔnsɔnne ratorondon fɔlɔ, e yi e don. <sup>2</sup> Farisi muxune to na to, e yi a fala Yesu xa, e naxa, “A

---

§ **11:28:** Goronna mi a ra muxun xun ma fɔ naxan a niin tɔrɔma.

\* **11:29:** Goron tongo gbelemεni ito bunna nεεn fa fala muxune lan e xa Yesu a dunuɲa yi gidi kiin tongo. Na mi muxune findima konyine ra, koni a e raxɔrɔyama e yulubina konyiyaan nan ma.

mato, i ya xarandiine feen naxan ligama na mi daxa Matabu Lɔxɔni.”\*

<sup>3</sup> Yesu yi e yabi, a naxa, “Ɛ mi na xaranxi ba, kamɛn Dawuda nun a fɔxɔrabirane suxu waxatin naxan yi?† <sup>4</sup> Na waxatini, a so nɛn Alaa banxini. A tan nun a fɔxɔrabirane yi buru ralixin don, muxun mi yi daxa a xa naxan don fɔ saraxaraline. <sup>5</sup> Ɛ munma Sariya Kitabun xaran ba? A sɛbɛxi naxan kui fa fala a saraxaraline walima saraxa badeni Ala Batu Banxini Matabu Lɔxɔn birin yi koni e mi yalagixi. <sup>6</sup> N xa a fala ɛ xa, fena nde be naxan gbo Ala Batu Banxin xa.‡ <sup>7</sup> Kitabun naxa, ‘Hinanna rafan n ma dangu saraxan na.’§ Xa ɛ yi na bunna kolon nun, ɛ mi yi yo kanna yalagima nun. <sup>8</sup> Bayo n tan Muxuna Dii Xɛmɛn nan Matabu Lɔxɔn kanna ra.”

### *Xɛmɛ yi madɔnxina fe*

#### *Maraka 3.1-6, Luka 6.6-11*

<sup>9</sup> Yesu yi keli na, a siga e salide banxini. <sup>10</sup> Xɛmɛna nde yi na yi naxan yiin yi madɔnxi. E yi Yesu maxɔdin, e naxa, “A daxa dandanna yi

---

\* **12:2:** Farisi muxune namunne mi yi tinjɛ wali yo xa ke Matabu Lɔxɔni. Na feen sɛbɛxi Xɔrɔyaan 20.8-10 kui. Farisi muxune fena ndee saxi sariyan fari, e naxa, a hali muxu sɔxɔlɛxine mi yi maliye na lɔxɔni. † **12:3:** A mato Samuyɛli Singen 21.2-7 kui. ‡ **12:6:** Yesu faxi kisi kiraan naxan na, na tɔnɔn gbo dangu Ala Batu Banxin na. § **12:7:** Hose 6.6 Na waxatini, saraxane yi ralima Ala ma, nde yetɛɛn yi sa tɛɛni muxu yo mi e don. Ala naxa, a rafanjɛ a ma, i hinan i adamadi boden na benun i xa saraxan ba Ala xa.

ti Matabu Λαχῶνι ba?”\* Amasῶτο e yi wama a τῷνεγε feni fena nde ma. <sup>11</sup> Yesu yi e yabi, a naxa, “Xa γεξεενα ε tan nde keden yii, xa a sin yinla ra Matabu Λαχῶνι, ε mi a rate ba? <sup>12</sup> Muxun fisa γεξεεν xa pon! Nanara, a daxa muxun xa fe fajin liga Matabu Λαχῶνι.” <sup>13</sup> Na xanbi ra, a yi a fala xemen xa, a naxa, “I yiini bandun.” Xemen yi a yiini bandun. A yiin yi kendeya alo a yiin bonna kii naxan yi.

<sup>14</sup> Farisi muxune yi siga, e sa e bode to Yesu xili ma a faxa feen ma.

*Ala walikeen naxan sugandixi*

<sup>15</sup> Yesu yi na kolon, a keli, a siga. Muxu wuyaxi yi biraxi a foxo ra. A yi e furetone birin nakendeya, <sup>16</sup> a yi e yamari, a e nama a fe fala bonne xa. <sup>17</sup> A na ligaxi nen, alogo Nabi Esayi naxan falaxi, na xa kamali, a naxa,

<sup>18</sup> “Ala naxa, ‘N ma walikeen ni i ra,

n naxan sugandixi,

n xanuntenna naxan n kenexi han!

N nan n ma Nii Sarijanxin nagodoma a ma nen.

A yi n ma kiti kenden nali siyane ma.

<sup>19</sup> A mi fe matandin tiye,

a mi sonxo sonxoε.

A mi falan tiye taan xun xon.

<sup>20</sup> A mi xaye yidoxini girε,

---

\* **12:10:** Musaa sariyan mi tinje muxun xa wali Matabu Λαχῶνι. (Xaroyaana 20.8-10) Muxuni itoe yi laxi a ra fa fala dandan tiin findixi wanla nan na. Yesu yi muxune rakendeyama Matabu Λαχῶνι. Na yi findi yengen na Yesu nun dina muxune tagi naxanye yi sariyan suxi kii xodexeni.

a mi lenpun tumatɔɔn natuyɛ.†  
 Han a yi nɔɔn sɔtɔ kiti kɛndɛn xa.  
 21 Siyane e yigi sama nɛn a yi.’ ”‡

*Yesu nun Yinna Mangana fe  
 Maraka 3.20-30, Luka 11.14-23*

22 Muxuna nde yi fa xɛmɛ danxutɔna nde ra Yesu fɛma, a mi yi nɔɛ falan fan tiyɛ bayo jinan jaxin nan yi a fɔxɔ ra. Yesu yi a rakɛndɛya, a nɔ falan tiyɛ, a yi seen to. 23 Yamaan birin yi kabɛ e maxɔdinna ti, e naxa, “Dawudaa Dii Xɛmɛn nan ito ra ba?”§ 24 Farisi muxune to na mɛ, e yi a fala, e naxa, “A jinanne kedima yinna mangan Bɛlɛsɛbu barakan nin.” 25 Yesu yi e miriyaan kolon. A yi a fala e xa, a naxa, “Yɛngɛn yamanan naxan yitaxunxi,\* na yamanan kalama nɛn mafurɛn! Yɛngɛn tanden naxan kui hanma taana, na fan kalama nɛn. 26 Xa Setana nan Setana kedima, a mangayaan bata yitaxun yɛngɛni. A sabatima nayi di? 27 Xa n jinanne kedima Bɛlɛsɛbu barakan nin, ɛ fɔxɔrabirane e kedima nanse xɔn nayi? Na ma, ɛ fɔxɔrabirane a yitama nɛn nayi fa fala yo mi ɛ xa! 28 Koni xa n jinanne kedima Alaa Nii

† 12:20: a mi lenpu tumatɔɔn natuyɛ: Na findixi a limaniyaan misaala nan na fa fala a maliin nan tima benun a xa kalan ti.

‡ 12:21: Esayi 42.1-4 § 12:23: Dawudaa Dii Xɛmɛna: Yamaan yi Dawuda bɔnsɔnna muxuna nde legedenma naxan yi lan nun a findi mangan na fata nabiya falane ra naxanye Alaa Muxu Sugandixin fa feen falaxi benun a waxatin xa a li. \* 12:25:

yamanan: Jinanne nun yinnane Setana sɛnbɛn bun alo yamanan nun a mangan kii naxan yi. Seen naxanye Setana sɛnbɛn bun, xa ne e bode kedi, na luxi nɛn alo yamanan na yitaxun. Nayi, Setana mi jinanne kedɛ alo muxuni itoe a falama Yesu ma kii naxan yi.



Sarijanxin barakan nin, na a yitama nen nayi fa fala Alaa Mangayaan bata ε li.”

<sup>29</sup> “Muxu yo mi nœ soε senbεmana banxini,† a yi a yii seene tongo, fɔ a senbεmaan xidi singen. Na xanbi ra, a nœ banxin kui seene tongε nen. <sup>30</sup> Xa muxun mi luxi n xa, na bata keli n xili ma. Xa nxu nun muxu yo mi malan, ne sigama ayi nen.”

<sup>31</sup> “Nanara, n na a falama ε xa fa fala muxun yulubin naxan birin ligama e nun a fala jaxin naxan birin tima Ala ma, Ala e mafeluyε nen ne birin na. Koni muxu yo na Alaa Nii Sarijanxin nayelevu, na kanna mi mafeluyε mumε! <sup>32</sup> Muxu yo fala jaxin ti n tan Muxuna Dii Xεmεn ma, Ala a mafeluyε nen. Koni muxu yo fala jaxin ti Alaa Nii Sarijanxin ma, Ala mi na kanna mafeluyε dunuɲa yi hanma waxati famatɔni han habadan.”

### *Wudin nun a bogine fe*

#### *Luka 6.43-45*

<sup>33</sup> “Xa wudin binla fan, a bogin fan fanma ayi nen. Xa wudin binla kobi, a bogin fan kobima ayi nen. Bayo wudin kolonma a bogin nan xɔn. <sup>34</sup> Ε tan saɲi bɔnsɔnne! Ε nœ fala faɲin tiyε di, bayo ε jaxu? Amasɔtɔ feen naxanye muxun bɔɲeni, a ne nan falama. <sup>35</sup> Muxu faɲin fe faɲin nan naminima a muxu faɲiyani. Muxu jaxin yi fe jaxin namini a muxu jaxiyani. <sup>36</sup> N xa a fala ε xa fa fala muxune dentεgen sama nen kiti lɔxɔni lan e fala fuune birin ma. <sup>37</sup> Bayo i ya fala tixine nan yoon fima i ma, e tan nan mɔn findima i yalagi xunna ra.”

---

† **12:29:** Sandani ito kui, Setana findixi senbεmaan nan na. Xa Yesu bata muxune ba Setana yinna jaxine senben bun ma, nayi, Yesu bata Setana xidi.

*Nabi Yunusaa taxamasenna fe  
Maraka 8.11-12, Luka 11.29-32*

<sup>38</sup> Na xanbi ra, sariya karamɔxɔn nun Farisi muxuna ndee yi falan ti a xa, e naxa, “Karamɔxɔ, nxu waxi a xɔn ma, nxu xa i to kabanako taxamasenna nde ligɛ.” <sup>39</sup> Yesu yi e yabi, a naxa, “Iki muxune findixi muxu ɲaxine nun nafigine nan na, ɛ to n maxɔdinma kabanako taxamasenna ma. Koni ɛ mi kabanako fe yo toɛ ba Nabi Yunusa taxamasenna ra. <sup>40</sup> Nabi Yunusa kɔɛ saxan soge saxan ti yeɛɛ gbeen kui kii naxan yi, n tan Muxuna Dii Xɛmɛn fan kɔɛ saxan soge saxan tima na kii nin bɔxɔn bun ma. <sup>41</sup> Niniwa kaane tima nɛn Kiti Sa Lɔxɔni, e yi iki muxune yalagi bayo ne Yunusaa kawandin mɛ waxatin naxan yi, e xun xanbi so nɛn e hakɛne yi. Anu, fena nde be naxan gbo Yunusa xa.† <sup>42</sup> ɲaxalan Mangan naxan keli sogetede yiifanna ma, na tima nɛn kiti sa lɔxɔni, a yi iki muxune yalagi bayo a kelixi bɔxɔn danna nan na fa a tuli matideni Sulemani a fekolonna falane ra.§ Awa, n xa a fala ɛ xa, naxan gbo Sulemani xa, na be yi.”

*Yinna ɲaxine xɛɛ fena  
Luka 11.24-26*

<sup>43</sup> “Yinna ɲaxin na xɛɛ muxun fɔxɔ ra waxatin naxan yi, a sigama yire yixaren nin, a sa a matabuden fen. Xa a mi yire yo to, <sup>44</sup> a a mirima nɛn nayi, a naxa, ‘N kelixi dɛnaxan yi, n mɔn xa xɛɛ na.’ Nayi,

---

† **12:41:** A mato Yunusa sora 1 han sora 4 kui. § **12:42:** A mato Mangane Singen 10.1-10 kui.

a na xεtε na, xa a sa na kui genla li,\* a makɔxi, a yitɔnxi, <sup>45</sup> a sigama nɛn nayi, a sa fa yinna ɲaxi solofere gbεtεye ra naxanye ɲaxu dangu a tan na. Ne yi lu a fεma. Na muxuna fe raɲanna ɲaxuma ayi nɛn dangu a fɔlɔn na. A ligama na kii nin iki muxu ɲaxine fan na.”

*Yesu nga nun a xunyεne fe*

*Maraka 3.31-35, Luka 8.19-21*

<sup>46</sup> Yesu yi falan tima yamaan xa waxatin naxan yi, a nga nun a xunyεne yi fa, e ti tandeni, e yi waxi a xɔn ma, e xa falan ti Yesu xa. <sup>47</sup> Nanara, muxuna nde yi a fala a xa, a naxa, “I nga nun i xunyεne tixi tandeni, e waxi i to feni.” <sup>48</sup> Yesu yi e yabi, a naxa, “Nga nun n xunyεne findixi nde ra?” <sup>49</sup> Na xanbi ra, a yi a yiin ti a xarandiine ma, a naxa, “Nga nun n xunyεne itoe nan na. <sup>50</sup> Bayo naxanye n Fafe Ala sagoon liga, naxan ariyanna yi, ngaxakeden xεmεmaan nun ɲaxalanmaan ne nan na, e nun nga.”

## 13

*Sansi wonla fe sandana*

*Maraka 4.1-9, Luka 8.4-8*

<sup>1</sup> Na lɔxɔn yεtɛni Yesu yi keli banxini, a siga daraan dεxɔn ma, a sa dɔxɔ na yi. <sup>2</sup> Yama gbeen yi malan a fεma. Nayi, a yi so kunkin kui, a dɔxɔ. Yamaan yi lu xareyaan na. <sup>3</sup> A fala wuyaxi ti e xa sandani, a naxa,

---

\* **12:44:** Na yire kui genla findixi muxun bɔɲɛn nan na. Xa a mi lugoxi Alaa Nii Sariɲanxin na, a mi ratangaxi yinnane wali kobine ma.

“Xεε biina nde yi mini, a siga a sansiin wolideni. <sup>4</sup> A yi sansiin wolima waxatin naxan yi, ndee yi bira kiraan xɔn ma, xɔline yi ne don. <sup>5</sup> Ndee yi bira fanyen fari, bεndε gbee mi yi dεnaxan yi. E yi soli mafuren, amasɔtɔ bεndεn mi yi gbo na yi. <sup>6</sup> Sogen to te, ne yi lisi a ra, e xara bayo e salenne mi yi godoxi bɔxɔni ki fajɪ. <sup>7</sup> Sansina ndee yi bira sεxε jali kanne tagi, sεxεne yi gbo, e yi e don. <sup>8</sup> Koni ndee yi bira bɔxɔ fajɪni, e bogi, e keden kedenna birin yi kεmε sɔtɔ hanma tonge sennin, hanma tonge saxan. <sup>9</sup> Xa tunla naxan xɔn, na xa a tuli mati!”

*Sandane sa xunna*

*Maraka 4.10-12, Luka 8.9-10*

<sup>10</sup> Xarandiine yi fa Yesu fεma, e yi a maxɔdin, e naxa, “Nanfera i falan tima yamaan xa sandani?”

<sup>11</sup> Yesu yi e yabi, a naxa, “Ariyanna Mangayaan wundo feene kolonna bata so ε yii koni a mi soxi e tan yii. <sup>12</sup> Amasɔtɔ seen muxun naxan yii, nde mɔn soma nεn na yii, a yi gbo ayi. Koni se mi muxun naxan yii hali naxan di a yii, na bama a yii nεn.

<sup>13</sup> Nanara, n falan tima ne xa sandan nin. Amasɔtɔ e seen matoma nεn han, koni e mi a yigbεma, e tuli matima nεn han, koni e mi fe mεma, e mɔn mi a famuma. <sup>14</sup> Na ma, Nabi Esayi a nabiya falan bata kamali nayi, a naxa,

‘E tuli matima nεn han,  
koni ε mi fefe famuma.  
E seen matoma nεn han,  
koni ε mi a yigbεma.

<sup>15</sup> Amasɔtɔ yamani ito bɔjɛn bata xɔdɔxɔ ayi.  
E bata e tunle dutun,  
e yi e yεεne raxi.

Na ma, e mi fa seen toma  
e tunle yi falan mε,  
e xaxinla yi feen famu.

E yi xετε n ma, n yi e rakεndεya.\* ”

<sup>16</sup> “Koni sεwana ε xa, amasoto ε yeεne bata seen to, ε tunle mon bata feen mε. <sup>17</sup> N xa jondin fala ε xa, nabi wuyaxi nun tinxin muxu wuyaxi yi waxi a to feni ε naxan toma, koni e mi a to, e mon mi a mε ε naxan mema.”

*Yesu yi sandan bunna yeβa*

*Maraka 4.13-20, Luka 8.11-15*

<sup>18</sup> Yesu naxa, “E tuli mati, ε yi sansi wonla fe sandan bunna kolon. <sup>19</sup> Naxanye na Ariyanna Mangayaan falan mε, koni e mi a famu, Fe Naxin Kanna fama nen, a yi a xasun e bojeni. Ne luxi nen alo sansiin naxanye bira kiraan xon ma. <sup>20</sup> Sansiin naxanye bira fanyen fari, ne luxi nen alo muxun naxanye falan mε, e yi a suxu sεwani sa! <sup>21</sup> Koni salen mi e bun, e mi buma. Taron nun besenxonyaan na fa waxatin naxan yi Alaa falana fe ra, e birama nen tantanni xulen! <sup>22</sup> Sansiin naxanye bira sexe jali kanne tagi, ne luxi nen alo muxun naxanye falan mema, koni dunuβa xaminne nun nafulu feen kunfan yi a liga e Alaa falan bejin, a tonon mi lu e ma. <sup>23</sup> Sansiin naxanye bira boxo fajini, ne luxi nen alo muxun naxanye falan mε, e yi a famu. E bogima nen, ndee yi bogi kemε ramini, ndee tonge sennin, ndee tonge saxan.”

*Maala nun xaratuna fe sandana*

---

\* **13:15:** Esayi 6.9-10

24 Yesu yi sanda gbete sa e xa, a naxa, “Ariyanna Mangayaan luxi nen alo xemen naxan sansi fajin woli a xeen ma. 25 Koni yamaan yi xima waxatin naxan yi, a yaxun yi fa xaratu kesen woli maali, a siga. 26 E to sabati, maala yi a biye ayi, xaratun fan yi a biye ayi. 27 Xee kanna walikene yi fa a fema, e naxa, ‘Nxu fafe, i mi sansi fajin xan woli i ya xeen ma ba, xaratuni ito kelixi minen yi?’ 28 A yi e yabi, a naxa, ‘N yaxuna nde nan na ligaxi.’ Walikene yi a maxodin, e naxa, ‘I waxi a xon nxu xa sa e matala ba?’ 29 A yi e yabi, a naxa, ‘En-en de! E nema xaratune tale waxatin naxan yi, e maala nde fan talama nen. 30 E xa a lu na, maala nun xaratun xa gbo e bode xon ma han a xaba waxatina. N na a fale n ma walikene xa na waxatini, n naxa, e xaratun singen malan, e yi a raxidi alogo e xa sa teeni. Na xanbi ra, e maala fan malan, e yi a sa n ma sagan kui.’ ”

*Sansi kee xunxurina fe sandana*

*Maraka 4.30-32, Luka 13.18-19*

31 Yesu yi sanda gbete sa e xa, a naxa, “Ariyanna Mangayaan luxi nen alo sansi kee xuridina,† muxun naxan sima a xeen ma. 32 Hali a to xurun sansiin birin xa, koni a na gbo waxatin naxan yi, a danguma nen sii seene birin na, a findi wudi binla ra, xoline yi e teen sa a yi.”

*Burun nate sena fe sandana*

*Luka 13.20-21*

33 Yesu yi sanda gbete sa e xa, a naxa, “Ariyanna Mangayaan luxi nen alo burun nate sena‡ jaxanla

---

† 13:31: Sansini ito xili nen mutaridi. ‡ 13:33: burun nate sena: Lebenna na a ra naxan burun nagboma ayi.

naxan tongo, a yi a sa buru fuɲi benɓeli keden yi, a yi a yimaxa, a birin yi te.”

*Yesu yi e xaran sandane ma*

*Maraka 4.33-34*

<sup>34</sup> Yesu yi feni itoe birin fala yamaan xa sandane yi. A mi yi falan tima e xa, xa a mi sandan sa. <sup>35</sup> Nayi, nabina falan yi kamali, a naxa, “N sandane nan sama. N wundo fonne nan yɛbama naxanye yi luxunxi xabu dunuɲa da.”§

*Yesu yi xaratu keɛɛna feen yɛba*

<sup>36</sup> Na xanbi ra, Yesu yi keli yamaan fema, a so banxini. A xarandiine yi fa a fema, e naxa, “Xaratun naxanye xɛɛn ma, na sandan bunna fala nxu xa.” <sup>37</sup> Yesu yi e yabi, a naxa, “Xɛmɛn naxan sansi faɲin woli, n tan Muxuna Dii Xɛmɛn nan na ra. <sup>38</sup> Xɛɛna, dunuɲa nan na ra. Sansi faɲina, Ariyanna Mangayaan muxune nan ne ra. Xaratu keɛɛne, Fe ɲaxin Kanna muxune nan ne ra. <sup>39</sup> Yaxun naxan xaratu keɛɛn wolin xɛɛn ma, Yinna Mangan nan na ra, Setana. Malo xabana, waxati raɲanna nan na ra, malo xabane nan malekane ra. <sup>40</sup> Xaratun ba fena maali, a sa tɛɛni, a ligama na kii nin waxati raɲanni. <sup>41</sup> N tan Muxuna Dii Xɛmɛna, n nan n ma malekane rasigama nɛn. Naxanye birin muxune birama tantanni e nun fe ɲaxi rabane birin, malekane ne malanma nɛn, e yi e ba n ma Mangayani. <sup>42</sup> E yi e woli sulun tɛɛni,\* wugan nun ɲin naxinna deɲaxan yi. <sup>43</sup> Koni

---

§ 13:35: Yaburin 78.2 \* 13:42: Sulun tɛɛn mɔn falama yirena nde yi fa fala “Furu tɛɛna.”

tinxin muxune yilenma nɛn alo sogena e fafe Alaa Mangayani. Xa tunla naxan xɔn, na xa a tuli mati!”

*Nafulu luxunxina fe sandana*

<sup>44</sup> Yesu naxa, “Ariyanna Mangayaan luxi nɛn alo nafulu gbeen naxan luxunxi xɛɛn ma. Xɛmɛna nde yi na to, a mɔn yi a luxun. Nayi, a sɛwaxin yi sa a yii seene birin mati, a xɛtɛ, a fa na bɔxɔn sara.”

<sup>45</sup> Yesu naxa, “Ariyanna Mangayaan mɔn luxi nɛn alo yulan naxan bɔxɔn bun nafunla† fenma.

<sup>46</sup> A to gɛmɛ faɲi faɲin to naxan sare gbo han, a yi xɛtɛ a konni, a yi sa a yii seene birin mati, a sa na gɛmɛn sara.”

*Yɛxɛ suxu yalana fe sandana*

<sup>47</sup> Yesu naxa, “Ariyanna Mangayaan luxi nɛn alo yɛxɛ suxun yalaan naxan wolin baani, a yi yɛxɛn siyane birin suxu. <sup>48</sup> Yalaan na rafe waxatin naxan yi, yɛxɛ suxune yi a bandun. E yi a rate xareyaan na, e dɔxɔ. E yi yɛxɛ senseenne malan debene kui, e yi a ɲaxine woli ayi. <sup>49</sup> A ligama na kii nin waxati rajanni. Malekane sigama nɛn, e muxu ɲaxine malan e danna, keli tinxin muxune tagi, <sup>50</sup> e yi e woli sulun tɛɛni, wugan nun ɲin naxinna dɛnaxan yi.”

*Fe fonna nun a nɛnɛna a fe*

<sup>51</sup> Yesu yi e maxɔdin, a naxa, “E bata feni itoe famu ba?” E yi a yabi, e naxa, “ɔn.”

<sup>52</sup> A yi a fala e xa, a naxa, “Nanara, sariya karamɔxɔn naxanye birin bata xaran lan

---

† **13:45:** bɔxɔ bun nafunla: Gɛmɛn siyana nde nan ma fe falaxi be naxan toma fɔxɔ ige yi xaxunna ndee kui. Na gɛmɛn xili nɛn “Perili.”



Ariyanna Mangayana fe ma, ne luxi nen alo banxi kanna naxan nafulu nenene nun a fonne raminima a se ramaradeni.”

*Nasarɛti kaane yi e mɛ Yesu ra*

*Maraka 6.1-6, Luka 4.16-30*

<sup>53</sup> Yesu yelin sandane sɛ waxatin naxan yi, a yi keli mɛnni, <sup>54</sup> a xɛtɛ a konni a maxuruxi taan naxan yi. A e xaran e salide banxini waxatin naxan yi, naxanye a xuiin mɛ, ne yi kabɛ. E maxɔdinna ti, e naxa, “A xaxili sifani ito nun kabanako sɛnbɛni ito sɔtɔxi minɛn yi? <sup>55</sup> Kamudɛɛna dii xɛmɛn xa mi ito ra ba? Mariyama a diin xa mi a ra ba? Yaki nun Yusufu nun Simɔn nun Yudasi tada xa mi ito ra ba? <sup>56</sup> A xunyɛ dii tɛmɛne xa mi dɔxi be ba? A tan feni itoe birin sɔtɔxi minɛn yi?” <sup>57</sup> E yi e mɛ a ra.

Yesu yi a fala e xa, a naxa, “Nabiin binyɛ yiren birin yi fɔ a konna nun a denbayani.” <sup>58</sup> A mi kabanako fe wuyaxi liga na amasɔtɔ e mi yi dɛnkɛɣaxi.

## 14

*Herode yi Yoni Marafu Tiin faxa*

*Maraka 6.14-29, Luka 9.7-9*

<sup>1</sup> Na waxatini, Galile mangan Herode yi Yesu a fe mɛ. <sup>2</sup> A yi a fala a fɔxɔrabirane xa, a naxa, “Yoni Marafu Tiin nan a ra. Yoni bata keli sayani! Nanara, sɛnbɛna a yii, a kabanako feene liga.”

<sup>3</sup> A na fala nen, amasɔtɔ a bata yi Yoni suxu nun, a yi a xidi, a yi a sa kason na Herodiyade a fe ra, naxan yi findixi Herode fafaxakedenna Filipi a naxanla ra nun. <sup>4</sup> Yoni yi a falama Herode xa, a naxa, “A mi daxa, i xa Herodiyade futu!” <sup>5</sup> Herode

yi waxi a xɔn ma a xa Yoni faxa, koni a yi gaxuxi yamaan yεε ra bayo ne yi Yoni yatεxi nabiin nan na.

<sup>6</sup> Awa, Herode bari lɔxɔn sumunna a lixina, Herodiyade a dii tεmεn yi a bodon yamaan yεtagi. Na yi Herode kεnεn han <sup>7</sup> a yi saratin tongo na sungutunna xa, a yi a kɔlɔ, a a na a xandi sese yi, a na soma a yii nεn. <sup>8</sup> A nga yi a radin alogo a xa ito nan fala, a naxa, “Yoni Marafu Tiin xunna so n yii wure lefaan ma be.” <sup>9</sup> Manga Herode niin yi rafɔrɔ a ma, koni bayo a bata yi saratin tongo a muxu xilixine yεε xɔri, a yi yamarin fi, a na xa liga. <sup>10</sup> Nayi, e sa Yoni xunna sεgε a dε kasoon na. <sup>11</sup> E yi fa a xunna ra wure lefaan ma, e yi a so sungutunna yii, a siga a ra a nga fεma. <sup>12</sup> Yoni a xarandiine yi fa a binbin tongo, e sa a maluxun. Na xanbi ra, e yi sa a fala Yesu xa.

*Yesu yi muxu wuli suulun dεge*

*Maraka 6.30-44, Luka 9.10-17, Yoni 6.1-14*

<sup>13</sup> Yesu na feen xibarun mε waxatin naxan yi, a siga kunkin kui a danna yire madunduxina nde yi. Yamaan to na mε, e keli e taane yi, e siga a fɔxɔ ra e sanna ma. <sup>14</sup> Yesu to mini kunkin kui, a yi yama gbeen to, a kininkinin e ma, a yi e furetɔne rakεndεya.

<sup>15</sup> Ninbanna ra, a xarandiine yi e maso a ra, e naxa, “Kɔε bata so, burunna nan nun be ra, yamaan bejin, e xa siga banxidεne ra, alogo e xa sa donseen sara e yεtε xa.” <sup>16</sup> Yesu yi e yabi, a naxa, “Hali e mi siga, ε tan yεtεεn xa donseen so e yii.” <sup>17</sup> E yi Yesu yabi, e naxa, “Naxan nxu yii be buru xun suulun nun yεxε firin.” <sup>18</sup> Yesu naxa, “E fa ne ra be.” <sup>19</sup> A yi a fala yamaan xa, a e xa

dɔxɔ sɛxɛne fari. Na xanbi ra, a yi na buru xun suulunne nun yɛxɛ firinne tongo, a yi a yɛɛn nate kore, a barikan bira Ala xa, a burune yigira. A yi e so a xarandiine yii, e yi e yitaxun yamaan na. <sup>20</sup> E birin yi e dɛge, e lugo ken! A xarandiine yi debe fu nun firin nafe e dungi dungi dɔnxɛne ra. <sup>21</sup> Muxun naxanye e dɛge, ba ɲaxanle nun diidine ra, muxu wuli suulun ɲɔxɔn.

*Yesu yi sigan ti igen fari*

*Maraka 6.45-52, Yoni 6.15-21*

<sup>22</sup> Na xanbi ra, Yesu yi a xarandiine rasiga kunkin kui a yɛɛ ra daraan kidi ma. A tan yi lu xanbin na, a yi yamaan naxɛtɛ. <sup>23</sup> A to yelin yamaan nasigɛ, a kedenna yi te geyaan fari Ala maxandideni. A yi lu na han kɔɛ yi so.

<sup>24</sup> Kunkin bata yi siga daraan xun ma pon! Igen mɔrɔnne\* yi lu kunkini maxɛ amasɔtɔ foye gbeen bata yi a xun sa e ma. <sup>25</sup> Yesu yi fa sigan tiyɛ igen fari, a yi sa e li subaxa makedini. <sup>26</sup> A xarandiine to a to sigan tiyɛ igen fari, e gaxu kati! E gbelegbele, e naxa, “Muxun yelenna nan ito ra!” <sup>27</sup> Yesu yi falan ti e xa mafuren, a naxa, “Ɛ wɛkile, n tan nan a ra. Ɛ nama gaxu!” <sup>28</sup> Piyɛri yi falan ti, a naxa, “Marigina, xa i tan nan a ra yati, n yamari a n xa siga i fɛma igen fari.” <sup>29</sup> Yesu yi a yabi, a naxa, “Fa be!” Nayi, Piyɛri yi keli kunkin kui, a sigan ti fɔlɔ igen fari siga Yesu fɛma. <sup>30</sup> Koni a toxina a foyen gbo, a yi gaxu, a godo fɔlɔ igen bun ma. A gbelegbele, a naxa, “Marigina, n nakisi.” <sup>31</sup> Yesu yi a yiin nasiga mafuren! A yi a rate, a naxa, “I

---

\* **14:24:** Igen mɔrɔnne: alo foyen na so igeni.

ya denkeleyaan xurun. I sikexi nanfera?” <sup>32</sup> E firinna birin yi dɔxɔ kunkin kui, foyen yi a raxara. <sup>33</sup> Xarandiin naxanye yi kunkin kui, ne yi e xinbi sin Yesu bun ma, e naxa, “Nɔndin nan a ra yati, Alaa Dii Xɛmɛn nan i tan na!”

*Yesu yi muxune rakendɛya*

*Maraka 6.53-56*

<sup>34</sup> E to daraan gidi, e sa xaren li Genesarɛti yamanani. <sup>35</sup> Yamaan yi Yesu kolon mɛnni. Na ma, e xɛraan nasiga na rabilinna taane birin yi, e yi fa e furetɔne ra Yesu fɛma. <sup>36</sup> E yi a mayandi, a xa tin furetɔne xa e yiine din a doma gbeen lenben na. Naxanye birin yi e yiin dinma a ra, ne birin yi kɛndɛyama nɛn.

## 15

*Yahudiyane namun feene*

*Maraka 7.1-13*

<sup>1</sup> Na xanbi ra, Farisi muxuna ndee nun sariya karamɔxɔne yi keli Yerusalɛn taani. E fa Yesu fɛma, e yi a maxɔdin, e naxa, <sup>2</sup> “Nanfera i ya xarandiine mi en benbane namun feene suxuma? Benun e xa donseen don e mi e yiin naxama en ma dinan kiin ma.” <sup>3</sup> Yesu yi e yabi, a naxa, “Ɛ fan Alaa yamarin kalama ɛ yɛtɛ namun feene ma nanfera?” <sup>4</sup> Bayo Ala naxa, ‘I baba nun i nga binya. Naxan na a baba danga hanma a nga, ɛ na kanna faxa.’\* <sup>5</sup> Koni ɛ tan naxa, a naxan na a fala a fafe xa hanma a nga, a naxa, ‘I yi maliin naxan sɔtɔma n na nun, n bata na fi Ala ma’ <sup>6</sup> hali na kanna nama fa a fafe binya na maliin na. Nayi, ɛ bata Alaa falan

\* **15:4:** Xɔrɔyaan 20.12 nun 21.17 e nun Sariyane 5.16

kala ε namunna fe ra. <sup>7</sup> Ε tan nafigine! Nabi Esayi waliyiya falan naxan ti ε fe ra, jɔndin na a ra, a naxa,

<sup>8</sup> ‘Ala naxa,

yamani ito n binyama e dεεn nin

koni e bɔjɛn makuya n na pon!

<sup>9</sup> E n batuma fuyan!

Bayo e xaranna findixi adamadiine yamari xaraxine nan gbansan na!† ”

*Muxuna sariɓanna kala fena*

*Maraka 7.14-23*

<sup>10</sup> Na xanbi ra, Yesu yi yamaan xili a fεma. A yi a fala e xa, a naxa, “Ε tuli mati, ε yi ito famu. <sup>11</sup> Seen naxan soma muxun dε, na mi a sariɓanna kalama fɔ falan naxan minima a dε.”

<sup>12</sup> A xarandiine yi fa Yesu fεma, e naxa, “I mi a kolon ba, fa fala i ya falan bata Farisi muxune xɔlɔ?” <sup>13</sup> Yesu yi e yabi, a naxa, “N Fafe naxan ariyanna yi, na mi si seen naxanye sixi, ne birin talama nεn. <sup>14</sup> Ε e lu na, danxutɔne nan e ra danxutɔne yεε ra. Xa danxutɔɔn danxutɔɔn yii rasuxu, e firinna birin birama nεn yinla ra.”

<sup>15</sup> Piyeri yi falan ti, a naxa, “Sandani ito bunna fala nxu xa.” <sup>16</sup> Yesu yi a fala e xa, a naxa, “Ε fan munma xaxili sɔtɔ ba? <sup>17</sup> Ε mi a kolon ba? Seen naxan na so muxun dε, na godoma a kui nεn, na xanbi ra, a mini a fatini. <sup>18</sup> Koni falan naxan minima muxun dε, na kelima a bɔjɛn nin, na nan muxune sariɓanna kalama. <sup>19</sup> Bayo miriya jaxine kelima muxun bɔjɛn nin, a yi a ti muxu faxan nun yalunyaan nun yanga suxun nun muɓan nun wule sere baan nun konbin ma. <sup>20</sup> Na feene nan

† 15:9: Esayi 29.13

muxune sariɓanna kalama. Koni i na i dege i yiin naxataren na, na mi muxune sariɓanna kalama.”

*Naxanla denkeleyana fe*

*Maraka 7.24-30*

<sup>21</sup> Yesu yi keli na, a siga Tire taan nun Sidon taan yamanani. <sup>22</sup> Kanan kaa naxanla nde yi na yi, na yi fa Yesu fema. A gbelegbelema, a naxa, “N fafe, Dawudaa Dii Xemena, kininkinin n ma! Ninanna n ma dii temen foxo ra, a toroxi han!” <sup>23</sup> Koni Yesu mi fala yo ti a xa. Yesu a xarandiina ndee yi fa a fema, e yi a mafan, e naxa, “Naxanli ito rasiga! A biraxi en foxo ra, a gbelegbelema.” <sup>24</sup> Awa, Yesu yi e yabi, a naxa, “N mi faxi muxu gbete ma fo Isirayila kaa tununxine alo yexene.” <sup>25</sup> Awa, na naxanla yi fa, a yi a xinbi sin Yesu bun ma, a yi a fala, a naxa, “N fafe, n mali.” <sup>26</sup> Yesu yi sandan sa a xa, a naxa, “A mi lan i xa diidine donseen sa barene bun ma.” †  
<sup>27</sup> Naxanla yi a yabi, a naxa, “N fafe, nandin nan na ra. Koni hali barene donse yolonxine donma nen e kanna naxanye rayolonma boxoni.” <sup>28</sup> Nayi, Yesu yi a yabi, a naxa, “Nga naxanla, i ya denkeleyaan gbo! I rafan feen bata liga i xa.” Na waxatin yeteni, a dii temen yi kendeɗya.

*Yesu yi muxu wuyaxi rakendeɗya*

<sup>29</sup> Yesu yi keli na yi, a siga Galile Daraan dexon ma. A yi te geyaan fari, a doxo. <sup>30</sup> Yama gbeen yi fa a fema, e fa lebutenne nun danxutone nun madontone nun bobone nun furetɔ wuyaxi gbeteɗe ra, e yi e sa Yesu bun ma. A yi e rakendeɗya.

---

† **15:26:** Yesu naxanli ito a denkeleyaan nan feseɗeseɗema sandani ito xon. Sandan kui, siya gbeteɗe findixi barene ra, diidine fan yi lu alo Isirayila kaane.

<sup>31</sup> Yamaan to a to, fa fala bobone falan tima, madəntəne bata kəndəya, ləbutəne bata sigan ti, danxutəne seen toma, e kabε. E yi Isirayilaa Ala tantun.

*Yesu yi muxu wuli naanin dεge*

*Maraka 8.1-10*

<sup>32</sup> Yesu yi a xarandiine xili a fεma, a yi a fala e xa, a naxa, “Yamani ito kininkininna bata n suxu bayo e bata sogε saxan ti n fεma, donse mi fa e yii iki. N mi waxi e rasiga feni kamεna e ma. Xa na mi a ra, e fangan ɲanma nεn kira yi.” <sup>33</sup> Xarandiine yi a maxədin, e naxa, “Nxu tan donseen sətəma minen yi wulani ito yi naxan yama gbeeni ito lugε?” <sup>34</sup> Yesu yi e maxədin, a naxa, “Buru xun yoli ε yii?” E yi a yabi, e naxa, “Buru xun solofere, e nun yεxεdi dando nan nxu yii.” <sup>35</sup> Yesu yi yamaan xili a e xa fa dəxə bəxən ma. <sup>36</sup> Na xanbi ra, a buru xun soloferen nun yεxεne tongo, a barikan bira Ala xa. A yi e yigira, a yi e so a xarandiine yii, xarandiine yi e yitaxun yamaan na. <sup>37</sup> E birin yi e dεge, e lugo. Xarandiine yi a dungi dungine matongo, e debe solofere rafe ne ra. <sup>38</sup> Xεmεn naxanye na don, ba ɲaxanle nun diidine ra, muxu wuli naanin.

<sup>39</sup> Na xanbi ra, Yesu yi yamaan nasiga, a dəxə kunkin kui, a siga Magadan yamanani.

## 16

*Taxamasenna maxədin fena*

*Maraka 8.11-13, Luka 12.54-56*

<sup>1</sup> Farisi muxuna ndee nun Saduse muxuna ndee yi fa Yesu fεma alogo e xa a kεɲaan fεsεfεsε, e a maxədin a xa taxamasenna yita e ra keli ariyanna

yi. <sup>2</sup> Yesu yi e yabi, a naxa, “Xa kuyeni gbeelixi jinbanna ra ε a falama nen a kuye faji yibama nen tila. <sup>3</sup> Xotanni xa kuyeni gbeelixi ε naxa, ‘Tulen famaani ni i ra.’ Ε nεε kore xanna matoe nen ε yi a bunna kolon. Koni ε mi nεε waxatini ito feene bunna kolonje. <sup>4</sup> Iki muxune findixi muxu jaxine nun nafigine nan na, ε to n maxadinma kabanako taxamasenna ma. Koni ε mi sese toma xa naxan mi findixi Yunusa taxamasenna ra.”

Na xanbi ra, a keli e fema, a yi siga.

*Marakolonna lan xaranne ma*  
*Maraka 8.14-21*

<sup>5</sup> Xarandiine yi gidima daraan kidi ma waxatin naxan yi, e yi jinan, e mi buru xali e yii. <sup>6</sup> Yesu yi a fala e xa, a naxa, “Ε a liga ε yeren ma Farisi muxune nun Saduse muxune burun nate sena\* fe ra.” <sup>7</sup> E falan ti falɔ e bode tagi, e naxa, “A ito falama nen bayo en mi faxi buru ra en yii.” <sup>8</sup> Yesu yi a kolon e yi naxan falama. Nanara, a yi e maxadin, a naxa, “Ε nanse falama ε bode tagi, a ε mi faxi burun na? Ε denkeleyaan xurun je? <sup>9</sup> Ε munma xaxili satɔ ba? Ε bata jinan na xɔn ba, n muxu wuli suulunna dege waxatin naxan yi buru xun suulunna ra, ε debe yoli rafe buru dungi dungi donxene ra? <sup>10</sup> Hanma buru xun soloferen naxan yitaxun muxu wuli naaninna ra, ε debe yoli rafe buru donxene ra na yi? <sup>11</sup> Nanfera ε mi a bunna kolonxi fa fala n mi burun xan ma fe falama ε xa. N naxa, ‘Ε a liga ε yeren ma Farisi muxune nun Saduse muxune buru rate sena fe ra!’ ” <sup>12</sup> Na xanbi ra, xarandiine yi a kolon, a mi yi

\* **16:6:** burun nate sena: Leβenna na a ra naxan burun nagboma ayi.



a falama e xa a e xa a liga e yeren ma burun nate sena a fe yi naxan buruni, koni fɔ Farisi muxune nun Saduse muxune xaranna fe yi.

*Piyeri a falana Yesu a fe yi*

*Maraka 8.27-30, Luka 9.18-21*

<sup>13</sup> Yesu yi siga Sesariya taani Filipi yamanani, a yi maxɔdinni ito ti a xarandiine ma, a naxa, “Yamana a falama a nde n tan Muxuna Dii Xεmεn na?” <sup>14</sup> E yi a yabi, e naxa, “Ndee naxa, a Yoni Marafu Tiin nan i tan na. Bonne naxa, a Nabi Eli nan i tan na. Nde gbeteye fan naxa, a Yere mi nan i tan na hanma nabina nde.” <sup>15</sup> A yi e maxɔdin, a naxa, “E tan go, ε tan naxa di? Nde n tan na?” <sup>16</sup> Simɔn Piyeri yi a yabi, a naxa, “Alaa Muxu Sugandixin nan i tan na, habadan Alaa Dii Xεmεna.”

<sup>17</sup> Yesu yi a yabi, a naxa, “Sεwana i tan xa Simɔn, Yunusaa dii xεmεna, bayo adamadi mi ito makεnεnxi i xa, fɔ n fafe Ala naxan ariyanna yi.” <sup>18</sup> Nanara, n na a falama i xa, Piyeri, gεmεn nan i tan na, n nan n ma banxin tima gεmεn naxan fari, n ma dεnkεleya yamana. Hali laxira so dεεne mi nɔɔn sɔtε n ma dεnkεleya yamaan ma mumε!† <sup>19</sup> N na Ariyanna Mangayaan so dεεn jinna soma i yii nεn. I na tɔnna dɔxɔ feen naxan na dunuɔa yi, Ala tɔnna dɔxɔma nεn na ra ariyanna yi. I na tin feen naxan ma dunuɔa yi, Ala tinma nεn na ma ariyanna yi.” <sup>20</sup> Na xanbi ra, Yesu yi a xarandiine yamari, a e nama a fala muxu yo xa fa fala Alaa Muxu Sugandixin nan a tan na.

---

† **16:18:** Piyeri xinla bunna nεn fa fala gεmεna.

*Yesu yi a sayana fe fala*  
*Maraka 8.31-9.1, Luka 9.22-27*

<sup>21</sup> Fɔlɔ na waxatin ma, Yesu yi a yeɓa fɔlɔ a xarandiine xa, a naxa, a fεε mi na fɔ a xa siga Yerusalɛn taani, a sa tɔrɔ wuyaxi sɔtɔ ya-maan fonne nun saraxarali kuntigine nun sariya karamɔxɔne yii, e yi a faxa, a mɔn yi keli sayani a soge saxande lɔxɔni. <sup>22</sup> Piyeri yi Yesu ba bonne fɛma, a Yesu maxadi fɔlɔ, a naxa, “Marigina, Ala xa i tanga na ma, na nama liga i ra mumɛ!” <sup>23</sup> Yesu yi a yeε rafindi a ma, a yi a fala Piyeri xa, a naxa, “Setana, fata n ma! I kataxi n natantan feen nan na. I mi i mirima Alaa feene ma fɔ adamadiine.”

<sup>24</sup> Na xanbi ra, Yesu yi a fala a xarandiine xa, a naxa, “Xa muxu yo waxi bira feni n tan fɔxɔ ra fɔ a xa a mε a yeɛ ra, a yi a yeɛ faxa wudin† tongo, a bira n fɔxɔ ra. <sup>25</sup> Bayo naxan waxi a niin nakisi feni, na bɔnɔma ayi nɛn, koni naxan bɔnɔma a niini n tan ma fe ra, na kisima nɛn. <sup>26</sup> Xa muxun dunuɓa birin sɔtɔ, a bɔnɔ a niini habadan, na tɔnɔn nanse ra? Muxun nɔε nanse fiyε, alogo a niin mɔn xa kisi? <sup>27</sup> Bayo n tan Muxuna Dii Xεmɛn fama nɛn n Fafe Alaa binyeni, nxu nun a malekane. N yi muxun birin saranna fi lan a kɛwanle ma. <sup>28</sup> N xa jɔndin fala ε xa, muxuna ndee be e mi faxε fɔ e n tan Muxuna Dii Xεmɛn to fε n ma mangayani.”§

## 17

---

† **16:24:** Romi kaane yi muxune gbangbanma wudin nan ma, e yi e faxa. Ito bunna nɛn, fa fala fɔ Yesu a xarandiine xa e wɛkile sayaan na Yesu fɔxɔ ra. § **16:28:** A Matiyo 17:2-3 nan ma fe falama.

*Yesu a nɔrɔna fe**Maraka 9.2-13, Luka 9.28-36*

<sup>1</sup> Xii sennin danguxina, Yesu yi Piyɛri nun Yaki nun a ngaxakedenna Yoni tongo, a siga e ra e danna geya gbeen fari. <sup>2</sup> A keɲaan yi masara e yɛɛ ra yi, a yetagin yi lu mayilenɲɛ alo sogena. A dugine yi fixa ayi alo keɲɛnyana. <sup>3</sup> Na waxatin yeteni, Nabi Musa nun Nabi Eli yi mini keɲenni e yetagi, e yi lu falan tiyɛ Yesu xa. <sup>4</sup> Piyɛri yi a fala Yesu xa, a naxa, “Marigina, a lanxi bayo nxu be. Xa i waxi a xɔn ma, n xa gage saxan ti be, i gbeen keden, Nabi Musa gbeen keden, Nabi Eli gbeen keden.”

<sup>5</sup> A yi falan tima waxatin naxan yi, kunda mayilenxin yi godo e xun ma, fala xuiin yi keli na kundani, a naxa, “N nafan Dii Xɛmɛn nan ito ra naxan bata n keɲɛn ki faɲi, ɛ tuli mati a xuiin na!” <sup>6</sup> Xarandiine na mɛ waxatin naxan yi, e gaxu kati, han e sa felen, e yetagine yi lan bɔxɔn ma. <sup>7</sup> Yesu yi fa e fɛma, a yi a yiin din e ra, a naxa, “Ɛ keli, ɛ nama gaxu!” <sup>8</sup> E yi e yɛɛ rakɔɲin, e mi muxu yo to fɔ Yesu.

<sup>9</sup> E yi godoma geyaan na waxatin naxan yi, Yesu yi e yamari, a naxa, “Ɛ feen naxan toxi, ɛ nama a fala muxu yo xa han n tan Muxuna Dii Xɛmɛn yi keli sayani.”

<sup>10</sup> Xarandiine yi Yesu maxɔdin, e naxa, “Sariya karamɔxɔne a falama nanfera nayi fa fala Nabi Eli nan singe fama?” <sup>11</sup> Yesu yi e yabi, a naxa, “Nabi Eli nan singe fama yati, a yi feene birin yitɔn. <sup>12</sup> Koni n xa a fala ɛ xa fa fala Eli bata yelin fɛ koni yamaan mi a kolon, e yi e rafan feene birin liga a ra. Awa, e n tan Muxuna Dii Xɛmɛn fan tɔrɔma nɛn

na kiini.” <sup>13</sup> Na xanbi ra, xarandiine yi a kolon fa fala a falan tima Yoni Marafu Tiin nan ma fe ma.\*

*Yinnan diidin naxan fəxə ra*

*Maraka 9.14-29, Luka 9.37-43*

<sup>14</sup> E fa yamaan fəma waxatin naxan yi, xεmεna nde yi fa Yesu fəma, a yi a xinbi sin a bun ma, <sup>15</sup> a naxa, “N fafe, kininkinin n ma dii xεmεn ma. Gan furen nan a fari, a tɔrɔxi kati, a bata bira tεeni sanja yi wuyaxi hanma igeni. <sup>16</sup> N bata fa a ra i ya xarandiine fəma koni e mi nɔxi a rakendeyε.”

<sup>17</sup> Yesu yi a yabi, a naxa, “E tan denkeleyatarene nun tinxintarene, n xa lu ε fəma han waxatin mundun yi? N xa dija ε xa han waxatin mundun yi? Fa diin na n fəma!” <sup>18</sup> Yesu yi yinnan yamari, a xεtε a fəxə ra. Nayi, a dii xεmεn yi kendeya na waxatin yeteni.

<sup>19</sup> Na xanbi ra, xarandiine yi siga Yesu fəma e danna, e yi a maxədin, e naxa, “Nanfera nxu tan mi nɔxi yinnan kedε?” <sup>20-21</sup> Yesu yi e yabi, a naxa, “Bayo ε denkeleyaan xurun. N xa jəndin fala ε xa. Xa denkeleyana ε yi, hali a xurun alo sansi kesε xurudina, † ε nɔε a fale nεn geyani ito ma, ε naxa, ‘Keli be, i siga menni!’ a yi siga. E nɔε feen birin ligε nεn!”

*Yesu mən yi a fəxa feen fala*

*Maraka 9.30-32, Luka 9.43-45*

<sup>22</sup> Xarandiine birin e malan e bode xən ma waxatin naxan yi Galile yamanani, Yesu yi a fala e

---

\* **17:13:** Nabi Eli a fe sebexi Malaki 3.23 kui. Sariya karaməxone yi laxi a ra a Nabi Malaki bata a fala a Nabi Eli mən fama nen benun Alaa Muxu Sugandixin xa fa. Yoni Marafu Tiin nan na nabiyi falan nakamalixi. † **17:20-21:** Sansini ito xili nεn mutaridi.

xa, a naxa, “N tan Muxuna Dii Xεμεν soma nen muxune yii, <sup>23</sup> e yi n faxa. Koni n mən kelima nen sayani a soge saxande ləxəni.”

Xarandiine nii yi raɲaxu e ma kati!

### *Ala Batu Banxin mudu fi fena*

<sup>24</sup> Yesu nun a xarandiine Kapεrunan taan li waxatin naxan yi, Ala Batu Banxin mudu maxinle yi fa Piyeri fεma, e yi a maxədin, e naxa, “I karaməxən mi Ala Batu Banxin mudun fima ba?” <sup>25</sup> Piyeri yi e yabi, a naxa, “A fima nen.” Piyeri so banxini waxatin naxan yi, Yesu singe yi falan ti, a naxa, “Simən, i mirixi a ma di? Dunuɲa mangane mudun maxilima nde ra? E diine ba, hanma muxu gbεtεye?” <sup>26</sup> Piyeri yi a yabi, a naxa, “Muxu gbεtεye.” Yesu yi a fala, a naxa, “Na bunna nεen, hali a diine mi a fi. <sup>27</sup> Koni nxu mi waxi a xən ma, nxu xa muxuni itoe rafen. Nanara, siga baani, i sa kəɲna bira. I na yεxε singen naxan suxu, i a dεeni bi, i gbeti gbanan keden toma nen a dε, naxan lanɲε en ma mudun ma. I siga na ra, i sa i gbeen nun n gbeen fi.”

## 18

### *Nde gbo birin xa?*

#### *Maraka 9.33-37, Luka 9.46-48*

<sup>1</sup> Xarandiine yi fa Yesu fεma na waxatini, e yi a maxədin, e naxa, “Nde gbo birin xa Ariyanna Mangayani?”

<sup>2</sup> Yesu yi diidina nde xili, a yi a ti e birin yεtagi.

<sup>3</sup> Yesu yi a fala, a naxa, “N xa ɲəndin fala ε xa, xa ε mi maxεtε, ε liga alo diidine, ε mi soε Ariyanna Mangayani mumε! <sup>4</sup> Nanara, naxan yo na a yεtε magodo alo diidini ito, na gbo dangu a birin na

Ariyanna Mangayani. <sup>5</sup> Naxan yo mɔn na diidini ito sifani suxu n xinli, na bata n tan yisuxu.”

*Yulubina fe*

*Maraka 9.42-48, Luka 17.1-2*

<sup>6</sup> “Diidini itoe naxanye bata denkeleya n ma, xa muxu yo ne bira yulubini, a fisa na kanni gεmε gbeen xidi a kɔε ra, a woli baan tilinna ma.”

<sup>7</sup> “Gbalon dunuɲa muxune yεε ra bayo feen naxanye yamaan birama yulubini. A fεε mi na fɔ na fe sifane xa fa koni e fatama muxun naxanye ra, gbalon na kanne yεε ra! <sup>8</sup> Xa i yiina hanma i sanna i birama yulubini, a sεge a ra, i yi a woli ayi! A fisa i yii dungin nun i san dungi kanna xa so habadan nii rakisini, benun i yii firinna nun i san firin kanna xa woli yahannama tεeni. <sup>9</sup> Xa i yεen nan i bire yulubini, a ba na, i yi a woli ayi! A fisa i yεε keden kanna yi so habadan nii rakisini, benun i yεε firin kanna xa so yahannama tεeni.”

*Yεxεε tununxina fe sandana*

*Luka 15.3-7*

<sup>10-11</sup> “Ɛ a liga ε yeren ma, ε nama diidini itoe rafεya. N xa a fala ε xa, e kantan malekane ariyanna yi. E n Fafe Ala yεtagin toma waxatin birin.”

<sup>12</sup> “Ɛ mirixi a ma di? Xa yεxεε kεmε muxuna nde yii, xa keden siga na xun xɔn, na kanna nanfe ligama? A yεxεε tonge solomanaanin e nun solomanaaninne luma nεn e dεgedeni geyaan fari, a siga a tununxi kedenna fendeni. <sup>13</sup> N xa ɲɔndin fala ε xa, a na a to waxatin naxan yi, a sεwama nεn na yεxεε kedenna fe ra dangu tonge solomanaanin e nun solomanaaninne ra naxanye mi lɔxi ayi. <sup>14</sup> A

na kii nin, ε Fafe Ala naxan ariyanna yi, a mi rafan a ma diidini ito nde keden peen xa lɔ ayi.”

### *Hake tongone*

<sup>15</sup> “Xa i ngaxakedenna haken liga i ra, siga a fema i yi a sɔnna fala a xa ε firinna tagi. Xa a i xuiin name, i bata i ngaxakedenna sɔtɔ na yi.

<sup>16</sup> Koni xa a mi a tuli mati i xuiin na, ε nun muxu keden hanma muxu firin xa siga a fema alogo ‘feen birin xa makiti sereya firin hanma saxan xuiin xɔn.’\* <sup>17</sup> Koni xa a mi a tuli mati ne xuiin na, na feen fala denkeleya yamaan xa. Xa a mi a tuli mati denkeleya yamaan xuiin na, a yate alo denkeleyatarena hanma mudu maxinla.”

### *Tondi feen nun tin fena*

<sup>18</sup> “N xa nɔndin fala ε xa, ε na tɔnna dɔxɔ feen naxan na dunuɲa yi, Ala tɔnna dɔxɔma nen na ra ariyanna yi. E na tin feen naxan ma dunuɲa yi, Ala tinma nen na ma ariyanna yi.”

<sup>19</sup> “N mɔn xa a fala ε xa, xa muxu firinna lan fefe ma dunuɲa yi Ala maxandini, n Fafe naxan ariyanna yi, a na ligama ε xa nen. <sup>20</sup> Bayo muxu firin hanma saxan na e malan dede yi n xinli, n fan luma nen menni e ye.”

### *Muxun naxan mi mafeluun tima*

<sup>21</sup> Na xanbi ra, Piyeri yi fa Yesu fema, a yi a maxɔdin, a naxa, “Marigina, n xa ngaxakedenna mafelu dɔxɔɲa ma yoli, a na n haken tongo wax-atin naxan yi? Han dɔxɔɲa ma solofere ba?”

<sup>22</sup> Yesu yi a yabi, a naxa, “N xa a fala i xa, dɔxɔɲa

---

\* **18:16:** Sariyane 19.15

ma solofere mi a ra de, fɔ tonge solofere e nun solofere.”

<sup>23</sup> “Nanara, Ariyanna Mangayaan luxi nɛn alo mangan naxan waxi a walikɛne saren fi feni. <sup>24</sup> A na fɔlɔxina, e fa walikɛ keden na gbeti gbananna wuli fu donla yi naxan ma, donla naxan nun a siimayaan birin wali saranna yi lan. <sup>25</sup> Bayo a mi yi nɔɛ a donla fiyɛ, mangan yi a ragidi a e xa a tan nun a ɲaxanla nun a diine nun a yii seene birin mati e findi konyine ra, alogo a xa donla fi. <sup>26</sup> Nanara, walikɛɛn yi a xinbi sin mangan bun ma, a yi a mafan, a naxa, ‘Dijɲa n xa, n na i ya donla birin fima nɛn!’ <sup>27</sup> A kanna yi kininkinin a ma, a yi dijɲa a donla ma, a yi a lu na.”

<sup>28</sup> “Koni na walikɛɛn yi siga, a sa a lanfana nde to a gbeti xurudi yi naxan ma. A yi a suxu, a yi a kɔɛɛn dɛtɛn. A yi a fala, a naxa, ‘N ma donla fi!’ <sup>29</sup> A lanfaan yi a xinbi sin a bun ma, a yi a mafan, a naxa, ‘Dijɲa n xa, n na i ya donla fima nɛn!’ <sup>30</sup> Koni a mi tin. A yi sa a sa kasoon na han a na a donla fi waxatin naxan yi. <sup>31</sup> Walikɛɛn bonne to na to, e xɔlɔ kati, e siga e kanna fɛma, e sa na birin fala a xa. <sup>32</sup> Nanara, e kanna yi a tan walikɛɛn xili, a naxa, ‘I tan walikɛ ɲaxina, n ma donla naxan birin i ma, n dijɲa nɛn na ma bayo i bata n mafan. <sup>33</sup> A mi yi lan nun ba, i fan xa kininkinin i walikɛ boden ma alo n kininkinin i ma kii naxan yi?’ <sup>34</sup> Nayi, a kanna yi a sa kasoon na a xɔlɔni alogo a kantan muxune xa a ɲaxankata han a yi a donla birin fi. <sup>35</sup> N Fafe naxan ariyanna yi, na fan ɛ suxuma na kii nin, xa ɛ tan nde mi a ngaxakedenna mafelu a bɔɲɛni.”



# 19

## *Futu kala fena*

### *Maraka 10.1-12*

<sup>1</sup> Yesu yelinxi na falane tiyε, a keli Galile yamanani, a siga Yudaya yamanani denaxan Yuruden baan kidi ma. <sup>2</sup> Yama gbeen yi bira a fəxə ra, a yi ne rakendεya.

<sup>3</sup> Farisi muxuna ndee yi fa a fεma a bunbadeni, e yi a maxədin, e naxa, “Sariyan na a ra ba, xεmεn xa naxanla ramε, a findi bun yo ra?” <sup>4</sup> Yesu yi e yabi, a naxa, “E mi Kitabun xaranxi ba? A naxa fa fala a fəlɔni ‘Ala yi adaman da, xεmεn nun naxanla,’\* <sup>5</sup> a naxa, ‘Nanara, xεmεna a nga nun a fafe bejinma, a a maso a naxanla ra, e findi fati bεndε kedenna ra.’† <sup>6</sup> Nayi, muxu firin mi fa e ra koni fə keden. Nayi, Ala bata seen naxanye tugun e bode ra, muxe nama ne fata.”

<sup>7</sup> E yi a maxədin, e naxa, “Nanfera Musa a yamarixi fa fala a xεmεn xa futu kala kedin so a naxanla yii, a yi a bejin?” <sup>8</sup> Yesu yi e yabi, a naxa, “Musa bata tin, a ε xa ε naxanle bejin amasətə ε bəjɛn xədəxə. Koni a mi yi na kiini nun a fəlɔni. <sup>9</sup> Awa, n xa a fala ε xa, xεmεn naxan na a mε a naxanla ra, xa a naxanla mi yalunya ligaxi, xεmεn yi nde gbεtε futu, na xεmεn bata yalunyaan liga.”

<sup>10</sup> A xarandiine yi a fala a xa, e naxa, “Xa xεmεn nun a naxanla tagi na kii nin, a lan futu nama ti na yi.” <sup>11</sup> Yesu yi e yabi, a naxa, “Birin mi nəe xaranni ito suxε, koni fə Ala bata a fεrɛn fi naxanye ma. <sup>12</sup> Xεmεna ndee mi nəe naxanla futuε amasətə

---

\* **19:4:** Dunujɔ Fəlɔn 1.27 nun 5.2 † **19:5:** Dunujɔ Fəlɔn 2.24

e bari kiin xɔn, muxune nan ndee gbɛtɛye ligaxi na kiini, koni ndee gbɛtɛye lanxi a ma nɛn a e nama naxanla futu alogo e xa lu wale Ariyanna Mangayaan xa. Awa, xa naxan nɔɛ xaranni ito suxɛ, na xa a suxu.”

*Yesu yi duba diidine xa*

*Maraka 10.13-16, Luka 18.15-17*

<sup>13</sup> Muxuna ndee yi fa e diidine ra Yesu fɛma, alogo a xa a yiin sa e diidine xunni, a yi Ala maxandi e xa koni xarandiine yi falan ti ne ma. <sup>14</sup> Yesu naxa, “Ɛ tin diidine xa fa n fɛma, ɛ nama e raxɛtɛ amasɔtɔ e tan sifane nan gbee Ariyanna Mangayaan na.” <sup>15</sup> A yi a yiin sa e xunni, a yi duba e xa, a siga.

*Xɛmɛ nafulu kanna fe*

*Maraka 10.17-31, Luka 18.18-30*

<sup>16</sup> Banxulanna nde yi fa Yesu fɛma, a naxa, “Karamɔxɔ, n fe fajin mundun ligɛ, n habadan nii rakisin sɔtɔ?” <sup>17</sup> Yesu yi a yabi, a naxa, “Nanfera i n maxɔdinma fe fajina fe ma? Ala nan keden fan. Xa i waxi a xɔn ma, i xa nii rakisin sɔtɔ, yamarine suxu.” <sup>18</sup> A mɔn yi maxɔdinna ti, a naxa, “Yamari mundun ne ra?” Yesu yi a yabi, a naxa, “I nama faxan ti. I nama yalunyaan liga. I nama muɲan ti. I nama wule seren ba. <sup>19</sup> I baba nun i nga binya, i yi i adamadi boden xanu alo i yɛtɛna.”<sup>†</sup> <sup>20</sup> Banxulanna yi a yabi, a naxa, “N bata ne birin suxu, nanfe fa luxi?” <sup>21</sup> Yesu yi a yabi, a naxa, “Xa i waxi a xɔn ma, i xa findi muxu kamalixin na, siga, i sa i yii seene mati, i yi yiigelitɔne ki. I nafunla

<sup>†</sup> **19:19:** Xɔrɔyaan 20.12-16 nun Sariyane 5.16-20 nun Saraxaraline 19.18

sətɔma nɛn ariyanna yi. Na xanbi ra, i fa bira n fɔxɔ ra.” <sup>22</sup> Banxulanna na mɛ waxatin naxan yi, a sunuxin yi siga amasɔtɔ nafulu gbee kanna nan yi a ra.

<sup>23</sup> Na xanbi ra, Yesu yi a fala a xarandiine xa, a naxa, “N xa jɔndin fala ε xa, nafulu kanne so raxɔlɔ Ariyanna Mangayani! <sup>24</sup> N mɔn xa a fala ε xa, nafulu kanna so raxɔlɔ Alaa Mangayani dangu jɔgɔmɛn so feen na sagilaan yinla ra.”

<sup>25</sup> Xarandiine na mɛ waxatin naxan yi, e yi kabɛ kati! E yi a maxɔdin, e naxa, “Nde fa nɔɛ kisɛ nayi?”

<sup>26</sup> Yesu yi e mato, a naxa, “Muxun mi nɔɛ na lige koni Ala nɔɛ feen birin lige nɛn.”

<sup>27</sup> Na xanbi ra, Piyɛri yi a fala a xa, a naxa, “A mato, nxu bata feen birin bejin, nxu bira i fɔxɔ ra. Nxu tan nanse sətɔma nayi?” <sup>28</sup> Yesu yi a fala e xa, a naxa, “N xa jɔndin fala ε xa, waxati nɛnɛ famatɔni, n tan Muxuna Dii Xɛmɛn na dɔxɔ n ma mangaya gbɛdɛ binyaxini, ε tan naxanye biraxi n fɔxɔ ra, ε fan dɔxɔma nɛn manga gbɛdɛ fu nun firinne ma, ε yi Isirayila bɔnsɔn fu nun firinne makiti. <sup>29</sup> Naxanye birin bata banxine lu na, hanma a ngaxakeden xɛmɛmane nun a jaxalanmane hanma a fafe hanma a nga hanma a diine hanma a xɛɛne n tan ma fe ra, a na jɔxɔn kɛmɛ sətɔma nɛn e nun habadan nii rakisina. <sup>30</sup> Koni naxanye yɛɛn na, ne wuyaxi sa luma nɛn xanbin na. Naxanye xanbin na iki, ne yi sa lu yɛɛn na.”

## 20

*Xɛɛ kanna walikene fe*

<sup>1</sup> Yesu naxa, “Ariyanna Mangayaan luxi nen alo xεε kanna naxan minin subaxani muxu fendeni alogo e xa sa wali a manpa bili nakɔni. <sup>2</sup> E yi lan a ma, a xa e saranna fi gbeti gbanan keden keden, naxan lanɲε soge keden saranna ma. A yi e rasiga a manpa bili nakɔni. <sup>3</sup> Soge raxεn xεn waxatini, a keli, a siga ɓxɔ dεen na, a yi muxuna ndee li tixi na, naxanye mi yi wali yo ra. <sup>4</sup> Nanara, a yi a fala e xa, a naxa, ‘Ɛ fan xa siga, ε sa wali n ma manpa bili nakɔni, a lan n xa ε saren fi naxan na, n na soε ε yii.’ <sup>5</sup> Awa, ne yi siga walideni. Na danguxina, a mɔn yi na ɲɔxɔn liga yanyi tagini e nun se din waxatin masoxina. <sup>6</sup> Awa, se din waxatin danguxina, a mɔn yi siga, a sa muxu gbɛtɛye fan li tixi na. A yi e maxɔdin, a naxa, ‘Ɛ fεriɲɛnxi be nanfera? Ɛ mi fefe ligama?’ <sup>7</sup> E yi a yabi, e naxa, ‘Bayo muxu yo mi nxu tixi wali ra.’ A yi a fala e xa, a naxa, ‘Awa, ε fan xa siga wali kɛdeni n ma manpa bili nakɔni.’ ”

<sup>8</sup> “Ninbanna soxina, manpa bili nakɔ kanna yi a fala walikε kuntigin xa, a naxa, ‘Walikεne xili, e saranna xa fi. A fɔɓɓ dɔnxε ra xiine ma, i sa a rapan a singe ra xiine ma.’ <sup>9</sup> Xεmεn naxanye wanla fɔɓɓ ɲinbari waxatini, ne keden kedenne birin yi gbeti gbanan keden keden sɔɓɔ. <sup>10</sup> Nanara, muxun naxanye singe wanla fɔɓɓ, ne to fa, e yi a miri fa fala, a e a sɔɓɔma nen dangu bonne ra, koni e keden kedenna birin yi gbeti gbanan keden keden sɔɓɔ.”

<sup>11</sup> “Awa, e to yi a rasuxuma, e xεε kanna mafala fɔɓɓ. <sup>12</sup> E yi a fala, e naxa, ‘Muxun naxanye faxi dɔnxεn na, ne waxatidi nan tun wali kεxi. I nxu nun ne birin saren fima kii kedenna nin ba, nxu tan naxanye fεriɲɛnxi sogen na?’ <sup>13</sup> Xεε kanna yi e tan nde keden yabi, a naxa, ‘Sɔxɔ, n mi tinx-

intareya xan ligaxi i ra. En mi lanxi gbeti gbanan keden xan ma ba? <sup>14</sup>I saranna tongo, i siga i konni. Naxanye faxi dɔnxɛn na, n waxi ne saranna fi feni alo n bata i saranna fi kii naxan yi. <sup>15</sup>N mi daxa ba, n xa n sagoon liga n ma gbetini? I n maxɔxɔlɔnma nɛn ba bayo n fonisire? <sup>16</sup>Na kiini, naxanye yɛɛn na, ne wuyaxi sa luma nɛn xanbin na. Naxanye xanbin na iki, ne yi sa lu yɛɛn na.”

*Yesu mɔn yi a faxa feen fala*

*Maraka 10.32-34, Luka 18.31-34*

<sup>17</sup>Yesu yi sigama Yerusalɛn taani waxatin naxan yi, a yi a xarandii fu nun firinne xali e danna. A yi a fala e xa, <sup>18</sup>a naxa, “E a mato, en sigama Yerusalɛn taani, n tan Muxuna Dii Xɛmɛn sa soma nɛn saraxarali kuntigine nun sariya karamɔxɔne yii na yi. E n ma kitin bolonma nɛn, a lan sayaan ma. <sup>19</sup>Na xanbi ra, e yi n so siya gbetene yii naxanye n magelema, e yi n bulan, e yi n gbangban wudin ma. A soqe saxande lɔxɔni n kelima nɛn sayani.”

*Yaki nun Yoni nga maxandina*

*Maraka 10.35-45*

<sup>20</sup>Sebede a dii xɛmɛne nga yi fa Yesu fɛma e nun a dii xɛmɛne, e yi e xinbi sin Yesu bun ma, e yi a maxandi fena nde ma. <sup>21</sup>Yesu yi e maxɔdin, a naxa, “I waxi nanse xɔn ma?” A yi a yabi, a naxa, “Tin, i na i ya mangayaan sɔtɔ, n ma dii xɛmɛ firinni itoe xa dɔxɔ i fɛma, kedenna i yiifanna ma, kedenna i kɔmɛnna ma.” <sup>22</sup>Yesu yi e yabi, a naxa, “E n maxandixi naxan ma, ε mi na kolon. E nɔɛ ε minjɛ tɔrɔya igelengenna ra ba, n fama n mindeni naxan na?” E yi a yabi, e naxa, “Nxu nɔɛ nɛn.”

<sup>23</sup> Yesu yi a fala e xa, a naxa, “Ɛ fama ε mindeni nen n ma tɔɔya igelengenna ra yati! Koni muxun dɔxɔ fena n yiifanna ma hanma n kɔmɛnna ma, na mi n tan ma fɔ n fafe bata yi a ragidi naxanye xa.”

<sup>24</sup> Xarandii fuun bonne na mε waxatin naxan yi, e xɔɔ na ngaxakedenma firinne ma. <sup>25</sup> Nanara, Yesu yi e birin xili a fεma, a naxa, “Ɛ a kolon yati siyane mangane nɔyaan nan ligama e xun na, e muxu gbeene fan yi kuntigiyaan naba e xun na.

<sup>26</sup> Koni a mi na kiini ε tan tagi. Xa naxan yo waxi findi feni muxu gbeen na ε ye, fɔ a xa findi ε walikεen nan na. <sup>27</sup> Xa naxan yo wa findi feni ε yeeratiin na fɔ a xa findi ε konyin nan na <sup>28</sup> alo n tan Muxuna Dii Xεmɛn to mi faxi muxe xa wali n xa koni alogo n tan xa wali, n yi n niin fi muxu wuyaxi xunbaan na.”

*Yesu yi danxutɔ firin nakɛndɛya*

*Maraka 10.46-52, Luka 18.35-43*

<sup>29</sup> E yi kelima Yeriko taani waxatin naxan yi, yama gbeen yi bira Yesu fɔxɔ ra. <sup>30</sup> Danxutɔ firinna naxanye yi dɔxi kiraan na, ne yi a mε a Yesu dangumatɔɔn nan yi a ra, e yi gbelegbele, e naxa, “Nxu fafe, Dawudaa Dii Xεmɛna, kininkinin nxu ma!” <sup>31</sup> Yamaan yi e masabari, koni e mɔn yi gbelegbele kati, e naxa, “Marigina, Dawudaa Dii Xεmɛna, kininkinin nxu ma.” <sup>32</sup> Awa, Yesu yi ti, a yi e xili, a yi e maxɔdin, a naxa, “Ɛ waxi a xɔn ma n xa nanfe liga ε xa?” <sup>33</sup> E yi a yabi, e naxa, “Marigina, nxu waxi a xɔn ma nen, nxu mɔn xa seen to.” <sup>34</sup> Yesu yi kininkinin e ma, a yi a yiin din e yeene ra. E yi seen to mafuren, e bira Yesu fɔxɔ ra.

# 21

*Yesu so fena Yerusalen taani*

*Maraka 11.1-11, Luka 19.28-40, Yoni 12.12-19*

<sup>1</sup> E to maso Yerusalen taan na, e yi Betifage taan li, Oliwi Geyaan fari. Yesu yi a xarandii firin nasiga e yee ra. <sup>2</sup> A yi a jungu e ma, a naxa, “E siga banxiddeen na e yee ra, e sa sofanla nde lima xidixi na yi, a diina a fema. E e fulun, e fa e firinna ra n xa. <sup>3</sup> Xa muxuna nde e maxodin, e a fala a xa, e naxa, ‘Marigin nan mako e ma,’ na kanna e soma e yii nen sa.”

<sup>4</sup> Na liga nen alogo nabiin naxan fala, na xa kamali, a naxa, <sup>5</sup> “E a fala Siyon kaane xa, e naxa, ‘E a mato! E mangan fama e ma. A limaniya. A fama sofanla nan fari, sofali diina, sofali gilɛn diina.’\* ”

<sup>6</sup> Na ma, xarandiine yi siga, Yesu naxan fala e xa, e sa na liga. <sup>7</sup> E yi fa sofanla nun a diin na. E yi e dugine yifulun e fari, Yesu yi doxo sofanla fari. <sup>8</sup> Yamaan yi e dugine yifulun kiraan xon ma, nde yi joxondene magira, e yi e sa kiraan xon a binya feen na. <sup>9</sup> Yamaan naxan yi a yee ra e nun a xanbi ra, ne birin yi lu sonxoɛ, e naxa, “Tantunna xa fi Dawudaa dii xemen ma! Naxan fama Marigin xinli, Ala xa na baraka! Ala tantun kore xonna ma pon!”

<sup>10</sup> Yesu so Yerusalen taani waxatin naxan yi, taan yi maxa. Yamaan yi maxodinna ti, e naxa, “Nde ito ra?” <sup>11</sup> Yamaan yi e yabi, e naxa, “Nabi Yesu nan ito ra, keli Nasareti taani Galile yamanani.”

---

\* **21:5:** A mato Sakari 9.9 kui.

*Yesu Ala Batu Banxini**Maraka 11.15-19, Luka 19.45-48, Yoni 2.13-22*

<sup>12</sup> Yesu to so Ala Batu Banxini, a yi sare matine nun sare soone birin kedi na yi. A yi gbeti masarane tabanle rafelen e nun ganba matine gbɛdɛne. <sup>13</sup> A yi a fala e xa, a naxa, “A sɛbɛxi Kitabun kui, Ala naxa, ‘N ma Banxin xili bama nɛn Ala maxandi banxina.’† Koni ε tan bata a findi muɲadene luxunden na!”

<sup>14</sup> Danxutɔne nun lɛbutɛnne yi siga Yesu fɛma Ala Batu Banxini, a yi e rakɛndɛya.

<sup>15</sup> Koni saraxarali kuntigine nun sariya karamɔxɔne to a to kabanako feene ligɛ, e diidine fan to naxanye yi sɔnxɔma Ala Batu Banxini, e naxa, “Tantunna xa fi Dawudaa Dii Xɛmɛn ma,” e yi xɔlɔ. <sup>16</sup> E yi a fala Yesu xa, e naxa, “I mi diidine falan mɛɛn ba?” Yesu yi e yabi, a naxa, “Di! ε mi Kitabun yireni ito xaranxi ba, naxan a falaxi, ‘I bata diidine nun dii ɲɔrɛne yamari, e yi i matɔxɔ?’‡”

<sup>17</sup> Yesu yi e lu mɛnni, a keli taani, a siga Betani taani, a sa xi na.

*Yesu yi xɔdɛ binla danga**Maraka 11.12-14, 20-24*

<sup>18</sup> Na xɔtɔn bode, a xɛtɛmatɔɔn Yerusalɛn taani, kamɛn yi a suxu. <sup>19</sup> A yi xɔdɛ binla to kiraan dɛxɔn ma, a yi siga a bun ma, koni a mi a bogi yo li a ra, fɔ a dɛɛne. Nanara, a yi a fala xɔdɛ binla ma, a naxa, “I tan mi fa bogin sɔnɔn!” Awa, na waxatin yetɛni xɔdɛ binla yi xara! <sup>20</sup> Xarandiine to na to, e yi kabɛ, e maxɔdinna ti, e naxa, “Xɔdɛ binli ito xaraxi di

† **21:13:** A mato Esayi 56.7 nun Yereimi 7.11 kui. ‡ **21:16:** Yaburin 8.3



xulɛn?” <sup>21</sup> Yesu yi e yabi, a naxa, “N xa jɔndin fala ε xa, xa ε dɛnkɛleyaxi, ε mi sike, n naxan ligaxi xɔdɛ binli ito ra, ε fan nɔɛ na jɔxɔnna ligɛ nɛn. A birin xa mi na ra, ε nɔɛ a fale nɛn geyaan xa, ε naxa, ‘Keli be, i sa sin fɔxɔ igeni,’ na yi liga. <sup>22</sup> Xa ε dɛnkɛleyaxi, ε na sese maxɔdin Ala ra, ε na sɔtɔma nɛn.”

*Yesu sɛnbɛn maxɔdinna fe*

*Maraka 11.27-33, Luka 20.1-8*

<sup>23</sup> Yesu mɔn yi fa Ala Batu Banxini. A yi yamaan xaranma waxatin naxan yi, saraxarali kuntigine nun yamaan fonne yi fa a fɛma, e yi a maxɔdin, e naxa, “I feni itoe ligama sɛnbɛ mundun na, nde i yamarixi i xa feni itoe liga?” <sup>24</sup> Yesu yi e yabi, a naxa, “N fan xa ε maxɔdin fe keden ma, xa ε n yabi, n feene ligama sɛnbɛn naxan yi, n fan na falama ε xa nɛn. <sup>25</sup> Nde Yoni rafaxi a xa muxune rafu igeni e tubi xinla ma, a kelixi Ala nan ma ba, hanma muxune?” E yi falan ti fɔlɔ e bode tagi, e naxa, “Xa en na a yabi fa fala a kelixi Ala nan ma, a falama nɛn nayi, a naxa, ‘Nanfera ε mi laxi Yoni ra?’ <sup>26</sup> Koni xa en na a fala fa fala a kelixi muxun nan ma, en gaxu yamaan yɛɛ ra bayo e birin laxi a ra a nabiin nan yi Yoni ra.” <sup>27</sup> Nanara, e yi Yesu yabi, e naxa, “Nxu mi a kolon.” Awa, a yi a fala e xa, a naxa, “N tan fan feni itoe ligama sɛnbɛn naxan yi, n mi na falama ε xa na yi.”

*Dii xɛmɛ firinna fe sandana*

<sup>28</sup> “E xaxili lu ito xɔn ma. Xɛmɛna nde yi na, dii xɛmɛ firin yi naxan yii. A siga a forimaan fɛma, a sa a fala a xa, a naxa, ‘N ma diina, siga wali kɛdeni n ma nakɔni to.’ <sup>29</sup> A yi a yabi, a naxa, ‘N mi waxi siga feni.’ Koni dɔnxɛn na, a bɔjɛn yi maxɛtɛ, a

sigā. <sup>30</sup> A fafe yi sigā a diin bonna fεma, a sa na fala kedenna ti na fan xa, a yi a yabi, a naxa, ‘N fafe, n sigama nεn.’ Koni a mi sigā. <sup>31</sup> Ne firinna yε, nde a fafe sagoon ligaxi?” E yi a yabi, e naxa, “Forimana.” Yesu yi a fala e xa, a naxa, “N xa nɔndin fala ε xa, mudu maxinle nun yalundene singe soma ε yεε ra Alaa Mangayani. <sup>32</sup> Amasɔtɔ Yoni bata fa, a tinxinna kiraan yita ε ra, ε mi la a ra. Koni mudu maxinle nun yalundene bata la a ra. Hali ε to na to, ε bɔɔε mi maxεε, ε la a ra.”

### *Nakɔ kantanne fe sandana*

#### *Maraka 12.1-12, Luka 20.9-19*

<sup>33</sup> Yesu naxa, “E tuli mati sanda gbεε ra. Nakɔ kannā nde yi na nun naxan manpa bili nakɔɔn sa, a yi a sansan, a yi manpa ige badeni tɔn, a yi gbengben ti. Na xanbi ra, a yi nakɔɔn taxu a kantan muxune ra, a sigā sigatini. <sup>34</sup> Awa, a bogi waxatina a lixina, a yi a walikεna ndee rasiga a nakɔɔn kantan muxune ma, a e xa a gbeen so ne yii. <sup>35</sup> Nakɔɔn kantan muxune yi nakɔ kannā walikεne suxu, e kedenna mabɔnbɔ, e bonna faxa, e bonna magɔlɔn gεmεne ra. <sup>36</sup> Na xanbi ra, nakɔ kannā mɔn yi a walikε gbεεye rasiga, naxanye yi wuya dangu a fɔlɔyixine ra. Nakɔɔn kantan muxune yi ne fan liga na kii kedenni. <sup>37</sup> Dɔnxεn na, a yi a dii xεmεn nasiga e ma, a naxa, ‘E danma nεn n ma diin tan na.’ ”

<sup>38</sup> “Koni nakɔ kantanne to a dii xεmεn to, e yi a fala e bode xa, e naxa, ‘Nakɔ kannā kε tongon nan ito ra, ε fa be, en na a faxa alogo en xa a kεen sɔtɔ.’ <sup>39</sup> Nayi, e yi a suxu, e sigā a torontoronε

nakɔ xεεn fari ma, e sa a faxa. § 40 Awa, nakɔ kanna na fa waxatin naxan yi, a nanfe ligama nakɔ kantanne ra?” 41 E yi a yabi, e naxa, “A na muxu naxine faxama nen kii naxini, a yi nakɔɔn taxu muxu gbeteɣe ra naxanye a gbeen soε a yii a xaba waxatini.” 42 Yesu yi a fala e xa, a naxa, “E munma Kitabun yireni ito xaran ba? A naxa, ‘Banxi tiine e mε gεmεn naxan na, na bata findi banxin gεmε fisamantenna ra. Marigin nan na ligaxi, a findi kabanako feen na en yεε ra yi.’\* ”

43 Yesu naxa, “Nanara, n na a falama ε xa, Alaa Mangayaan bama ε yii nen, a so yama gbeten yii, naxanye kewali lanɣe a ma. 44 Naxan yo na bira gεmeni ito fari, na yigirama nen a dungin dungin na. Koni xa a nu bira naxan yo fari, a na yilunburunna nen.”

45 Saraxarali kuntigine nun Farisi muxune to Yesu a sandan mε, e yi a kolon a falan tima e tan nan ma. 46 Nanara, e yi kata a suxu feen na, koni e yi gaxu yamaan yεε ra naxanye yi a mirixi fa fala a nabiin nan Yesu ra.

## 22

### *Naxalandi tiin sandana*

#### *Luka 14.15-24*

1 Yesu mɔn yi sandan sa yamaan xa. 2 A yi a fala, a naxa, “Ariyanna Mangayaan luxi nen alo mangan naxan naxalandi tiin sewa donse donna malanni tɔn a dii xεmεn xa. 3 A yi a walikεne rasiga

---

§ 21:39: Sandani ito kui Ala nan misalixi nakɔ kanna ra. A dinan taxuxi Isirayila kaane ra. A walikεne findixi nabine ra naxanye xε Isirayila kaane ma. A diin findixi Yesu ra. \* 21:42: Yaburin 118.22-23

a muxu xilixine ma alogo e xa fa donse donna malanni, koni e mi tin fe. <sup>4</sup> Nanara, a yi a walikε gbεteye rasiga e ma, a naxa, ‘E sa a fala e xa, a donseen birin bata yitɔn iki. N bata n ma turaan nun jinge raturaxine faxa, seen birin bata yitɔn. E fa jaxalandi tiin donse donna malanni!’ <sup>5</sup> Koni e mi a yatε, e siga e makone ra. Nde yi siga xεene ma, nde yi siga e wanle ra. <sup>6</sup> A dɔnxεne yi walikεne suxu, e yi e rayarabi, e yi e faxa.”

<sup>7</sup> “Mangan yi xɔɔ kati, a yi a sofane rasiga, e sa faxa tiine halagi, e yi e taan gan. <sup>8</sup> Na xanbi ra, a yi a walikεne xili, a naxa, ‘Naxalandi tiin malanna bata yitɔn koni n muxun naxanye xilixi, ne mi yi daxa e xa xili. <sup>9</sup> Awa, iki ε siga kira xunne ma. E na muxu yo to, ε ne xili malanni.’ <sup>10</sup> Nanara, walikεne yi siga kira xunne ma, e muxun naxanye birin to, e yi ne malan muxu jaxine nun muxu fajine birin. Nayi, jaxalandi tiin malan yiren yi rafe muxu xilixine ra.”

<sup>11</sup> “Koni mangan to so, a xa a muxu xilixine to, a yi xεmena nde to mɛnni, jaxalandi ti domaan mi yi a ma. <sup>12</sup> A yi a maxɔdin, a naxa, ‘Sɔxɔ, i soxi be di, anu, i mi maxidixi alo a daxa jaxalandi ti malanni kii naxan yi?’ Koni xεmɛn mi a yabi sɔtɔ. <sup>13</sup> Mangan yi a fala a walikεne xa, a naxa, ‘E a xidi ken, ε yi a ramini tanden ma dimini, wugan nun jin naxinna dɛnaxan yi.’ ” <sup>14</sup> Yesu naxa, “Muxu wuyaxi xilixi koni muxu dando nan tun sugandixi.”

*Mudu fiin maxɔdinna fe  
Maraka 12.13-17, Luka 20.20-26*

<sup>15</sup> Farisi muxune yi siga, e sa Yesu τῶνεγε feni τῶν a fala xuiin xῶn ma. <sup>16</sup> E yi e xarandiina nde nun Herode a muxuna nde rasiga Yesu fεma a faladeni, e naxa, “Καμῶχῶ, nxu a kolon fa fala ᵓῶνδι falan nan i tan na, i yamaan xaranma Ala ᵓῶνδιν nan ma. Muxe mi nῶε i ya miriyaan maxετε, amasῶτῶ i mi muxune rafisaxi e bode xa. <sup>17</sup> Awa, i mirixi a ma di, a fala nxu xa, a daxa mudun yi fi Romi Manga Gbeen ma ba hanma a nama fi?”

<sup>18</sup> Koni Yesu yi e nata ᵓaxin kolon. A yi e yabi, a naxa, “Ε tan nafigine! Nanfera, ε katama n bunbadeni? <sup>19</sup> Ε gbeti gbananna yita n na mudun fima naxan na!” E yi gbeti gbananna yita a ra. <sup>20</sup> Yesu yi e maxῶdin, a naxa, “Nde xili nun a yeṭagin sawura a ma?” <sup>21</sup> E yi a yabi, e naxa, “Romi Manga Gbeena.” Nayi, Yesu yi a fala e xa, a naxa, “Mangan gbeen xa so a yii, Ala gbeen yi so Ala yii.”\* <sup>22</sup> E na mε waxatin naxan yi, e kabε kati, e keli a fεma, e siga.

### *Faxa muxune rakeli fena*

#### *Maraka 12.18-27, Luka 20.27-40*

<sup>23</sup> Na lῶxῶn yeṭeni, Saduse muxune yi e maso Yesu ra naxanye a falama a faxa muxune mi kelima sayani. E yi Yesu maxῶdin, <sup>24</sup> e naxa, “Καμῶχῶ, Musa bata yi a fala, a naxa, ‘Χα xεμεν faxa, a mi dii lu, a ngaxakedenna xa a κε ᵓaxanla

---

\* **22:21:** Ala gbeena: Mangan yeṭagin sawuran to gbeti gbananna ma, na a findixi a gbeen nan na bayo a tan nan a rafalaxi. Adamadi-ine daxi Ala maligan nan na, nayi e fan findixi Ala gbeen nan na. Gbetin lan a so mangan yii mudun na, koni muxune lan e yi e yeṭe so Ala yii bayo e findixi e da mangan gbeen nan na.

tongo alogo a xa diina nde bari faxa muxun xa.’†  
 25 Awa, ngaxakedenmane muxu solofere yi be  
 nun, forimaan yi ɲaxanla futu, a faxa, a mi dii  
 sɔtɔ, a ɲaxanla yi lu a xunyɛn xa. 26 A yi liga na  
 kiini a firinden fan na, a saxanden fan yi liga na  
 kiini, na yi liga han solofere. 27 Dɔnxɛn na, ɲaxanla  
 fan yi faxa. 28 Awa, faxa muxune na keli waxatin  
 naxan yi, ɲaxanla findima nde gbee ra na muxu  
 soloferene yɛ? Bayo e birin bata yi a dɔxɔ.”

29 Yesu yi e yabi, a naxa, “Ɛ bata tantan, amasɔtɔ  
 ɛ mi Kitabun kolon hanma Ala sɛnbɛna. 30 Bayo  
 faxa muxune na keli waxatin naxan yi, e ligama  
 nɛn alo malekan naxanye ariyanna yi. Xɛmɛn mi  
 ɲaxalan futɛ, ɲaxanla mi dɔxɛ xɛmɛn xɔn. 31 Awa,  
 naxan lanxi faxa muxune rakeli feen ma, ɛ mi Alaa  
 falan xaranxi ba? A naxa, 32 ‘Ibrahimaa Ala nan  
 n tan na, e nun Isiyagaa Ala e nun Yaxubaa Ala.’  
 Anu, faxa muxune Ala mi a tan na fɔ niiramane.”‡

33 Yamaan na mɛ waxatin naxan yi, e kabɛ Yesu  
 a xaranna ma kati!

### *Yamari fisamantenna fe*

#### *Maraka 12.28-34, Luka 10.25-28*

34 Farisi muxune a mɛ waxatin naxan yi, a Yesu  
 e yabi kiin bata a liga Saduse muxune yi e dundu,  
 e yi e malan. 35 Sariya karamɔxɔ keden yi na, na  
 yi Yesu kɛɲaan fɛsɛfɛsɛ, a yi a maxɔdin, 36 a naxa,

† **22:24:** A mato Dunuɲa Fɔlɔn 38.8 nun Sariyane 25.5-6 kui.

‡ **22:32:** niiramane: Ala naxa a Ibrahimaa Ala nan a ra. A mato Xɔɔyaan 3.6 nun 3.15-16 kui. A mi a falaxi nun a Ibrahimaa Ala nan yi a tan na Ibrahimaa yi a nii ra waxatin naxan yi. Na luxi nɛn alo Ala yɛna e ra laxira yi. E mɔn e nii ra Ala yɛɛ ra yi. Nanara, faxa muxune kelima nɛn sayani.

“Karaməxə, yamarin mundun gbo dangu a birin na Sariya Kitabuni?” <sup>37</sup> Yesu yi a yabi, a naxa, “‘I Marigina Ala xanu i bəɲen birin na e nun i niin birin na e nun i xaxinla birin na.’” <sup>38</sup> Yamarin ito gbo dangu e birin na. <sup>39</sup> A firinden ito luxi nən alo bonna, a naxa, ‘I adamadi boden xanu alo i yeɛna.’\* <sup>40</sup> Sariya Kitabun nun nabine kitabune birin singanxi yamari firinni itoe nan na.”

*Yesu yi maxədinna ti*

*Maraka 12.35-37, Luka 20.41-44*

<sup>41</sup> Farisi muxune malanxi waxatin naxan yi, Yesu yi e maxədin, a naxa, <sup>42</sup> “‘E mirixi Alaa Muxu Sugandixina feen ma di? Nde bənsən a ra?’” E yi a yabi, e naxa, “Dawuda bənsənna nan a ra.” <sup>43</sup> Yesu yi e maxədin, a naxa, “Nanfera Dawuda a xili bama ‘N Marigina’ fata Alaa Nii Sarijanxin na? Amasəto Dawuda a falama, a naxa, <sup>44</sup> ‘Margin yi a fala n margin xa, a naxa, “Dəxə n yiifanna ma, han n yi i yaxune sa i sanna bun ma.”†’ <sup>45</sup> Awa, xa Dawuda a xili bama, ‘N Marigina,’ na ma, Alaa Muxu Sugandixin findixi Dawuda bənsənna ra di?”‡ <sup>46</sup> Muxu yo mi nə a yabɛ fala

---

§ **22:37:** Sariyane 6.5 \* **22:39:** Saraxaraline 19.18 † **22:44:** Yaburin 110.1 ‡ **22:45:** Na waxatini karaməxəne yi a falama a Alaa Muxu Sugandixin barima Dawuda bənsənna nin fata Alaa falan na Samuyeli Firinden 7.16 kui. Anu, xa Dawuda nan Yaburi 110 sɛbɛ, nayi a tan a falama Alaa Muxu Sugandixin ma fa fala “N Marigina.” Na bunna nɛɛn fa fala Alaa Muxu Sugandixin gbo a benba Dawuda xa. Na yi muxune yifu, a yi a yita a Yesu Alaa Muxu Sugandixin tiden gbo dangu Dawuda ra Ala yeɛ ra yi.

keden peen na! Keli na waxatin ma, muxu yo mi fa susu a maxɔdinɛ fe gbete ma.

## 23

*Yesu yi sariya karamɔxɔne nun Farisi muxune yalagi*

*Maraka 12.38-39, Luka 11.43, 46, 20.45-46*

<sup>1</sup> Na xanbi ra, Yesu yi falan ti yamaan nun a xarandiine xa, <sup>2</sup> a naxa, “Sariya karamɔxɔne nun Farisi muxune dɔxi Nabi Musa funfun nin. <sup>3</sup> Nayi, ε e falane birin suxu, ε yi e liga. Koni ε nama e kɛwali sifane tan liga, amasɔtɔ e naxan falama, e mi na ligama. <sup>4</sup> E goron binyene raxidima, e yi e dɔxɔ muxune xun ma, koni hali e yii sonla, e tan mi waxi na din feni e ra e maxalideni. <sup>5</sup> E feen birin ligama nɛn alogo muxune xa e to. Nayi, e Kitabu falane sɛbɛma, e yi e xidi e tigrine nun e yiine ra han a gbo ayi. E domane maxidixi luti dɛnbɛxi kuyene ra. <sup>6</sup> Binye dɔxɔdene rafan e ma malanne yi, e dɔxɔ yamaan yɛɛ ra salide banxine yi. <sup>7</sup> Binye xɔntɔnne rafan e ma lɔxɔ tidene yi, muxune yi e xili ‘Karamɔxɔ.’ ”

<sup>8</sup> “Koni muxe nama ε tan xili ba fa fala, ‘Karamɔxɔ,’ amasɔtɔ ngaxakedenmaan nan ε birin na, karamɔxɔ keden pee nan ε yii. <sup>9</sup> Awa, ε nama muxu yo xili dunuɲa ito yi fa fala, ‘N Fafe,’ amasɔtɔ Fafe keden pee nan ε yii ariyanna yi. <sup>10</sup> E nama tin muxune xa ε xili ‘Kuntigina,’ amasɔtɔ kuntigi keden peen nan ε yii. Alaa Muxu Sugandixin nan na ra. <sup>11</sup> Muxun naxan gbo ε birin xa, na xa findi ε konyin na. <sup>12</sup> Naxan na a yete yite, na yigodoma nɛn. Naxan na a yete magodo, na yitema nɛn.”



*Sariya karamaxane nun Farisi muxune nafiyyana*

*Maraka 12.40, Luka 11.39-42, 44-52, 20.47*

<sup>13</sup> “Gbalona ε xa, ε tan sariya karamaxane nun Farisi muxu nafiyyane! Amasoto ε Ariyanna Mangayaan deen nagalin muxune yee ra, ε tan yeteen mi soma, ε mon mi muxune luma e so naxanye waxi so feni.”

<sup>14</sup> “Gbalona ε xa, ε tan sariya karamaxane nun Farisi muxu nafiyyane! Amasoto ε kapa gilene yii seene bama e yii. E yi ε yete mayita sali xunkuyeni. E yalagima nen na feene ma a jaxin na.”

<sup>15</sup> “Gbalona ε xa, ε tan sariya karamaxane nun Farisi muxu nafiyyane! E foxo igen nun boxo xonna birin yisigama alogo ε xa tubi muxu keden peen soto. E na a soto ε a findima nen yahannama kaan na naxan jaxu ε tan xa dexo firin.”

<sup>16</sup> “Gbalona ε xa, ε tan danxutoon naxanye danxutoon yii rasuxuma. E tan naxanye a falama, ε naxa, ‘Xa muxuna nde a kolɔ Ala Batu Banxin xinli, hali a mi a rakamali, koni naxan na a kolɔ Ala Batu Banxin xemani, fo na kanna xa a falan nakamali.’ <sup>17</sup> E tan danxuto xaxilitarene! Mundun gbo xemana hanma Ala Batu Banxin naxan xemaaan nasarijanma? <sup>18</sup> E mon a falama, ε naxa, ‘Xa muxuna nde a kolɔ saraxa ganden xinli, hali a mi a rakamali. Koni xa muxuna nde a kolɔ saraxan yeteni naxan saraxa ganden fari, fo a xa a falan nakamali.’ <sup>19</sup> Danxutone! Mundun gbo saraxana hanma saraxa ganden naxan saraxan nasarijanma? <sup>20</sup> Awa, naxan na a kolɔ saraxa ganden xinli, na bata a kolɔ saraxa ganden xinli e nun seen naxanye birin a fari. <sup>21</sup> Naxan na a

kɔlɔ Ala Batu Banxin xinli, na bata a kɔlɔ Ala Batu Banxin nun Ala yɛtɛni, naxan luma ε yɛ mɛnni. <sup>22</sup> Muxun naxan na a kɔlɔ ariyanna yi na bata a kɔlɔ Alaa manga gbɛdɛni e nun naxan dɔxi a yi.”

<sup>23</sup> “Gbalona ε xa, sariya karamɔxɔne nun Farisi muxu nafigine, ε nakɔ yi seene yaganna bama alo sorontonna nun sabi se gbɛtɛye, koni ε bata ε mɛ sariyana fe gbeene ra, alo kiti kɛndɛn nun kininkininna nun tɔgɔndiyana. Anu, ε lan ε xa ne nan liga, e nun fe dɔnxɛne. <sup>24</sup> ε tan danxutɔɔn naxanye danxutɔne yii rasuxuma, ε minseen naserendenma alogo ε xa soso keden peedin ba a yi, koni ε yi nɔgɔmɛn gerun!”

<sup>25</sup> “Gbalona ε xa, sariya karamɔxɔne nun Farisi muxu nafigine, ε igelengenna nun ε donse saseen fanna masugusuguma, koni e kuiin nafexi milan nun yɛtɛ rafan fe naxine ra. <sup>26</sup> I tan Farisi muxu danxutɔna, i ya igelengenna nun i ya donse saseen kui maxa singen, alogo a fanna fan xa sarijan.”

<sup>27</sup> “Gbalona ε xa, sariya karamɔxɔne nun Farisi muxu nafigine. ε luxi nɛn alo banxi fajin naxan tixi gaburun xun ma bɛndɛ fixɛn soxi naxan ma naxanye fari tofan, koni e kuiin nafexi faxesa muxu xɔnne ra e nun se xɔsixin sifan birin. <sup>28</sup> ε fan na kiini, ε yɛtɛ findima tinxin muxun nan na muxune birin yɛtagi, koni ε kuiin nafexi nafigiyaan nun fe naxine ra pen!”

*Yesu yi e naxankatana fe fala*

*Luka 11.47-51*

<sup>29</sup> “Gbalona ε xa, sariya karamɔxɔne nun Farisi muxu nafigine. ε banxi tofajine tima nabine gaburune xun ma, ε yi tinxin muxune gaburune

ratofanɲε ayi. <sup>30</sup> Ε yi a fala, ε naxa, ‘Xa nxu yi na nun nxu benbane waxatini, nxu mi yi kafuma e ma e nabine faxa waxatin naxan yi.’ <sup>31</sup> Awa, ε tan yeτεεn sereyaan bama ε yeτεε xili ma fa fala naxanye nabine faxa, ne nan bɔnsɔn ε ra. <sup>32</sup> Awa, ε benbane hakene defe! <sup>33</sup> Ε tan kosone, ε tan saɲi bɔnsɔnne, ε giye yahannama kitin bun ma di?”

<sup>34</sup> “Nanara, n nabine nun xaxilimane nun sariya karamɔxɔne rasigama ε ma. Ε nde faxama nεn, ε yi nde gbangban wudin ma. Ε yi nde bulan salide banxine kui, ε yi e sagatan keli taa ma han taa ma. <sup>35</sup> Na kiini, ε saranma nεn na tinxin muxune birin faxa feen na, keli Habila tinxin muxun ma han Sakari, Bereƙaya dii xεmεna, ε naxan faxa Ala Batu Banxin nun saraxa ganden tagi. <sup>36</sup> N xa ɲɔndin fala ε xa, na birin xεtema nεn iki muxune ma.”

*Yesu yi Yerusalɛn taan xanu*

*Luka 13.34-35*

<sup>37</sup> “Yerusalɛn kaane! Yerusalɛn kaane! Ε tan naxanye nabine faxaxi, ε yi Alaa xεrane magɔlɔn. A xɔnla n suxu nεn saɲa ma wuyaxi n xa ε malan n fεma alo tɔxe ngana a diine malanma a gabutεεn bun kii naxan yi, koni ε mi tin! <sup>38</sup> Awa, Ala ε konna rabeɲinma nεn fefe! <sup>39</sup> Amasɔtɔ n xa a fala ε xa, ε mi fa n toma sɔnɔn han ε yi a fala, ε naxa, ‘Naxan fama Marigin xinli, Ala xa na baraka!’ ”

## 24

*Ala Batu Banxin kalana fe*

*Maraka 13.1-2, Luka 21.5-6*

<sup>1</sup> Yesu yi keli na, a siga. A to yi minima Ala Batu Banxini, a xarandiine yi fa a fεma, e yi Ala Batu

Banxin ti kiin yita a ra. <sup>2</sup> Yesu yi a fala e xa, a naxa, “Ɛ mi seni itoe birin toma ba? N xa ɲɔndin fala ɛ xa, gɛmɛni ito kedenna mi luma a funfuni be. E e birin naxuyama ayi nɛn.”

*Tɔrɔn nun bɛsɛnxɔnyana fe*

*Maraka 13.3-13, Luka 21.7-19*

<sup>3</sup> Yesu yi dɔxi Oliwi Geyaan fari waxatin naxan yi, a xarandiine yi siga a fema wundoni, e yi a maxɔdin, e naxa, “Feni itoe birin ligan waxatin naxan yi, na fala nxu xa, e nun taxamasenna naxanye i fa waxatin nun waxati rapanna yitama nxu ra.”

<sup>4</sup> Yesu yi e yabi, a naxa, “Ɛ a liga ɛ yeren ma alogo muxe nama ɛ mayenden. <sup>5</sup> Amasɔtɔ muxu wuyaxi fama nɛn n xinli, e yi a fala, e naxa, ‘Alaa Muxu Sugandixin nan n tan na,’ e muxu wuyaxi mayenden. <sup>6</sup> Ɛ yɛngɛ feene mɛma nɛn, ɛ yɛngɛna ndee xinle mɛ. Koni ɛ nama gaxu. A fɛrɛ mi na fɔ na fe sifane xa liga nɛn, koni waxati rapanna mi na ra singen. <sup>7</sup> Siyana ndee siyana ndee yɛngɛma nɛn, yamanana ndee yi yamanana ndee yɛngɛ. Fitina kamɛne yi so, bɔxɔn yi xuruxurun yirena ndee yi. <sup>8</sup> Na feene birin ligama nɛn alo ɲaxanla dii bari kuiin xɔlɛ singena.”

<sup>9</sup> “Na xanbi ra, e ɛ suxuma nɛn, e yi ɛ tɔrɔ, e yi ɛ faxa. Siyane birin ɛ rapaxuma nɛn n tan ma fe ra. <sup>10</sup> Muxu wuyaxi birama nɛn tantanni na waxatini, e yi e bode yanfa, e e bode so yiini, e yi e bode rapaxu. <sup>11</sup> Wule nabi wuyaxi fama nɛn e fa muxu wuyaxi mayenden. <sup>12</sup> Fe ɲaxin gboma ayi nɛn dunuɲa yi han muxu wuyaxi a xanuntenyaan yi xurun. <sup>13</sup> Koni naxan na a yixɔdɔxɔ han a rapanna,

na kisima nen. <sup>14</sup> Awa, Alaa Mangayana falan Xibaru Fajin kawandin bama nen dunuƙa yiren birin yi, a findi seren na siyane birin xa, na xanbi ra waxati rajanna yi a li.”

*Se Haramuxina fe*

*Maraka 13.14-23, Luka 21.20-24*

<sup>15</sup> “Ƙ na Se Haramuxin to tixi yire sariƙanxini naxan halagin tima, Nabi Daniyelɪ naxan ma fe fala, (naxan ito xaranma, na xa a bunna kolon,)\*  
<sup>16</sup> nayi, naxanye Yudaya yi, ne xa e gi, e te geyane fari. <sup>17</sup> Muxun naxan a kore banxin kɔɛ ra, na nama xɛtɛ, a godo banxini a yii seene tongodeni. <sup>18</sup> Muxun naxan xɛɛn ma, na nama xɛtɛ banxini a domain tongodeni. <sup>19</sup> Gbalo gbeen fudi kanne nun diin ngane yɛɛ ra na waxatine yi! <sup>20</sup> Ƙ Ala maxandi alogo ɛ giin nama lan xunbeli waxatin ma hanma Matabu Lɔxɔna! <sup>21</sup> Amasɔtɔ na lɔxɔne tɔrɔn jaxuma ayi nen dangu a birin na. A jɔxɔn munma liga singen xabu dunuƙa da waxatini han iki. A jɔxɔn fan mi fa ligama sɔnɔn! <sup>22</sup> Xa Ala mi yi nde ba na lɔxɔne ra nun, muxu yo mi yi kisima, koni a bata nde ba a ra a muxu sugandixine fe ra.”

<sup>23</sup> “Awa na waxatini, xa muxuna nde a fala, a naxa, ‘A mato, Alaa Muxu Sugandixin be yi,’ hanma, ‘A sa mɛnni,’ ɛ nama la na ra. <sup>24</sup> Amasɔtɔ muxu wulexi sugandixine nun wulen nabine ke-lima nen, e taxamaseri gbeene nun kabanako feene liga alogo hali Alaa muxu sugandixine, e xa ne mayenden, xa na lanjɛ. <sup>25</sup> Ƙ a mato, n bata a fala ɛ xa benun a waxatin xa a li. <sup>26</sup> Nanara, xa muxu yo a fala ɛ xa, a naxa, ‘A mato, a sa burunna ra!’ Ƙ

\* **24:15:** A mato Daniyelɪ 9.27 nun 11.31 nun 12.11 kui.

nama siga na! Hanma xa e a fala fa fala, ‘A luxunxi be yi!’ E nama la na ra! <sup>27</sup> Amasɔtɔ alo kuyen na a jinna masɔxɔn keli sogetedeni han sogegododeni, n tan Muxuna Dii Xemen fama na kii nin. <sup>28</sup> Binbin denaxan yi, dugane e malanma menna nin.”

*Muxuna Dii Xemen fa fena*

*Maraka 13.24-27, Luka 21.25-28*

<sup>29</sup> “Na tɔrɔ bɔxɔne na dangu, ‘sogeni dimima nen, kiken mi fa degema, sarene kelima nen kore e bira, kore xɔnna senbene yimaxama nen.’† <sup>30</sup> Nayi, n tan Muxuna Dii Xemena taxamasenna minima nen kenenni kore. Dunuɗa siyane birin yi wuga. E n tan Muxuna Dii Xemen toma fe nen kore xɔnna kundani senben nun binyeni. <sup>31</sup> Xɔta xui gbeen na mini, n na n ma malekane rasigama nen bɔxɔn tongon naaninne birin yi, e yi n ma muxu yebaxine malan, keli dunuɗa danna bonna ma sa dɔxɔ bonna ra.”

*Xɔde binla fe taxamasenna*

*Maraka 13.28-31, Luka 21.29-33*

<sup>32</sup> “E xaxili sɔtɔ xɔde binla fe ma. A yiine na mapingi, a deene yi mini fɔlɔ, e a kolonma nen nayi fa fala jemen bata maso. <sup>33</sup> A na kii nin, e na feni itoe birin to waxatin naxan yi, e a kolonma nen fa fala waxati saxin bata maso, a bata so de yeteen li. <sup>34</sup> N xa jɔndin fala e xa, iki muxune mi danguma fɔ na feene birin liga. <sup>35</sup> Kore xɔnna nun bɔxɔ xɔnna danguma nen, koni n ma falane mi danguma habadan!”

*Muxu yo mi na waxatin kolon*

*Maraka 13.32-37, Luka 17.26-30, 34-36*

† **24:29:** Esayi 13.10 nun Esayi 34.4

<sup>36</sup> “Muxu yo mi na lɔxɔn nun waxati saxin kolon, hali malekan naxanye ariyanna yi hanma Dii Xɛmɛna, fɔ a Fafe Ala keden peena. <sup>37</sup> N tan Muxuna Dii Xɛmɛn fa feen ligama nɛn alo naxan liga Nuhan gbee waxatini. <sup>38</sup> Benun fufaan xa fa waxatin naxan yi, yamaan yi e dɛgema, e yi e minma, e yi naxanle futuma, e yi e diine fima xɛmɛne ma futun na, han Nuhan so waxatin yi a li kunkin kui. <sup>39</sup> Koni feen naxan fama ligadeni, e mi yi na kolon mumɛ han fufaan yi fa, a yi e birin xali. Muxuna Dii Xɛmɛn na fa waxatin naxan yi, a ligama na kii nin. <sup>40</sup> Muxu firin luma nɛn xɛɛn ma na waxatini, keden xalima nɛn, keden yi lu na. <sup>41</sup> Naxalan firin luma nɛn se dinni, kedenna xalima nɛn, keden yi lu na. <sup>42</sup> Ɛ lu ɛ yɛɛ ra yi, amasɔtɔ ɛ mi ɛ Marigin fa waxatin kolon. <sup>43</sup> Ɛ ɛ xaxili lu ito xɔn ma. Xa banxi kanna yi muɲaden fa waxatin kolonɲɛ kɔɛɛn na nun, a mi yi tinɲɛ muɲaden xa so a banxini, a yi luma a yɛɛ ra yi nɛn. <sup>44</sup> Nanara, ɛ xa ɛ yitɔn amasɔtɔ ɛ xaxili mi lɔxɔn nun waxatin naxan ma, n tan Muxuna Dii Xɛmɛn fama na waxatin nin.”

### *Walikɛ tinxinxina fe*

#### *Luka 12.41-48*

<sup>45</sup> “Walikɛɛn mundun lannaya muxun nun xaxilimaan na? Naxan ma kuntigi a dɔxi walikɛɛn bonne xun na, a e donseen taxun e ra a waxatini, a tan nan na ra. <sup>46</sup> Na walikɛɛn sewama nɛn, xa a kuntigina a li na wanla kɛ! <sup>47</sup> N xa nɔndin fala ɛ xa, a kuntigina a yii seen birin taxuma a ra nɛn. <sup>48</sup> Koni xa walikɛ naxin na a ra, a a falama nɛn a yɛɛ ma, a naxa, ‘N ma kuntigin bata buyɛ ayi.’

49 A yi lu walikεen bonne bɔnbε, a yi a dεge, a yi a min e nun dɔlɔ minne. 50 Awa, walikεen yengi mi lɔxɔn naxan ma, a mi waxatin naxan kolon, a kuntigin fama na waxatin nin. 51 A kuntigina a ɲaxankatama nεn, a yi a saran a xun yifu wanle ra, a lu yire yi wugan nun ɲin naxinna dεnaxan yi.”

## 25

### *Sungutun fuuna fe sandana*

1 “Ariyanna Mangayaan luxi nεn alo sungutun fuun naxanye e lεnpune tongo e siga ɲaxalandi kanna ralandeni siga ɲaxalandi tiine malanni. 2 Xaxilitare suulun yi e yε, xaxilimaan nan yi suulunna bonne ra. 3 Xaxilitarene yi e lεnpune tongo koni e mi ture tongo. 4 Koni xaxilimane yi e lεnpune tongo, e yi turena nde sa e goronne kui lεnpun nadεge seen na. 5 ɲaxalandi kanna to bu, xixɔnla yi sungutunne suxu, e xi.”

6 “Kɔε tagini sɔnxɔ xuiin yi mini, e naxa, ‘ɲaxalandi kanna bata fa. ε fa a ralan!’ 7 Nayi, sungutunne birin yi xulun, e yi e lεnpune yitɔn. 8 Xaxilitarene yi a fala xaxilimane xa, e naxa, ‘ε nxu ki tureni, amasɔtɔ nxɔ lεnpune tumaan ni i ra.’ 9 Xaxilimane yi e yabi, e naxa, ‘εn-εn, a mi en birin yiliyε. ε siga sare matine fema ε sa nde sara ε yεε xa.’ 10 Nayi, sungutun xaxilitarene yi siga ture saradeni. E sa mεnni waxatin naxan yi, ɲaxalandi kanna yi fa. Sungutun suulunna naxanye yitɔnxi, ne yi so ɲaxalandi kanna fɔxɔ ra malanni. E dεen nagali. 11 Na xanbi ra, sungutunna bonne yi fa, e naxa, ‘Nxu fafe, yandi, dεen nabi nxu xa.’



<sup>12</sup> Naxalandi kannna yi e yabi, a naxa, ‘N xa n̄ndin fala ε xa, n mi ε tan kolon mume!’ ”

<sup>13</sup> Yesu yi a fala, a naxa, “E lu ε yεε ra yi amasōtō ε mi lōxōn nun waxati saxin kolon.”

*Walikε saxanna fe sandana*

*Luka 19.11-27*

<sup>14</sup> “Ariyanna Mangayaan ligaxi n̄n alo x̄m̄n naxan yi sigama sigatini, a yi a walikεne xili, a yi a yii seene taxu e ra. <sup>15</sup> A yi x̄ma gbanan suulun so keden yii, a yi firin so gbete yii, a yi keden so a saxanden yii, e birin nun e yilan. Na xanbi ra, a yi siga sigatini. <sup>16</sup> Walikεn naxan x̄ma gbanan suulun sōtō, na yi siga na rayulayadeni mafuren, a yi x̄ma gbanan suulun gbete sōtō. <sup>17</sup> Walikεn naxan x̄ma gbanan firin sōtō, na fan yi firin gbete sōtō. <sup>18</sup> Koni walikεn naxan x̄ma gbanan keden sōtō, na yi sa yinla ge, a yi a kuntigina x̄maan luxun na.”

<sup>19</sup> “Waxati xunkuye danguxina, walikεne kuntigin yi fa alogo e xa e d̄nt̄εge. <sup>20</sup> Walikεn naxan x̄ma gbanan suulun sōtō, na yi fa, a yi x̄ma gbanan suulun gbete yita a ra. A yi a fala, a naxa, ‘N kannna, i x̄ma gbanan suulun nan taxu n na. N bata suulun gbete sōtō, a tan ni i ra.’ <sup>21</sup> Kuntigin yi a fala a xa, a naxa, ‘I bata i yix̄d̄x̄, i tan walikε fajin nun lannaya muxuna! I bata lannayaan liga fe xurune yi, nayi n fe gbeene taxuma i ra n̄n. Fa s̄ewa n tan i kannna x̄n!’ <sup>22</sup> Na xanbi ra, a x̄ma gbanan firinna so naxan yii, na yi fa, a naxa, ‘N kannna, i x̄ma gbanan firin nan so n yii. N bata firin gbete sōtō, a tan ni i ra.’ <sup>23</sup> Kuntigin yi a fala a xa, a naxa, ‘I bata i yix̄d̄x̄, i tan walikε fajin nun lannaya muxuna! I bata lannayaan liga fe

xurune yi, nayi n fe gbeene taxuma i ra nen. Fa sewa n xon!’ <sup>24</sup> Donxen na, naxan xema gbanan keden soto, na yi fa, a naxa, ‘N kanna, n na a kolon a i ya fe xoxo. I seen xabama yireni i mi a bixi denaxan yi, i donseen malanma yireni i mi se sixi denaxan yi. <sup>25</sup> Na nan n gaxu, n yi siga, n yi sa i ya xemaan luxun boxon bun. I gbeen naxan na, na ni i ra.’ <sup>26</sup> A kuntigin yi a yabi, a naxa, ‘I tan walike maxi salantenna, i a kolon ba, fa fala a n seen xabama yireni n mi a bixi denaxan yi, n yi donseen malan yire yi n mi a sixi denaxan yi. <sup>27</sup> Na ma, a yi lan nun i xa sa n ma xemaan taxu gbeti mara banxin yulane ra, alogo n na fa waxatin naxan yi, n yi xemaan nun a tonodin soto. <sup>28</sup> Nba, e xema gbananna ba a yii, xema gbanan fu naxan yii, e a so na yii. <sup>29</sup> Amasoto seen muxun naxan yii, nde soma nen na yii mon, a yi a gbegebe soto. Koni se mi naxan yii hali naxan di a yii, na bama a yii nen. <sup>30</sup> Nba, ton mi na walikéen naxan na, e na woli tandeni, dimini, wugan nun jin naxinna denaxan yi.’ ”

### *Kiti donxena fe*

<sup>31</sup> “N tan, muxuna Dii Xemen na fa a binyeni waxatin naxan yi, e nun malekane birin a foxo ra, a doxoma nen a mangaya gbedeni binyeni. <sup>32</sup> Dunuja siyane birin malanma nen a yetagi. A yi e yitaxun doxo firinna ra, alo xuruse rabaan yexene nun siine yitaxunma kii naxan yi. <sup>33</sup> A yexene malanma nen a yiifanna ma, a siine malan a komenna ma. <sup>34</sup> Na xanbi ra, mangana a falama nen a yiifari ma muxune xa, a naxa, ‘E fa be, n Fafe Ala dubaxi e tan naxanye xa. E fa e keen soto,

mangayaan naxan yitɔnxi ε xa xabu dunuɔa da waxatini. <sup>35</sup> Bayo kamɛna n suxu nɛn, ε yi donseen so n yii. Min xɔnla yi n suxu, ε yi igen so n yii. N siga nɛn xɔɲeyani, ε yi n yigiya. <sup>36</sup> Marabɛnna yi n suxu, ε yi n marabɛri ba. N yi fura, ε yi n dandan. N yi sa kasoon na, ε yi fa n xɔntɔn.’ <sup>37</sup> Tinxin muxune a yabima nɛn na yi, e naxa, ‘Marigina, nxu i kamɛtɔɔn to minɛn yi, nxu yi donseen so i yii, hanma i min xɔlitɔna, nxu yi igen so i yii?’ <sup>38</sup> Nxu i to xɔɲeyani waxatin mundun yi, nxu yi i yigiya, hanma marabɛnna i ma, nxu yi i marabɛri ba? <sup>39</sup> Nxu i to furaxi waxatin mundun yi, hanma i kasoon na, nxu yi i xɔntɔn?’ <sup>40</sup> Mangana e yabima nɛn, a naxa, ‘N xa ɲɔndin fala ε xa, ε naxan liga ngaxakedendina nde xa, naxan xurun dangu birin na, ε na liga n tan nan xa nayi!’ ”

<sup>41</sup> “Na xanbi ra, naxanye na lu a kɔmɛnna ma, a yi a fala ne xa, a naxa, ‘E masiga n na, dangatɔne, ε siga habadan tɛɛni naxan yitɔnxi Yinna Manga Setana nun a malekane xa. <sup>42</sup> Bayo kamɛna n suxu nɛn, ε mi donseen so n yii. Min xɔnla yi n suxu, ε mi igen so n yii. <sup>43</sup> N yi lu xɔɲeyani, ε mi n yigiya. Marabɛnna yi n suxu, ε mi n marabɛri ba, n fura kasoon na, ε mi n mali.’ <sup>44</sup> Ne fan yi a yabi, e naxa, ‘Marigina, nxu i kamɛtɔɔn to minɛn yi, hanma i min xɔlitɔna hanma i xɔɲeyani hanma i marabɛritɔna hanma i furetɔna hanma i kasoon na, nxu mi tin i maliyɛ?’ <sup>45</sup> Mangana e yabima nɛn, a naxa, ‘N xa ɲɔndin fala ε xa, ε mi naxanye liga muxudini ito nde keden xa naxan xurun dangu birin na, ε mi na ligaxi n tan fan xa na yi.’ <sup>46</sup> Awa, ne sigama habadan tɔrɔn nin. Koni tinxin muxune sigama habadan nii rakisɛn nin.”

## 26

*Mangane yi yanfani tɔn Yesu ma*

*Maraka 14.1-2, Luka 22.1-2, Yoni 11.45-53*

<sup>1</sup> Yesu to yelin na falane birin tiyε, a yi a fala a xarandiine xa, a naxa, <sup>2</sup> “Ɛ a kolon, a luxi xii firin Halagi Tiin Dangu Lɔxɔn Sanla\* xa a li. N tan Muxuna Dii Xεmεna, e n yanfama nεn, n lu yiini, e n gbangban.”

<sup>3</sup> Na waxatini, saraxarali kuntigine nun yamaan fonne yi e malan Saraxarali Kuntigi Singe Kayafa konni. <sup>4</sup> E yi a nata, e xa Yesu suxu yanfani, e yi a faxa. <sup>5</sup> E yi a fala, e naxa, “En nama a suxu sanla waxatini, xanamu, yamaan murutεma nεn!”

*Latikɔnɔnna sa fena Yesu ma*

*Maraka 14.3-9, Yoni 12.1-8*

<sup>6</sup> Yesu yi Simɔn dogonfontɔna banxini waxatin naxan yi Betani taani, <sup>7</sup> naxanla nde yi fa a fεma, a fa latikɔnɔnna sare xɔdεxεn na a sase gεmε ramaan kui, gεmεn naxan xili “alabasita.” A yi a sa Yesu xunna ra a binya feen na, a yi a dεgema waxatin naxan yi. <sup>8</sup> Yesu a xarandiine to na to, e yi xɔlɔ, e yi maxɔdinna ti, e naxa, “I ito birin yikalama nanfera? <sup>9</sup> Latikɔnɔnni ito yi matiyε nεn dεε xɔdεxεn na, a saren yi so yiigelitɔne yii.” <sup>10</sup> Koni Yesu yi a kolon, e yi naxan falama, a yi a fala e xa, a naxa, “Ɛ naxanli ito mafalama nanfera? A bata fe fajin liga n xa. <sup>11</sup> Amasɔtɔ yiigelitɔne ε fεma waxatin

\* **26:2:** Halagi Tiin Dangu Lɔxɔn Sanla: Musaa waxatini, Ala fitina feen nafa nεn Firawona yamaan ma, malekan yi fa e dii singene birin faxa kɔε kedenna ra. Koni, Isirayila kaane yi saraxa wunla xuya e banxine dε wudine ma, saya malekan yi dangu e xun ma. Na feen sanla ni ito ra. A mato Xɔrɔyaan 12.1-13 kui.

birin koni n tan mi luma ε fema waxatin birin. <sup>12</sup> A bata latikɔnɔnna sa n fatin ma alogo n xa n yitɔn gaburuna fe ra. <sup>13</sup> N xa nɔndin fala ε xa, n ma falan Xibaru Fajini ito na rali dunuɔa yire yo yi, naxanli ito kewanla falama nen, yamaan yi e miri a ma.”

*Yudasi yi Yesu yanfa*

*Maraka 14.10-11, Luka 22.3-6*

<sup>14</sup> Nayi, xarandii muxu fu nun firinna nde keden naxan yi xili Yudasi Isakariyoti, na yi siga saraxarali kuntigine fema, <sup>15</sup> a naxa, “Xa n Yesu so ε yii, ε nanse soma n yii?” Ne yi gbeti gbanan tonge saxan so a yii.† <sup>16</sup> Fɔlɔ na waxatin ma, Yudasi yi lu ferɛn fenɲε, alogo a xa Yesu yanfa, a a so e yii.

*Halagi Tiin Dangu Lɔxɔn Sanla fe*

*Maraka 14.12-21, Luka 22.7-14, 21-23, Yoni 13.21-30*

<sup>17</sup> Buru Tetaren Sanla‡ sɔgen fɔlɔna, xarandiine yi fa Yesu fema, e yi a maxɔdin, e naxa, “I waxi a xɔn ma nxu xa Halagi Tiin Dangu Lɔxɔn Sanla donseen nafala i xa minɛn?” <sup>18</sup> A yi a fala e xa, a naxa, “E siga xɛmɛna nde fema taani, ε sa a fala a xa, ε naxa, ‘Karamɔxɔ naxa, n ma waxatin bata a li. N tan nun n ma xarandiine xa Halagi Tiin Dangu Lɔxɔn Sanla donseen don i ya banxini.’ ” <sup>19</sup> Xarandiine yi a liga alo Yesu a fala e xa kii naxan yi, e yi Halagi Tiin Dangu Lɔxɔn Sanla donsɛni tɔn.

<sup>20</sup> Ninbanna to so, Yesu nun a xarandii fu nun firinne yi dɔxɔ e dɛgedeni. <sup>21</sup> E yi e dɛgema waxatin

---

† **26:15:** A mato Sakari 11.12 kui. ‡ **26:17:** Buru Tetaren Sanla: Yahudiyane yi burun donma lɛben mi yi saxi naxan yi xii solofere sanli ito bun. E sarɔjan kiina nde nan yi a ra. A mato Xɔrɔyaan 12.15 kui.

naxan yi, Yesu naxa, “N xa ꞓɔndin fala ε xa, ε tan nde keden n yanfama nɛn, a yi n so yiini.”<sup>22</sup> Xarandiine yi sunu han, e yi a maxɔdin fɔlɔ keden keden yɛɛn ma, e naxa, “Marigina, n tan nan na ra ba?”<sup>23</sup> Yesu yi e yabi, a naxa, “Nxu nun naxan nxu yiin nagodoxi lenge kedenna kui, na nan n soma yiini.”<sup>24</sup> N tan Muxuna Dii Xɛmɛn faxama nɛn, alo Kitabuna a falaxi kii naxan yi, koni gbalon na kanna yɛɛ ra naxan Muxuna Dii Xɛmɛn soma yiini! A yi fisa nun hali na muxun mi yi bari nun mume!”<sup>25</sup> Yudasi naxan a soma yiini, na yi falan tongo a naxa, “Karamɔxɔ, n tan nan na ra ba?”

Yesu yi a yabi, a naxa, “I bata a fala.”

*Marigina ximɛnna fe*

*Maraka 14.22-26, Luka 22.15-20, Kɔrɛnti Kaane Singena 11.23-25*

<sup>26</sup> E yi e dɛgema waxatin naxan yi, Yesu yi burun tongo, a barikan bira Ala xa, a yi a yigira, a yi a so a xarandiine yii. A yi a fala, a naxa, “E a tongo, ε yi a don, n fati bɛndɛn nan ito ra.”<sup>27</sup> Na xanbi ra, a yi igelengenna tongo, a barikan bira Ala xa, a yi a so e yii, a yi a fala, a naxa, “E birin xa a min<sup>28</sup> amasɔtɔ n wunla ni ito ra n layirin xidima en tagi naxan xɔn, a minima muxu wuyaxi xa nɛn e yulubin mafeluun na.”<sup>29</sup> N xa a fala ε xa, en wudi bogi igen naxan minma ito ra, n mi fa a minma han en birin mɔn yi sa a min n Fafe Alaa Mangayani.”

<sup>30</sup> Na xanbi ra, e yi bɛtin ba, § e siga Oliwi Geyaan fari.

---

§ 26:30: bɛtina: E namunna nan yi a ra na sanla waxatini e xa Yaburin yirena nde ba, fata sorani ito nde ra: 113 han 118.

*Piyeri a me fena Yesu ra**Maraka 14.27-31, Luka 22.31-34, Yoni 13.36-38*

<sup>31</sup> Nayi, Yesu yi a fala e xa, a naxa, “E birin ε mema n na nen to kœen na, amasotɔ a seβexi Kitabuni, fa fala, ‘N xuruse rabaan faxama nen, yeχεene birin yi xuya ayi.’\* <sup>32</sup> Koni n na keli sayani, n sigama nen ε yeε ra Galile yamanani.” <sup>33</sup> Piyeri yi Yesu yabi, a naxa, “Hali bonne birin e me i ra, n tan mi n me i ra mumε!” <sup>34</sup> Yesu yi a fala Piyeri xa, a naxa, “N xa ɲɔndin fala i xa, benun dontonna xa wuga to kœen na, i a falama nen dɔxɔɲa ma saxan fa fala i mi n kolon.” <sup>35</sup> Piyeri yi a yabi, a naxa, “Hali en birin faxa, n mi a fale mumε, fa fala n mi i kolon.” Xarandiin bonne fan birin yi na fala.

*Yesu yi Ala maxandi nakɔni**Maraka 14.32-42, Luka 22.39-46*

<sup>36</sup> Na xanbi ra, Yesu nun a xarandiine yi siga yirena nde yi naxan xili Getesemani. A yi a fala e xa, a naxa, “E dɔxɔ be, n tan sigan mɛnni, n xa sa Ala maxandi.” <sup>37</sup> A siga Piyeri nun Sebede a dii χeme firinne ra. A bɔɲen yi rafɔrɔxi, a yi sunuxi.† <sup>38</sup> Nanara, a yi a fala e xa, a naxa, “N bɔɲen nafɔrɔxi han n faxa, ε lu be, ε lu ε yeε ra yi n xɔn ma.”

<sup>39</sup> A yi siga ndedi, a yi bira, a yetagin yi lan bɔxɔn ma, a yi Ala maxandi, a naxa, “N Fafe, xa a lanɲe tɔrɔya igelengenni ito masiga n na, koni n tan sagoon nama liga fɔ i tan sagona.” <sup>40</sup> Na xanbi ra, a mɔn yi χete, a yi a xarandiine li xixɔnli. A yi a fala Piyeri xa, a naxa, “E mi nɔxi luyε ε yeε ra

\* **26:31:** A mato Sakari 13.7 kui. Sandani ito kui, Yesu misalixi xuruse rabaan na bayo e a faxama nen. † **26:37:** A sunu bayo a a kolon fa fala muxune a faxama nen.

yi n xɔn ma hali waxatidi? <sup>41</sup> E lu e yeε ra yi, e Ala maxandi, alogo e nama bira tantanni. E niin waxɔn feen fan koni e fati benden senbe mi na.”

<sup>42</sup> Yesu mɔn yi siga a firindeni, a sa Ala maxandi, a naxa, “N Fafe, xa tɔɔya igelengenni ito mi nɛ masige n na, fɔ a xa n li, i sagoon xa liga.” <sup>43</sup> A mɔn yi xeε, a xarandiine li xiye, bayo xixɔnla bata yi e suxu.

<sup>44</sup> A mɔn yi keli e fema, a siga a saxandeni, a sa Ala maxandi, a mɔn yi na fala kedenna ti. <sup>45</sup> Na xanbi ra, a xeε xarandiine fema, a naxa, “E mɔn xima ba? E mɔn e matabuma ba? A mato! Waxatin bata a li! N tan, Muxuna Dii Xemen bata so hake kanne senben bun ma iki. <sup>46</sup> E keli, en siga, muxun naxan n yanfama, a n so yiini, na bata fa!”

### *Yesu suxu fena*

#### *Maraka 14.43-50, Luka 22.47-53, Yoni 18.3-12*

<sup>47</sup> A yi falan tima waxatin naxan yi, Yudasi a xarandii fu nun firinna nde yi fa, gali gbeen yi biraxi a fɔxɔ ra saraxarali kuntigine nun sariya karamɔxɔne nun yamaan fonne naxanye xe. Silanfanne nun gbengbetenne yi e yii.†

<sup>48</sup> Naxan yi a yanfama, a a so yiini, na bata yi taxamasenni ito fala yamaan xa nun, a naxa, “N na muxun naxan sunbu,§ a tan nan na ra. E a suxu ken!” <sup>49</sup> Nanara, Yudasi yi a tinxin Yesu ra keden na, a naxa, “Karamɔxɔ, i nuwali.” A yi a sunbu. <sup>50</sup> Yesu yi a yabi, a naxa, “N xɔyina, i faxi naxan na, na liga.”

---

† **26:47:** Silanfanna: Sofane yengeso degemana. § **26:48:** sunbuna: Men kaane yi darixi e bode xɔntɔɔɔne sunbuni, koni Yudasi yi a findi taxamasenna ra, a xa Yesu yita a yaxune ra.



Nayi, e yi Yesu suxu ken! <sup>51</sup> Naxanye yi Yesu fɔxɔ ra, na nde keden yi a silanfanna botin, a Saraxarali Kuntigi Singena konyin tunla sege a ma. <sup>52</sup> Yesu yi a fala a xa, a naxa, “I ya silanfanna raxete a funfuni, amasoto naxan birin silanfanna tongoma, ne faxama silanfanna nan na. <sup>53</sup> I mi a kolon ba, fa fala n nae n Fafe Ala xile nen, a yi maleka gali gbee fu nun firin nafa n ma mafuren? <sup>54</sup> Koni xa na liga, Kitabun fala xuiin kamalima\* di nayi? Bayo a sebexi a fo a xa liga ikiini.”

<sup>55</sup> Yesu yi falan ti ganla xa, a naxa, “E bata fa n suxudeni silanfanne nun gbengbetenne e yii alo mafu tiin nan yi n na nun. N yi xaranna tima Ala Batu Banxini lɔxɔ yo lɔxɔ, koni e mi n suxu. <sup>56</sup> Koni na birin ligaxi nen alogo nabine falan naxanye sebexi, ne xa kamali.”

Nayi, a xarandiine birin yi a raberin, e yi e gi.

*Yesu Yahudiya mangane yetagi*

*Maraka 14.53-65, Luka 22.54-55, 63-71, Yoni 18.13-14, 9-24*

<sup>57</sup> Naxanye Yesu suxu, ne yi a xali Kayafa konni Saraxarali Kuntigi Singena, sariya karamoxone nun yamaan fonne yi malanxi denaxan yi. <sup>58</sup> Piyeri yi bira Yesu fɔxɔ ra, koni e nun ganla tagi kuya, han Saraxarali Kuntigi Singena tande ma. A yi so tanden ma e nun kantan muxune yi doxo alogo a xa a kolon a rananma kii naxan yi.

<sup>59</sup> Saraxarali kuntigine nun kitisa yamaan birin yi katama wule seren ba feen na Yesu xili ma,

---

\* **26:54:** Kitabuna falan kamalima: Esayi 53.5 a falaxi a Alaa Muxu Sugandixin faxama nen yamaan yulubine fe ra. A na falaxi yanyina nde jee keme solofere benun a xa raba.

alogo e xa a faxa. <sup>60</sup> Koni hali muxu wuyaxi to fa wule seren ba a xili ma, e mi sese sətɔ. Dənxən na muxu firin yi ti e yetagi, <sup>61</sup> e naxa, “Xəmən i to naxa, a nɔɛ Ala Batu Banxin kalɛ nən, a mən yi a ti soge saxan bun ma.” <sup>62</sup> Saraxarali Kuntigi Singen yi keli, a falan ti Yesu xa, a naxa, “Muxuni itoe naxan falama i xun ma, na yabi mi i xən ba?” <sup>63</sup> Koni Yesu mi fala yo ti. Saraxarali Kuntigi Singen yi falan ti a xa mən, a naxa, “N na i rakələma habadan Ala xinli, xa Alaa Muxu Sugandixin nan i tan na, Alaa Dii Xəmən, na fala nxu xa.” <sup>64</sup> Yesu yi a yabi, a naxa, “I bata a fala. Koni n xa a fala ɛ birin xa, fələ iki ma, ɛ n tan Muxuna Dii Xəmən toma dɔxi Ala Sənbəmaan yiifanna ma, ɛ yi n famatəɔn to kore kundani.”

<sup>65</sup> Saraxarali Kuntigi Singen na mɛ waxatin naxan yi, a yi a domani bɔ, a naxa, “A bata Ala rayelefu!† En mako mi fa sere yo ma sənən! Ɛ bata a fala ɲaxine mɛ! <sup>66</sup> Ɛ mirixi a ma di?” E yi a yabi, e naxa, “A lan nən a xa faxa.” <sup>67</sup> Nayi, e yi e dɛgen puru Yesu yetagi, e yi a bənbɔ. <sup>68</sup> E lu a maxədiɲɛ, e naxa, “I tan Alaa Muxu Sugandixina, a fala nxu xa fata Ala ra, nde i bənbɔxi?”‡

*Piyəri a mɛ fena Yesu ra*

*Maraka 14.66-72, Luka 22.56-62, Yoni 18.15-18, 25-27*

<sup>69</sup> Piyəri yi dɔxi tanden ma waxatin naxan yi, Saraxarali Kuntigi Singena walikɛ ɲaxanla nde yi fa a fɛma, a naxa, “I tan fan yi Yesu Galile kaan

---

† **26:65:** Musaa sariyan kui, muxun naxan na Ala rayelefu, na kanna lan a xa faxa. A mato Saraxaraline 24.16 kui. ‡ **26:68:** Muxun naxanye a bənbəma, ne mən a magelema na falan na.

fɔxɔ ra nun.” <sup>70</sup> Koni a yi a tandi e birin yɛtagi, a naxa, “N mi a kolon i waxi naxan fala fe yi.” <sup>71</sup> Na xanbi ra, a yi siga tanden so dɛɛn na. Walikɛ naxalan gbɛtɛ yi a to. Muxun naxanye yi dɔxi na, a yi a fala ne xa, a naxa, “Xɛmɛni ito yi Yesu Nasarɛti kaan fɔxɔ ra nun.” <sup>72</sup> Piyɛri yi a tandi, a yi a kɔlɔ, a naxa, “N mi na xɛmɛn kolon!” <sup>73</sup> Waxatidi danguxina, naxanye yi tixi na, ne yi fa Piyɛri fɛma, e naxa, “A tan nan nde i tan fan na! Amasɔtɔ i fala ti kiin bata a yita nxu ra!” § <sup>74</sup> Nayi, Piyɛri yi a kɔlɔ dangane ra, a yi a fala, a naxa, “N mi xɛmɛni ito kolon mumɛ!” Na waxatin yɛtɛni dontonna yi wuga mafurɛn. <sup>75</sup> Nayi, Yesu a falan yi rabira Piyɛri ma, a naxa, “Benun dontonna xa wuga i a falama nɛn dɔxɔna ma saxan fa fala i mi n kolon.” Piyɛri yi mini, a nimisa wugan ti!

## 27

*E siga Yesu ra Pilati fɛma*

*Maraka 15.1, Luka 23.1-2, Yoni 18.28-32*

<sup>1</sup> Xɔtɔn xɔtɔn, saraxarali kuntigine nun yamaan fonne yi a ragidi, a e xa Yesu faxa. <sup>2</sup> E yi a xidi, e siga a ra yamana kanna Pilati fɛma.

*Yudasi faxa fena*

*Kɛwanle 1.18-19*

<sup>3</sup> Yudasi naxan Yesu yanfa, a a so yiini, na to a to, e bata Yesu yalagi sayaan na, a yi nimisa, a yi gbeti gbanan tonge saxanna raxɛtɛ saraxarali kuntigine nun yamaan fonne ma. <sup>4</sup> A yi a fala, a naxa, “N bata yulubin liga, n muxun yanfa naxan

---

§ **26:73:** a fala ti kiina: Yanyina nde, a yi falan tima alo muxun naxanye kelixi Galile yamanani hanma Nasarɛti yamanana.

mi hake yo ligaxi alogo e xa a faxa!” E yi a yabi, e naxa, “Nxu tan ma fe mi na yi, i ya feen nan na ra!”<sup>5</sup> Yudasi yi gbetin woli Ala Batu Banxini, a siga, a sa a yete singan.

<sup>6</sup> Saraxarali kuntigine yi gbetin matongo, e naxa, “A mi daxa gbetini ito xa sa en ma gbeti ramarade sarijanxini, bayo faxa tiin saren nan a ra.”<sup>7</sup> E yi lan a ma a e xa na gbetin tongo, e feje rafalana nde a bɔxɔn sara na gbetin na, e yi na findi xɔje maluxunden na.<sup>8</sup> Nanara, han to, e na bɔxɔn xili bama a “Wuli Bɔxɔna.”<sup>9</sup> Nayi, Nabi Yeremi naxan fala, na yi kamali, a naxa, “E yi gbeti gbanan tonge saxanne tongo, Isirayila kaane a sara gbetin naxan na.”<sup>10</sup> E feje rafalana bɔxɔn sara a ra alo Marigina n yamari kii naxan yi.”\*

### *Pilati yi Yesu maxɔdin*

#### *Maraka 15.2-5, Luka 23.3-5, Yoni 18.33-38*

<sup>11</sup> Yesu yi ti yamana kanna yetagi, yamana kanna yi a maxɔdin, a naxa, “Yahudiyane mangan nan i tan na ba?”† Yesu yi a yabi, a naxa, “I bata a fala.”<sup>12</sup> Koni saraxarali kuntigine nun yamaan fonne a kansun waxatin naxan yi, a mi fefe fala.<sup>13</sup> Nayi, Pilati yi a fala a xa, a naxa, “E i kansunma feen naxanye birin na, i mi ne me ba?”<sup>14</sup> Koni Yesu mi tin a yabe mumε, yamana kanna yi kabε kati!

---

\* **27:10:** A ma to Sakari 11.12-13 nun Yeremi 18.2-3 nun 19.1-2 nun 32.6-15 kui. † **27:11:** mangana: Yamana kanna yi waxi a kansun feen nin fa fala a murutɛxi a mangayaan nan ma. Xa a tan nan a yete findi mangan na, na yi findima a yalagi xunna nan na.

*E Yesu faxa feen nagidi*

*Maraka 15.6-15, Luka 23.13-25, Yoni 18.39-19.16*

<sup>15</sup> Nba, sanli ito na yi a li nun, yamana kannan yi darixi kasorasaan muxu keden bejinne nen, yamaan na wa naxan xon ma. <sup>16</sup> Na waxatini, kasorasa jaxina nde yi na naxan xili Baraba. <sup>17</sup> Nanara, Pilati yamana kannan yi yamaan malanxin maxodin, a naxa, “E waxi a xon ma n xa nde bejin, Baraba hanma Yesu naxan xili Alaa Muxu Sugandixina?” <sup>18</sup> Bayo a yi a kolon yati, fa fala e Yesu soxi a yii xoxolonyaan nan ma.

<sup>19</sup> Pilati yi dɔxi kiti sadeni waxatin naxan yi, a jaxanla yi xeraan nasiga a ma, a naxa, “I nama fefe liga tinxin muxuni ito ra amasoto n toraxi nen xiye ni a fe ra to ki faji!” <sup>20</sup> Saraxarali kuntigine nun yamaan fonne yi yamaan nadin, a Pilati xa Baraba bejin, a yi Yesu faxa. <sup>21</sup> Yamana kannan yi e maxodin, a naxa, “E waxi a xon ma muxu firinni itoe, n xa nde bejin?” E yi a yabi, e naxa, “Baraba!” <sup>22</sup> Pilati yi e maxodin, a naxa, “Yesu naxan xili Alaa Muxu Sugandixina, e waxi a xon ma, n xa nanfe liga a ra?” E birin yi a yabi, e naxa, “A xa gbangban wudin ma.” <sup>23</sup> Koni Pilati yi e maxodin, a naxa, “A fe jaxin mundun ligaxi?” Koni e sɔnxon yi siga gboe ayi, e naxa, “A gbangban wudin ma!”

<sup>24</sup> Pilati a to waxatin naxan yi, a mi yi noe sese ra, sɔnxon yi gboma ayi, a yi igen tongo, a yi a yiin naxa yamaan yee xori, a naxa, “N gbee yo mi xemeni ito faxa feni! E feen ni ito ra!” <sup>25</sup> Yamaan yi a yabi, e naxa, “A wunla goronna xa lu nxu tan nun nxo diine xun ma!” <sup>26</sup> Awa, na xanbi ra, Pilati

yi Baraba bejin, a yi a yamari a e xa Yesu bulan, a yi a so e yii alogo e xa a gbangban wudin ma.

*Sofane yi Yesu magele*

*Maraka 15.16-20, Yoni 19.2-3*

<sup>27</sup> Yamana kanna sofane yi Yesu xali yamana kan banxini, sofane ganla birin yi e malan a ra-bilinni. <sup>28</sup> E yi a dugine ba a ma, e yi doma gbeela† ragodo a ma. <sup>29</sup> E yi wudi yii jali kanne denbe kamotin na mangaya taxamasenna ra, e yi a so a xunna, e dunganna so a yii. § E yi e xinbi sin a bun ma, e lu a magele, e naxa, “I keƚe Yahudiyane mangana!” <sup>30</sup> E yi degen puru a ma, e yi a dunganna tongo, e yi a bonbo a xunna ma. <sup>31</sup> E to yelin a magele, e domaan ba a ma, e man yi a maxidi a gbee dugine yi. Na xanbi ra, e yi siga a ra a gbangbandeni wudin ma.

*E yi Yesu gbangban wudin ma*

*Maraka 15.21-32, Luka 23.26-43, Yoni 19.17-27*

<sup>32</sup> E yi minima taani waxatin naxan yi, e yi lan xemena nde ra, naxan yi xili Simon Sireni kaana. E yi na karahan, a xa Yesu gbangban wudin tongo. <sup>33</sup> E yi fa na yireni denaxan xili Gologota, naxan bunna neƚƚ “xun xari yirena.” <sup>34</sup> E yi manpaan so a yii naxan yi basanxi se gbete ra naxan xolo, alogo a xa a min, koni a to a lenna ti a ma, a mi tin a minje.

---

† **27:28:** Doma gbeela yi findixi mangayaan taxamasenna nde nan na. Yamaan to a kansun fa fala a bata a yete findi mangan na, sofane fa a mangayana fe magelema. § **27:29:** E dunganna so a yii alo mangaya dunganna a magele feen na.

<sup>35</sup> E yi a gbangban wudin ma.\* Na xanbi ra, e yi masensenna ti lan a dagine yitaxun feen ma. <sup>36</sup> E yi dɔxɔ a kantandeni.

<sup>37</sup> E yi a kansun kedin sebɛ, e yi a gbangban a xun ma, e naxa, “Yahudiyane Mangan nan Yesu ito ra.”

<sup>38</sup> E yi muɗade firin gbangban wudin ma Yesu fɛma, kedenna a yiifanna ma, bonna a kɔmɛnna ma.

<sup>39</sup> Yamaan yi dangu a makonbɛ, e lu e xunni maxɛ, <sup>40</sup> e naxa, “I tan naxan Ala Batu Banxin kalama, i mɔn yi a ti soge saxan, i yetɛ rakisi! Xa Alaa Dii Xɛmɛ nan i tan na, godɔ, i keli wudin kɔɛ ra.” <sup>41</sup> Saraxarali kuntigine nun sariya karamɔxɔne nun yamaan fonne fan yi a magele na kii nin, <sup>42</sup> e naxa, “A bonne rakisi nɛn, koni a mi nɔɛ a yetɛ rakisɛ! Isirayila mangan xa mi a tan na ba? A xa keli wudin kɔɛ ra, a godɔ be alogo nxu xa dɛnkɛleya a ma! <sup>43</sup> A dɛnkɛleyaxi Ala ma, a naxa, a Alaa Dii Xɛmɛn nan a tan na. Nba, xa a rafan Ala ma, a xa a xunba!” <sup>44</sup> Hali muɗaden naxanye yi gbangbanxi wudin ma a dɛxɔn, ne fan yi a makonbi na kiini.

### *Yesu faxa fena*

#### *Maraka 15.33-41, Luka 23.44-49, Yoni 19.28-30*

<sup>45</sup> Sogen bata yi a ratinxin nun, dimin yi so yamanan birin yi han se din waxatin yi maso.

<sup>46</sup> Na waxatini, Yesu yi gbelegbele a kon xuini, a naxa, “Eli, Eli, lama sabakitani?” na bunna nɛn, “N ma Ala, n ma Ala, i n nabɛjinxɪ nanfera?”†

---

\* **27:35:** Sofane yi a yiine nun a sanne gbangban wudin ma, e yi a singan na kiini. E yi na ligama nɛn alogo muxune xa jɛnin benun e xa faxa. † **27:46:** A mato Yaburin 22.2 kui.

<sup>47</sup> Muxuna ndee yi tixi na yi, ne yi a xuiin mε, e naxa, “A Nabi Eli nan xilima.” <sup>48</sup> E tan nde keden yi a gi mafuren, a sa dugi dungin tongo, a yi a sin minse muluxunxini, a yi a filin tamin ηοε ra, a yi a ti a xa, a xa a min. <sup>49</sup> Koni bonne naxa, “A mamε, en na a mato xa Nabi Eli fa a rakisε.”

<sup>50</sup> Yesu mαn yi a xui ramini fangan na, a niin yi ba.

<sup>51</sup> Dugin naxan yi singanxi Ala Batu Banxin tagi, na yi bο firinna ra, fοb a xunna ra han a sanbun na. Bοxαn yi xuruxurun, fanyene yi bο. <sup>52</sup> Gaburune yi rabi, faxa muxu sariηanxina ndee yi keli. <sup>53</sup> E keli gaburune kui. Yesu keli xanbini sayani, e yi siga Taa Sariηanxini, e mini kenenni muxu wuyaxi xa.

<sup>54</sup> Sofa kemεn kuntigin nun a sofaan naxanye yi Yesu kantanma, ne to bοxαn to xuruxurunηε, e nun feen naxanye birin bata liga, e yi gaxu kati! E yi a fala, e naxa, “Alaa Dii Xεmεn nan yi a ra yati!”

<sup>55</sup> Naxanla naxanye yi biraxi Yesu fοxο ra keli Galile yamanani, naxanye yi a malima nun, ne wuyaxi yi na, e tixi wulani, e a matoma.

<sup>56</sup> Mariyama Magadala kaan yi ne ye nun, e nun Mariyama, Yaki nun Yusufu nga, e nun Sebede a dii xεmεne nga.

### *Yesu maluxun fena*

*Maraka 15.42-47, Luka 23.50-56, Yoni 19.38-42*

<sup>57</sup> Ninbanna to a li, nafulu kannan nde yi fa naxan yi xili Yusufu Arimate kaana, Yesu a xarandiina nde nan yi a fan na. <sup>58</sup> A yi siga Pilati fema, a yi a maxαdin Yesu binbina fe ma. Pilati yi e yamari, a e xa Yesu binbin so Yusufu yii. <sup>59</sup> Nanara, Yusufu yi a binbin tongo, a yi a kasangen dugi fixeni,



<sup>60</sup> a sa a maluxun gaburun na fanye kui gexini alo faran yili, a yi baxi naxan gedeni a yeƙe xa nun. Na xanbi ra, a yi gɛmɛ belebelen makutukutu gaburun de ra, a siga. <sup>61</sup> Mariyama Magadala kaan nun Mariyama bonna yi dɔxi na nun, e yeɛn lanxi gaburun ma.

### *Gaburu kantanne*

<sup>62</sup> Yuma lɔxɔn xɔtɔn bode, saraxarali kuntigine nun Farisi muxune yi siga Pilati fema, <sup>63</sup> e naxa, “Nxu fafe, wule falani ito yi a nii ra waxatin naxan yi, nxu xaxili dɔxi na xɔn ma, a fala nen, a naxa, ‘Soge saxan na dangu waxatin naxan yi, n mɔn kelima nen sayani.’ <sup>64</sup> Na ma, i xa yamarin fi, gaburun xa kantan ken, han a soqe saxande lɔxɔni alogo a xarandiine nama fa a binbin muɓa, e siga a ra. E yi a fala yamaan xa fa fala ‘A bata keli sayani.’ Xa ito liga, wule dɔnxɛni ito ɓaxuma ayi nen dangu a fɔlɔn na.” <sup>65</sup> Pilati yi a fala e xa, a naxa, “Ɛ kantan muxune tongo, e xa sa gaburun kantan alo e nɔe a ra kii naxan yi.” <sup>66</sup> Nanara, e yi siga, e sa gaburun deɛn nagali ki faɓi, e taxamasenna sa a ma, e yi a kantan sofane lu na yi.

## 28

### *Yesu keli fena sayani*

#### *Maraka 16.1-10, Luka 24.1-12, Yoni 20.1-10*

<sup>1</sup> Matabu Lɔxɔn danguxina, xati lɔxɔn subaxani, Mariyama Magadala kaan nun Mariyama bonna yi siga gaburu matodeni. <sup>2</sup> Bɔxɔn yi xuruxurun gbeen ti. Marigina malekan yi godo keli kore, a yi gɛmɛ gbeen makutukutu, a dɔxɔ a fari. <sup>3</sup> Na malekan yeɗagin yi luxi alo kuyen na a ɓinna

masoxon, a dugine yi fixa alo balabalan kesena. <sup>4</sup> Kantan muxune yi gaxu han e xuruxurun, e yi fuga a ra, e lu alo faxa muxune. <sup>5</sup> Koni malekan yi falan ti naxanle xa, a naxa, “E nama gaxu, n na a kolon fa fala ε Yesu nan fenma naxan gbangban wudin ma. <sup>6</sup> A mi be yi, a bata keli alo a a fala kii naxan yi. E fa a saden mato. <sup>7</sup> E siga mafuren, ε sa a fala a xarandiine xa, ε naxa, ‘A bata keli sayani, ε sa a lima Galile yamanani, ε a toma nen na yi!’ N bata a fala ε xa iki.”

<sup>8</sup> Nanara, e keli gaburun yireni mafuren gaxun nun sewani, e siga e giye, e sa a fala a xarandiine xa.

<sup>9</sup> Yesu yi e ralan mafuren, a naxa, “E nuwali.” E yi fa a sanna suxu, e yi a batu. <sup>10</sup> Yesu yi a fala e xa, a naxa, “E nama gaxu, ε siga, ε sa a fala ngaxakedenne xa, a e xa siga Galile yi, e sa n toma menna nin.”

### *Kantan muxune dentegena*

<sup>11</sup> Naxanle mon yi kira yi waxatin naxan yi, sofaan naxanye yi gaburun kantanma, na ndee yi xete taani. Feen naxan birin ligaxi, e na fala saraxarali kuntigine xa. <sup>12</sup> Saraxarali kuntigine nun yamaan fonne yi e bode to, e lan fe keden ma, e gbeti gbeen so sofane yii. <sup>13</sup> E yi a fala e xa, e naxa, “E xa ito fala, ε naxa, ‘A xarandiine bata fa kœen na, e yi a binbin muɲa, nxu yi xiin waxatin naxan yi.’ <sup>14</sup> Xa yamana kannna na mε, nxu a mafanɲε, nxu yi ε ba kontofinli.” <sup>15</sup> Kantan muxune yi gbetin nasuxu. E naxan fala e xa, e yi na liga. Na falan yi xuya ayi na kiini Yahudiyane tagi han to.

*Yesu yi a xarandiine xε*

*Maraka 16.14-18, Luka 24.36-49, Yoni 20.19-23,  
Kεwanle 1.6-8*

<sup>16</sup> Xarandii fu nun kedenna yi siga Galile yamanani geyaan fari Yesu naxan ma fe fala e xa. <sup>17</sup> E to a to, e yi a batu. Koni siken yi ndee yi. <sup>18</sup> Yesu yi a maso e ra, a naxa, “Senben birin bata fi n ma kore xonna nun bɔxɔ xonna fari. <sup>19</sup> Nayi, ε siga, ε sa siyane birin findi n ma xarandiine ra, ε yi e rafu igeni n Fafe Ala nun a Dii Xεμεν nun a Nii Sariɗanxin xinli, <sup>20</sup> n na ε yamarixi naxanye birin ma, ε yi e xaran ne suxun ma. A mato, n luma nεn ε xɔn ma waxatin birin han dunuɗa raɗanni.”

## **Kisin Kiraan Kitabuna**

**The Holy Bible in the Yalunka language of Guinea.  
La Sainte Bible en langue Yalunka avec le titre: «Kisin  
Kiraan Kitabuna» Publié par Traducteurs Pionniers  
de la Bible en collaboration avec la mission MCA à la  
Préfecture de Faranah, République de Guinée 2012  
Copyright du text: © 2012—Traducteurs Pionniers de  
la Bible. Cette création est mise à disposition selon le  
Contrat Paternité-Pas d'Utilisation Commerciale-Pas  
de Modification 3.0 Unported disponible en ligne  
<http://creativecommons.org/licenses/by-nc-nd/3.0/> ou  
par courrier postal à Creative Commons, 171 Second  
Street, Suite 300, San Francisco, California 94105, USA.**  
copyright © 2012 Pioneer Bible Translators

Language: Yalunka

Translation by: Pioneer Bible Translators

..

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-06-21

---

PDF generated using Haiola and XeLaTeX on 11 Nov 2022 from source files dated 29 Jan 2022

47153269-13a8-5fdd-8537-530b29da9f78